

# LAI LIH HU

## (Exodus)

### *Krax Kham Geu Pui Isarelatex*

**1** In mawh ceukaux kawn praix Isarelatex, pa hoek ka meung Ejiptux tau mai Yakop khawm pui daux nyiexma nawh, <sup>2</sup> pa mawh Rubin, Simeon, Lewix mai Yudax, <sup>3</sup> Isakha, Zebulun mai Benjamin, <sup>4</sup> Dan, Napthalix, Gat mai Asha, <sup>5</sup> doeh ru Yakop, koe atixgliah kaux, yam an Yosiep hoik ot sivoe kix ka daux meung Ejiptux. <sup>6</sup> Khaix an Yosiep mai Puxke nawh mai doeh nyiexma nawh khankix yum. <sup>7</sup> Doeh ru pui Isarelatex baox nie haohhun mai niied tix nie sipie mai haokhuan ting riang mai naog ka daux haktiex an. <sup>8</sup> Yam an koe simiang pa khraox tix kaux daux meung Ejiptux pa ang tawng ka Yosiep. <sup>9</sup> Nawh ah nin ka pui tix, “Jhak heue, pui Isarelatex hoik kied nie mai hoik kied ting riang khaing ex.” <sup>10</sup> Hoek, kieh ex yuh cuyi tuktiaktukte ka kix, phan ang mawh nan, ha kix nie haohhun mai yam koe naing, kix tak hu sitoe tix mai pui koeng mai deeh puing ka ex, khaix an, kix tak lih hu khaing haktiex ex.” <sup>11</sup> Mawh kheu nan, kix yaog cao kaing pa kuang piang kix. Tawx beeh glawm pa cien kieh yuh kaing pa kin daux pa khin mai kix yaox ti sum veng dee sang deuh kraung sinngao Pharaw <sup>a</sup>, pa mawh veng Piton mai veng Ramase. <sup>12</sup> Viang kix nie yeenya piang kix kawx, pui Isarelatex baox nie haohhun mai nie pre sipie. Pui Ejiptux nie yaohyee jao pui Isarelatex. <sup>13</sup> Mawh kheu nan, pui Ejiptux nie cau kix daux pa nie lang taung kin, <sup>14</sup> kieh kix yaox pa kin pa song daux pa cau kix yuh kaing pa mawh kaing lon tiex sin mai kaing ma kaing kaung kuceu, ka daux pa cau pa khin kix yuh kaing. <sup>15</sup> Khaix an, simiang Ejiptux ah ninka sibun pui Hebrie, cao priex keh ka daux kix pa kaux Shipharax mai Pu-a. <sup>16</sup> “Yam yuh pax kaing priex keh ka sibun Hebrie, jhak yam keh kix, phan mawh kawn

simex pax tak pah nawh, viang mawh nan, phan mawh kawn sibun deuh nawh im ju.” <sup>17</sup> Cao priex keh an kiex lhat graung ka Siyiex mai kiex ang yuh awm lox pa tawm simiang Ejiptux, kiex deuh kawn nyawm simex khankix im ju. <sup>18</sup> Simiang Ejiptux kok ka sibun priex keh ah nin ka kiex, “yuh ka mawx pax lai yuh nin mai deuh kawn simex khankix im ju lie?” <sup>19</sup> Sibun priex keh khankiex ah nin ka Pharaw, “Mawh kheu sibun Hebrie ang awm sibun Ejiptux, kix koe riang rao mai yie keh sivoe ang sibun priex keh nyang hoek ka kix.” <sup>20</sup> Siyiex yuh pa mhawm ka sibun priex keh an kiex mai pui nie haohhun pre mai ting riang. <sup>21</sup> Mawh kheu sibun cao priex keh lhat graung ka Siyiex, Nawh Cao kieh kiex koe kawn praix. <sup>22</sup> Pharaw tawx lox ka pui nawh khawmuik, “Can kawn nyawm simex pa keh khaing pui Hebrie kukaux, pex tak tik ka daux rawm klawng Nilax, pex deuh ngie kawn nyawm sibun kukaux im ju heue.”

### *Grawng Keh Mose*

**2** Pui tix kaux khaing nyiexma Lewix, teei ti moeng ka kawn sibun Lewix. <sup>2</sup> Sibun an koe kaux mai keh kawn simex tix kaux, yam yaox nawh mhawm grang kawn simex an, nawh mox ka nawh loe khix. <sup>3</sup> Yam yaox nawh ang ti lai pon mox, nawh teei kreeb pa taing ka priem mai kraix graix mai peeh khaox Ashaphat kah mai sau kawn nyawm daux an, hu deuh sinax pang priem pa koe praok rawm klawng. <sup>4</sup> Sibun pa mawh puxke nawh, pau ti jhak dee singai sonsang tawng pa sang lih mawh ka kawn nyawm an. <sup>5</sup> Kawn sibun Pharaw lih hoek ti heem

rawm dauw rawm klawng, kawncaw sibun nawh khankix lailing hawt praok klawng mai yaox ka kreeb tix mu sinax pang priem mai ploi kawncaw sibun tix hu tee mai kieh viex hoek ka tix. <sup>6</sup> Yam paoh nawh kreeb an, nawh yaox ka kawm nyawm iak maikawm nyawm iakan yiim. Mawh kheu nan, nawh cauxrhawm ka kawm nyawm an ah nin, "In mawh kawm pui Hebrie tix kaux kaux." <sup>7</sup> Khaix an, sibun puxke nawh ah nin ka kawm sibun Pharaw, "Sang kieh maix aux hu kok ka sibun Hebrie tix kaux kaux sonsang tawx kawm nyawm in peux son maix lie?" <sup>8</sup> Kawm sibun Pharaw ah nin ka nawh, "Hu heue." Mawh kheu nan, sibun an hu mai kok ka miex kawm nyawm. <sup>9</sup> Kawm sibun Pharaw ah nin ka nawh, "Tei kawm nyawm in hu mai priex son aux, aux tak tawx riang priex maix ka." Mawh kheu nan, sibun an teei kawm nyawm mai priex ka nawh. <sup>10</sup> Kawm nyawm haokhuan mai viex nawh hoek ka kawm sibun Pharaw mai nawh lih mawh kawm simex, kawm sibun Pharaw, nawh kok ceukaux nawh mawh Mose, nawh ah nin, "Mawh kheu teei aux nawh khaing dauw rawm heue."

### **Grawng To Mose**

<sup>11</sup> Yam hoik ting Mose, nawh hu ka puxaik tix mai jhak ka kaing cien pa yuh kix mai nawh yaox pui Ejiptux tawx ka pui Hebrie tix kaux pa mawh puxaik nawh. <sup>12</sup> Nawh jhak plak in plak an, yam ang nawh yaox pui tix kauxkawx, nawh pah pui Ejiptux mai sipaung nawh dauw mhaik. <sup>13</sup> Yam deeh hu nawh khaix an tix ngaix jhak heue, pui Hebrie ra kaux simah mai pah paox tix, nawh ah nin ka pui pa taptoi an, "Yuh ka mawx maix lai taptoi ka paox puxaik tix lie?" <sup>14</sup> Nawh pawk ah nin, "Mawx pa kieh maix yuh cao kaing mai prawng see ka piang yix? mawh keud maix ti sang pah aux awm hoik pah tix ka pui Ejiptux lie?" Mawh kheu nan, Mose hoik lhat mai keud "Kix hoik tawng ceu inkix tete." <sup>15</sup> Yam mhong Pharaw ka grawng in, nawh sawg ti pah Mose, mawh kheu nan, Mose to khaing Pharaw mai hu ot ka dauw haktiex Midian mai ngawm dex rawm dauw. <sup>16</sup> Yam an kawm sibun cao giex kaing li Midian aliax kaux, kix hoek ti kin rawm mai sau rawm naog dauw dawng sonsang tawx yung mai pex keeing kix nyawm rawm. <sup>17</sup> Cao liang yung hoek mai grheu kix hu

dee singai, viang mawh nan, Mose kaoh cung mai teem ka kix mai tawx yung mai pex khankix nyawm rawm. <sup>18</sup> Yam deeh kix ka keeing tix Roelax nawh ah nin, "Yuh ka mawx pex lai cao hoek in singaix." <sup>19</sup> Kix pawk ah nin, "Pui Ejiptux tix kaux hoik taoh yix khaing dauw taix cao liang yung khankix mai kin rawm son yix mai tawx yung mai pex nyawm rawm." <sup>20</sup> Nawh ah nin ka kawm sibun tix, "Ot nawh dee mawx? Kheu pex lai prah nawh? Kok nawh hoek sawm." <sup>21</sup> Mose kied nyawm rhawm ka ot tix mai Roelax mai nawh tawx Mose moeng kawm sibun tix Zipawrax. <sup>22</sup> Nawh keh kawm simex tix kaux mai kix kok ceukaux nawh mawh Geshom, mawh kheu ah nawh nin, "Aux hoik mawh nyosinie dauw haktiex pui tang praix." <sup>23</sup> Yam hoik rheeng bawgyam, simiang meung Ejiptux yum." Ceu pui Isarelax khankix ngia mai riagyoy kheu yuh siliex, lox riagyoy kix hoik hoek ka sivoe Siyiex. <sup>24</sup> Siyiex mhong ka lox ngia kix mai Siyiex deeh dohkeud ka gumlox sijax mukheu pa yuh Nawh Cao tau mai Abraham mai Icak mai Yakop. <sup>25</sup> Siyiex jhak ka piang kawm praix Isarelax khankix mai tawng ka grawng kaing pa yaox kix ti yuh heue.

### **Siyiex Kok Mose**

**3** Yam liang Mose yung mai pex paox nawh Yesaraw, pa mawh cao giex kaingli Midian, nawh viex yung mai pex khankix hu plak khaix dauw tiag mai hoek ka baoh Hawrap pa mawh gawng Siyiex. <sup>2</sup> Kawncaw Siyiex lih bleeh ka nawh ka dauw rao ngu sigreung yeem khaox mai nawh jhak ka an, jhak heue, yeem khaox an hoik gleeing ka ngu, viang mawh nan, yeem khaox an ang proe. <sup>3</sup> Mose ah nin, "Aux sang hu jhak ka rieng susai pa daoxam in, yeem an ang chix proe jao patix lie?" <sup>4</sup> Yam yaox Siyiex ka veeh nawh ti hu jhak, Siyiex kok ka nawh khaing dauw sigreung yeem ah nin, "Mose! Mose!" mai nawh deeh pawk ah nin, "Aux koe tin." <sup>5</sup> Khaix an Nawh Cao ah nin, "Paw hoek dex, Peeik kiep khaing caong maix, mawh kheu dee cung maix mawh tiex dee pa singax." <sup>6</sup> Nawh Cao bawx ah nin, "Aux mawh Siyiex keeing maix, Abraham, Icak mai Yakop. "Mose

mox pakngai tix kheu lhat graung nawh mai ang pon jhak ka Siyiex. <sup>7</sup>Siyiex ah nin, "Aux hoik yaox ka yeenya kix ceu pui Aux pa ot daux meung Ejiptux, Aux mhong lox riagyo kix kheu cau cao kaing ka kix, mawh kheu Aux hoik tawng krax kharhawm kix, <sup>8</sup>Aux hoek sonsang taoh kix khaing daux tawm taix pui Ejiptux mai sonsang deeh teei Aux kix lih khaing daux haktiex an mai tawx kix hu ka haktiex pa mhawm pa vieh, dee lih rawm teeh mai rawm hia, dee ot ceu pui Khananix, ceu pui Hittix, ceu pui Amawrix, ceu pui Pharazix, ceu pui Hiwix mai ceu pui Yebusix khankix. <sup>9</sup>"Yam in, jhakheue, kraxyiem kawn praix Isarelax khankix hoik hoek ka Aux mai Aux hoik yaox ka pa yeenya ceu pui Ejiptux ka kix. <sup>10</sup>"Mawh kheu nan hu yam in, Auxsang ploi maix hu ka simiang Pharaw mai kieh maix teei pui Aux kawn praix Isarelax lih khaing Ejiptux." <sup>11</sup>Viang mawh nan, Mose deeh ah nin ka Siyiex, "Mawh aux pui pa yuh ka mawx, aux lai khex sang pon hu ka Pharaw mai teei kawn praix Isarelax khankix lih khaing meung Ejiptux." <sup>12</sup>Nawh Cao ah nin, "Aux tak ot tau mai maix mai in tak mawh mhairug son maix, kheu Aux ploi maix hu, yam hoik viex maix ceu pui khankix lih khaing meung Ejiptux mai maix tak krub ka Siyiex ka piang gawng in." <sup>13</sup>Mose ah nin ka Siyiex, "Yam hoek aux ka kawn praix Isarelax khankix, aux sang ah nin ka kix, Siyiex keeing pex hoik ploi aux hoek ka pex, phan kix deeh chawx aux, mawh ceukaux nawh patix? Aux sang krai yuh ka mawx ka kix?" <sup>14</sup>Siyiex ah nin ka Mose, "AUX MAWH AWM PA MAWH AUX." Nawh ah nin, krai yuh nin ka ceu pui Isarelax, KAW PA MAWH AUX, hoik ploi aux hoek ka pex." <sup>15</sup>Siyiex deeh ah nin ka Mose, "Ah yuh nin ka pui Isarelax, Siyiex keeing pex Siyiex Abraham, Icak mai Yakop, hoik ploi aux hoek ka pex, in mawh ceukaux Aux leeingju, in mawh ceukaux pa caw doeh ru pex tix dohkeud ka tix ju hoik tix ju. <sup>16</sup>Hu mai kraixkhrawm cub kuad song pui Isarelax khankix, "Siyiex keeing pex, Siyiex Abraham, Icak mai Yakop hoik bleeh ka aux ah nin, "Aux hoik yaox canceu pa yuh pui meung Ejiptux khankix ka pex, <sup>17</sup>Aux hoik yuh sijax mukheu sonsang teei pex lih khaing krax pa kharhawm khaing Ejiptux mai kieh pex hu ka haktiex ceu pui Khananix, ceu pui Hittix, ceu pui Amawrix, ceu pui Pharazix, ceu pui Hiwix mai ceu pui Yebusix deeh lih rawm teeh mai

rawm hia." <sup>18</sup>Kix tak nghiet lox maix maix mai kuad song Isarelax tak hu ka simiang Ejiptux ah nin ka nawh, Siyiex ceu pui Hebrie, hoik sipub ka yix mai yam in yuh buanson, kieh yix hu krax daux tiag loe singaix krax, sonsang rawg yix buan mai krub ka Siyiex. <sup>19</sup>Aux tawng ka ang simiang Ejiptux ploi maix lih hu yieyoing, phan nawh ang yaox taix pa ting sibrawm Aux. <sup>20</sup>"Aux tak nyeu taix tix mai ciyang ka pui Ejiptux tau mai pa daoxam pa yuh Aux khaix an nawh tak ploi maix lih hu, <sup>21</sup>Aux tak kieh pui in koe min plakngai sivoce ceu pui Ejiptux, yam lih hu pex, pex tak ang yaox ti lih hu mai taix yi tix, <sup>22</sup>sibun kukaux tak deeh mhaing kraung mau, kraung khri mai kraung ceep khaing paox plawg sibun pa ot ka nyiex nawh khankix mai tak ceep kraung khrai an khankix ka kawn simex kawn sibun tix mai tak rhim hu khaing pui Ejiptux heue.

#### *Pa Daoxam Son Pharaw*

**4** Mose deeh ah nin, "Phan kix ang yumrhawm ka aux, phan ang mawh nan ang nghiet ka lox aux, mawh kheu kix takah nin, "Siyiex ang tie bleeh ka maix." <sup>2</sup>Siyiex ah nin ka nawh, "Mawh patix pa koe daux taix maix lie? Nawh ah nin, "Koe Khaox grix tix gawng." <sup>3</sup>Nawh Cao ah nin, "Taing an piang tiex, yam taing nawh an piang tiex mai khaox grix an lih ti mawh siuing mai Mose to khaing an. <sup>4</sup>Khaix an, Siyiex ah nin ka Mose, "Nyeu taix maix mai giex ka sidax nawh." Mose nyeu taix tix mai giex, an deeh lih ti mawh khaox grix daux taix nawh. <sup>5</sup>"Kix tak yumrhawm ka Siyiex pa mawh Siyiex keeing kix, Siyiex Abraham, Icak mai Yakop, pa hoik lih bleeh ka maix." <sup>6</sup>Siyiex baox ah nin ka nawh, "Sau taix maix ka naok maix." Nawh sau taix tix ka naok tix mai yam deeh teei nawh taix tix lih, taix nawh lih mawh jhawm saux sipawg paing awm rawm rha. <sup>7</sup>Nawh Cao ah nin, "Baoux sau taix maix ka naok maix. "Mawh kheu nan, nawh baoux sau taix tix ka naok tix

mai yam deeh teei nawh taix tix lih, jhak heue, taix nawh deeh mhawm awm neh nawh.<sup>8</sup> “Phan kix ang nyang yumrhawm ka maix, ” “Phan ang mawh nan, ang yumrhawm ka mhairug pa yuh maix bawg tix, kix tak yumrhawm ka mhairug pa yuh maix bawg khaix.”<sup>9</sup> Phan kix ang yumrhawm ka mhairug in ra ceu mai ang cu ti nghiet ka lox maix, maix tak kin rawm khaing dauw rawm klawng Nilax mai klup ka piang tiex kroh, rawm pa kin maix khaing rawm klawng Nilax tak lih ti mawh nham ka piang tiex kroh.”<sup>10</sup> Mose ah nin ka Siyiex, “Siyiex aux eue, aux dawg mawh pui pa ang chix sikah, tom yam jah Maix Cao tix sikah tau mai kawncau maix kawx, aux mawh pui pa cien jheeh mai kle.”<sup>11</sup> Khaix an Siyiex deeh ah nin ka nawh, “Mawh mawx pa phan ka jheeh kawm pui lie? Phan ang mawh nan, mawh mawx pa phan pui deux, pui lheet, pui pa chix yaox mai pui dugngai khankix lie? Ang hoik mawh Aux Siyiex lie?”<sup>12</sup> “Mawh kheu nan, hu heue, Aux tak ot tau mai jheeh maix mai gau maix ka pa sang krai maix.”<sup>13</sup> Viang mawh kawx nan nawh ah nin, “Siyiex aux eue, kieh pui tang kaux hu liak.”<sup>14</sup> Mawh kheu nan, Siyiex songrhawm ka Mose ah nin, “Puxke maix Arun pui Lewix koe ang mawh lie? Aux tawng ka chix sikah nawh mhawm mhawm, jhak heue, nawh hoik hoek ti rieb maix yam in, yam yaox nawh maix, nawh tak gauxrhawm ka dauw rhawm tix.”<sup>15</sup> Maix tak yaox ti sikah ka nawh mai sau gumlox ka dauw jheeh nawh, Aux tak koe tau mai jheeh maix khawm jheeh nawh, Aux tak gau pex ka pa sang yuh pex.<sup>16</sup> Nawh tak sikah tang maix ka pui khankix mai nawh tak mawh tang jheeh maix mai maix tak mawh tang Siyiex ka son nawh.<sup>17</sup> “Maix tak giex khaox grix in dauw tawm taix tix sonsang yuh maix mhairug heue.”

### **Mose Hu Meung Ejiptux**

<sup>18</sup> Mose deeh ing ka paox tix Yesaraw ah nin ka nawh, kieh aux deeh ing ka puxaik tix pa ot dauw Ejiptux liak mai jhak ka kawm im ju kix Yesaraw ah nin ka Mose, “Hu ka dauw pa nhim.”

<sup>19</sup> Siyiex ah nin ka Mose dauw meung Midian, “Deeh ing ka meung Ejiptux mawh kheu pui pa sawg ka ju maix khankix hoik yum.”<sup>20</sup> Mose teei moeng tix mai kawm praix tix mai kieh kix

brug la mai kix deeh ing ka haktiex Ejiptux mai Mose teei ti viex khaox grix Siyiex dauw tawm taix tix.<sup>21</sup> Siyiex ah nin ka Mose, “Yam deeh ing maix ka meung Ejiptux, maix tak jhi sibrawm pa daoxam pa ap Aux dauw tawm tai maix sivoe Pharaw, viang mawh nan, Aux tak kieh rhawmrhi nawh kiien, son ang nawh kieh kix hu.”<sup>22</sup> Maix tak ah nin ka Pharaw, “Siyiex ah nin, Isarelaux mawh kawm simex Aux mai kawm Ai Aux,<sup>23</sup> “Aux ah nin ka maix, “Ploi kawm simex Aux sonsang hu krub ka Aux, “phan maix thiang, Aux tak pah ka kawm Ai maix.”<sup>24</sup> Yam hu kix krax, Siyiex sawg ka Mose sonsang pah ka nawh.<sup>25</sup> Khaix an, Zibawrax teei simaox pa lawm mai pat hak kawm simex tix mai teeh an ka caong Mose ah nin, “Maix mawh mex aux pa dex mai nham aux.”<sup>26</sup> Nawh Cao ploi Mose hu, khaix an moeng nawh ah nin, mawh kheu grawng pa pat hak, “Maix mawh mex pa dex dawt mai nham aux.”<sup>27</sup> Siyiex ah nin ka Arun, “Hu ka dauw tiag, sonsang sipub ka Mose. “Nawh hu sipub Mose ka piang gawng Siyiex mai ngheet ka nawh.<sup>28</sup> Mose krai Arun mhong gumlox Siyiex, pa hoik ploika nawh mai mhai pa daoxam pa tawm Nawh Cao khawmuik.<sup>29</sup> Mose mai Arun hu kraixkhrawm kuad song pui Isarelaux,<sup>30</sup> Arun krai gumlox pa hoik krai Siyiex ka Mose khawmuik mai hoik yuh mhai pa daoxam ka sivoe pui khankix.<sup>31</sup> Yam hoik mhong pui khankix ka hoek fi Siyiex ka pui Isarelaux mai yaox Nawh Cao hoik kia ngien ka krax kha kix rhawm tix, kix yumrhawm num kaing tix mai krub ka Nawh Cao heue.

### **5 Mose Mai Arun Hu Ka Pharaw**

<sup>5</sup> Mose mai Arun hu ah nin ka Pharaw, “Siyiex pui Isarelaux ah nin, kieh pui Aux Isarelaux hu sonsang yuh kix pawie ka Aux dauw tiag.”<sup>2</sup> Pharaw ah nin, “Mawh Siyiex pa yuh ka mawx pa sang nghiet aux lox mai sonsang ploi pui Isarelaux lie? Aux ang tawng ka Siyiex mai aux tak ang pon ploi kix hu.”

<sup>3</sup> Kix ah nin, “Siyiex ceu pui Hebbie hoik sipub ka yix, kieh yix hu krax dauw tiag loe ngaix mai rawgbuan tan ka Siyiex tix, phan ang mawh nan, Nawh Cao tak kieh jhawm saux

preng mai lawm vaid hoek ka piang yix.”<sup>4</sup> Simiang Ejiptux ah nin ka kix, “Mose mai Arun eue, yuh ka mawx pex lai sang teei pui inkix khaing kaing pa yuh kix? Deeh hu yuh kaing jhaw pa yuh pex.”<sup>5</sup> Pharaw ah nin, “Jhak heue, yam in pex lai sang kieh pui haktiex khankix tommie laux ti khaing kaing jhaw pa yuh tix!”<sup>6</sup> Daux tix ngaix an Pharaw tawx lox tix hu ka cao thong bung kaing jhaw khankix ah nin,<sup>7</sup> “Pex tak ang lai yaox ti tawx brex nghox sonsang yuh kix lon tiex sin awm sivoe, kieh kix tang hu sawg brex nghox son tokaux tix.”<sup>8</sup> “Kieh kix yuh lon tiex sin awm diag yuh kix sivoe, paw doh kieh yawm ceex kawx, mawh kheu nieh kix, kix tom riagyo ah nin, kieh yix hu krub ka Siyiex tix,”<sup>9</sup> Baox tawx kaing tommie ka piang kix sonsang nie taug mao kix mai paw kieh kix nghiet ka lox pa ang mawh.”<sup>10</sup> Cao thong bung kaing jhaw khankix hu ah nin ka pui khawmuik, Pharaw ah nin, “aux ang lai tawx brex nghox ka pex.”<sup>11</sup> Hu sawg brex nghox ka dee yaox pex son tokaux tix, viang mawh nan kaing jhaw pex tak ang pon tix yawm ceex kawx.”<sup>12</sup> Pui khankix hu ku sidah ka daux haktiex Ejiptux, sonsang khawm nyhee tang brex nghox.<sup>13</sup> Cao thong bung kaing jhaw khankix ah nin, “Niied yuh kaing jhaw yuh pex grumnaog ku singaix yam koe brex nghox.”<sup>14</sup> Cao thong bung kaing jhaw pui Isarela x khankix pa hoik yaog Pharaw kix mawh cao kaing, kix khin mai tawx ka kix mai chawx kix ah nin, “Kheu pex ang lai pon yuh lon tiex sin grumnaog awm diag pa yuh glang ka in, kawx mai singaix.”<sup>15</sup> Yam an cao thong bung kaing jhaw pui Isarela x khankix hoek mai riagyo ka Pharaw ah nin, “Maix lai tawx kaing jhaw pa yuh nin ka kawncau maix yuh ka mawx?”<sup>16</sup> Kix ang lai tawx brex nghox ka kawncau maix, kix ah nin ka yix, yuh lon tiex sin, jhak heue, kix tawx ka kawncau maix khankix, yam in phimap koe ka piang pui maix.<sup>17</sup> Nawh ah nin, “Pex kied sidaing nieh, mawh kheu nan, pex tom ah nin, kieh yix hu krub ka Siyiex.”<sup>18</sup> Hu yuh kaing yam in, tak ang tawx brex nghox ka pex, viang mawh nan, pex tak yaox ti tawx lon tiex sin awm diag prim.”<sup>19</sup> Cao kaing pui Isarela x khankix yaox ka hoek krax pa kharhawm ka piang tix kheu pa ah nin, “Pex tak ang yaox ti kieh lon tiex sin yuh tix yawm khaing diag prim.”<sup>20</sup> Yam hoik lih kix

khaing Pharaw, kix sipub Mose mai Arun pa cung ti rieb kix.<sup>21</sup> Kix ah nin ka kiex, “Kieh Siyiex jhak mai prawng ca ka piang pax, mawh kheu hoik kieh pax yix seeing brai ka sivoe ngai Pharaw mai sivoe ngai kawncau nawh khankix sonsang pah ka yix heue.”

### *Isarela x Pon Krax Lawdluan*

<sup>22</sup>Mose deeh hoek ka Siyiex ah nin, “Siyiex eue, Maix Cao lai yuh krax pa kharhawm ka piang ceu pui in yuh ka mawx? Maix Cao lai ploi aux hu yuh ka mawx?”<sup>23</sup> Tom singaix jah aux ti hoek krai lox ka Pharaw ka daux ceukaux Maix Cao, Pharaw tawx krax kharhawm ka pui inkix, Maix Cao ang taoh ka pui cie Maix heue.”

**6** Siyiex ah nin ka Mose, “Yam in maix tak yaox ka pa yuh Aux ka Pharaw, mawh kheu taix pa ting sibrawm Aux nawh tak ploi kix hu tau mai taix pa koe sibrawm Aux, nawh tak grheu kix lih khaing haktiex.”<sup>2</sup> Siyiex ah nin ka Mose, “Aux mawh Siyiex.”<sup>3</sup> Aux lih bleeh ka Abraham, ka Icak mai ka Yakop, awm mawh Aux Siyiex pa ting riang rao, viang Aux jhi kix ka ceukaux Aux Yehowa kawx, kix ang tawng ka Aux.<sup>4</sup> “Aux hoik yuh sijax mukheu tau mai kix, sonsang tawx Aux haktiex Khanan ka kix, pa mawh haktiex dee lailing kix ti mawh nyosinie.”<sup>5</sup> Aux mhong ka lox ngia pui Isarela x khankix, pa kieh pui Ejiptux kix yuh kaing pa kin mai deeh dohkeud ka gumlox sijax mukheu tix.<sup>6</sup> “Mawh kheu nan, ah nin ka pui Isarela x, Aux mawh Siyiex, Aux tak viex pex lih khaing greem beeh glawm pa kin khaing pui Ejiptux mai Aux tak taoh pex khaing kaing siliex pa yuh pex mai nyue plawng taix tix taoh pex khaing krai pa ting ciyang.”<sup>7</sup> “Aux tak teei pex mawh pui Tix mai Aux tak mawh Siyiex pex, pex tak tawng Aux mawh Siyiex pa viex pex lih khaing greem beeh glawm pa kin yuh pui Ejiptux.”<sup>8</sup> “Aux tak viex pex hu ka daux haktiex pa hoik tiextu Aux ti tawx ka Abraham, Icak mai Yokop, Aux tak tawx haktiex an mawh sinngao pex. Aux mawh Siyiex.”<sup>9</sup> Viang Mose ah nin ka pui Isarela x kawx, kix ang nghiet ka lox Mose, mawh kheu hoik kied taug mao rhawm kix ka

yaox tix krax kharhawm. <sup>10</sup> Siyiex ah nin ka Mose, <sup>11</sup> "Hu laig mai krai ka Pharaw simiang Ejiptux, sonsang ploi pui Isarelaux khankix lih hu khaing haktiex nawh. <sup>12</sup> Mose ah nin, pui Isarelaux ang nghiex ka lox aux, Pharaw nie sang nghiex ka lox pa lih khaing jheeh aux pa ang nyang pat hak tix yuh ka mawx?" <sup>13</sup> Siyiex tawm lox ka Mose mai Arun, son pui Isarelaux mai ka Pharaw meung Ejiptux, sonsang teei kix pui Isarelaux khankix lih khaing daux haktiex Ejiptux heue.

### ***Nyiexma Mose Mai Arun***

<sup>14</sup> Inkix mawh cao kaing daux nyiexma keeing kix, kawm Ai Isarelaux mawh Rubin, kawm simex Rubin khankix mawh Hanok, Phalux, Hezaron mai Khamix. Inkix mawh pui nyiexma Rubin. <sup>15</sup> Kawm simex Simeon khankix mawh Yemoelax, Yamen, Awhat, Yakhin, Zawha mai Shawlax, kawm simex pa pon khaing sibun Khanan, inkix mawh pui nyiexma Simeon. <sup>16</sup> Inkix mawh ceukaux kawm simex Lewix, awm pa koe doeh ru kix, pa mawh Geshon, Kawhat mai Merarix. Ju Lewix koe tix yieh tixngoe aliah num. <sup>17</sup> Kawm simex Geshon khankix mawh Libanix mai Shimix, awm pa koe doeh ru nyiexma kix. <sup>18</sup> Kawm simex Kawhat khankix mawh Amaran, Izaha, Hebron mai Awzalax mai ju Kawhat koe tix yieh tixngoe loe num. <sup>19</sup> Kawm simex Merarix khankix mawh Mahalix mai Mushi, inkix mawh pui daux nyiexma Lewix, awm pa koe doeh ru kix. <sup>20</sup> Amaram teei moeng ti Yawkhebiet pa mawh nan keeing tix mai nawh keh Arun mai Mose, ju Amaram koe tix yieh tixngoe aliah num. <sup>21</sup> Kawm simex Izaha khankix mawh Korax, Nephiet mai Zikharix. <sup>22</sup> Kawm simex Awzalax mawh Mishelax, Elazapha mai Titirix. <sup>23</sup> Arun teei ti moeng Elishebax, kawm sibun Aminadat nan Nashon, nawh keh Nadat, Abihux, Eliaza mai Itama. <sup>24</sup> Kawm simex Korax khankix mawh Asirax, Elakanax mai Abiasap, inkix mawh doeh nyiexma pui Korax. <sup>25</sup> Kawm simex Arun, Eliaza teei ti moeng kawm sibun Putelax mai keh Phinahat, inkiex mawh cao kaing keeing ceu pui Lewix awm pa koe doeh nyiexma kix. <sup>26</sup> Inkiex mawh Arun mai Mose, pa hoik krai Siyiex, pa viex ceu pui Isarelaux lih khaing haktiex Ejiptux awm cao kaing naing lien. <sup>27</sup> Inkiex mawh pui pa laig hu sikah ka Pharaw 6:2-3 Lih 3:13-15. 6:16-19 1Ben 6:16-19. 7:3 Kawm 7:36.

simiang Ejiptux, sonsang viex pui Isarelaux khankix lih hu khaing meung Ejiptux pa mawh Mose mai Arun heue.

### ***Arun Sikah Tang Mose***

<sup>28</sup> Ka daux singaix yam sikah Siyiex ka Mose ka daux haktiex Ejiptux, <sup>29</sup> Siyiex ah nin ka Mose, "Aux mawh Siyiex, krai ka Pharaw simiang Ejiptux, can pa krai Aux ka maix." <sup>30</sup> Mose ah nin ka Siyiex, "Aux mawh pui pa cien jheeh mai pa kle, Pharaw tak sang nghiex lox aux yuh ka mawx?"

**7** Siyiex ah nin ka Mose, "Jhak heue, Aux tak kieh maix awm Siyiex ka Pharaw mai puxke maix Arun tak mawh cao jhai maix. <sup>2</sup> Maix tak krai gumlox pa hoik tawm Aux ka maix khawmuik mai puxke maix Arun tak krai ka Pharaw sonsang ploi nawh pui Isarelaux khankix lih khaing haktiex nawh. <sup>3</sup> Aux tak kieh Pharaw kiien rhawm mai kieh mhairug pa dooxam Aux khankix, nie baox haohhun ka daux haktiex Ejiptux. <sup>4</sup> Pharaw tak ang nghiex ka lox maix, Aux tak deuh taix tix ka piang Ejiptux mai viex krunaing tix mai pui ceu Aux pa mawh kawm praix Isarelaux khankix lih khaing Ejiptux tau mai pa ciyang pa ting lhaong. <sup>5</sup> "Pui Ejiptux khankix tak tawng mawh Aux Siyiex, yam nyeu Aux taix tix ka piang Ejiptux mai viex pui Isarelaux lih khaing sinax kix. <sup>6</sup> Mose mai Arun hoik yuh awm pa tawm Siyiex ka kiex. <sup>7</sup> Mose koe ju tixdaix num mai Arun koe ju tixdaix loe num, yam sikah kiex ka Pharaw.

### ***Khaox Grix Mose***

<sup>8</sup> Siyiex ah nin ka Mose mai Arun, <sup>9</sup> "Yam ah Pharaw yuh nin ka pax, "Jhi aux yaox mhai pa dooxam yuh pax, "khaix an maix tak ah nin ka Arun, "Teei khaox grix maix mai taing sivoex ngai Pharaw mai an tak lih mawh siuing" <sup>10</sup> Mose mai Arun laig hu ka Pharaw mai yuh awm pa hoik tawm Siyiex mai Arun taing khaox grix tix sivoex Pharaw mai kawncaw nawh khankix mai an lih mawh siuing. <sup>11</sup> Khaix an Pharaw kok ka pui koe pingnya mai cao chix yuh simeed yuh sat ka daux meung Ejiptux kawx hawt yuh awm pa hoik yuh kiex. <sup>12</sup> Mawh kheu kix kukaux taing khaox grix tix mai an khankix lih mawh siuing. Viang mawh nan,

khaox grix Arun bleet ka khaox grix cie kix. <sup>13</sup> Pharaw ca kawm koe rhawm kiien mai nawh ang nghiet ka lox kix, awm pa hoik krai Siyiex heue.

### **Rawm Lih Ti Mawh Nham**

<sup>14</sup> Siyiex ah nin ka Mose, "Pharaw kied kiien rhawm mai nawh thiang ang kieh pui khankix hu. <sup>15</sup> "Hu ka Pharaw plak ponngawb, yam lih hu nawh ka dauw rawm mai maix krox nawh ka praok rawm klawng mai giex khaox grix pa hoik lih ti mawh siuing ka dauw taix maix. <sup>16</sup> Maix tak ah nin ka nawh, Siyiex ceu pui Hebrie, ploi aux hoek ka maix mai kieh aux ah nin, "Kieh pui Aux hu, sonsang krubkix ka Aux dauw tiag, tom yam in maix ang nyang cu tix nghiet." <sup>17</sup> Siyiex ah nin, "Mawh kheu maix tak tawng Aux mawh Siyiex, jhak heue, aux lah rawm klawng Nilax ka khaox grix pa koe dauw taix tix mai rawm an tak lih mawh nham. <sup>18</sup> Kax pa koe dauw rawm klawng Nilax khankix tak yum mai rawm klawng Nilax tak lih sioe cux mai pui Ejiptux khankix, tak seeing nyaux ka rawm klawng an." <sup>19</sup> Siyiex ah nin ka Mose, "Krai ka Arun, teei khaox grix maix mai nyeu taix tix ka piang rawm Ejiptux mai ka piang klawng iak klawng ting, ka piang rawm nhawng mai ka piang rawm dung rawm dauw, kudahdee dauw haktiex Ejiptux mai ka dauw tawg khaox, aw simaax." <sup>20</sup> Mose mai Arun yuh awm lox tawm Siyiex, nawh yaog khaox grix tix mai lah ka rawm Nilax ka plak siove ngai Pharaw mai siove ngai kawncaw nawh khankix, rawm khawmuikpa koe dauw rawm klawng Nilax tieh ti mawh nham khawmuik heue. <sup>21</sup> Kax pa koe dauw rawm klawng Nilax yum mai rawm klawng Nilax lih sioe cux, mawh kheu nan, pui Ejiptux khankix ang lai pon nyaux rawm khaing dauw rawm klawng Nilax, mawh kheu hoik lih naog nham ka dauw haktiex Ejiptux kudahdee. <sup>22</sup> Cao chix simeed dauw haktiex Ejiptux khankix kawx, yuh awm cuyi pa chix kix mai rhawm rhi Pharaw niied ti kiien mai ang nghiet ka lox kix, awm pa hoik krai Siyiex. <sup>23</sup> Pharaw veeh ti ing ka nyiex tix mai nawh ang deuh koe ceu koe mu ka dauw rhawm tix. <sup>24</sup> Mawh kheu nan, pui Ejiptux khankix kaong rawm dauw hawt rawm klawng Nilax sonsang nyaux kix kah, mawh kheu ang kix lai pon nyaux ka rawm khaing

rawm klawng Nilax. <sup>25</sup> Yam hoik luan aliah singaix khaix lah Siyiex ka piang rawm klawng Nilax heue.

### **8 Kharhawm Jao Khet**

Siyiex ah nin ka Mose, "Laig hu ka Pharaw ah nin ka nawh, Siyiex ah nin, kieh pui Aux lih hu, sonsang krub kix ka Aux. <sup>2</sup> Phan maix thiang ti ang kieh kix lih hu, jhak heue, Aux tak tawx krax kharhawm ka haktiex maix ka khet, <sup>3</sup> rawm klawng Nilax hoik naog ka khet khankix pa tak hoek ka piang maix ka dauw lawg mai ka piang ku it pex, ka dauw nyiex kawncaw maix khankix mai pui maix khankix, dauw nyiex priex mai ka dauw klong yuh pex blah khankix, <sup>4</sup> "Khet khankix tak haok ka piang maix mai ka piang pui maix mai ka piang kawncaw maix khankix." <sup>5</sup> Siyiex krai ka Mose, "Ah nin ka Arun, nyeu taix tix tau mai khaox grix tix ka piang rawm khankix, piang rawm klawng iak, piang rawm klawng ting mai piang rawm dung khankix mai kieh khet hoek naog ka piang haktiex Ejiptux" <sup>6</sup> Arun nyeu taix tix ka piang rawm khankix dauw meung Ejiptux mai khet khankix lih kheem ka haktiex Ejiptux. <sup>7</sup> Cao chix simeed khankix kawx yuh awm pa chix tix mai viex khet khankix hoek ka piang haktiex Ejiptux. <sup>8</sup> Pharaw kok ka Mose mai Arun ah nin, "Khioxkhaw ka Siyiex, sonsang deeh teei Nawh khet khankix hu singai khaing aux mai khaing pui aux mai aux tak kieh pui in khankix hu krub ka Siyiex." <sup>9</sup> Mose ah nin ka Pharaw, "Tat bawg yam pa sang khioxkhaw aux son maix, son kawncaw maix mai son pui maix, sonsang deeh yuh aux khet khankix lauxleeng khaing maix mai khaing nyiexma pex khawmuik mai deeh kieh kix ot ka dauw rawm klawng Nilax khaing." <sup>10</sup> Pharaw ah nin, "Khioxkhaw pasax." Mose ah nin, "Kieh awm pa ah maix, maix tak tawng Siyiex yix ang doh awm siyiex tangdah awx. <sup>11</sup> Khet khankix tak lih hu khaing maix khaing dauw nyiexma maix, khaing kawncaw maix khankix mai khaing pui maix, kix tak ot dauw rawm klawng Nilax khaing." <sup>12</sup> Mose mai Arun lih hu khaing Pharaw mai Mose riagyo ka Siyiex son grawng khet khankix, pa hoik

kieh Nawh tuktiak ka Pharaw. <sup>13</sup> Siyiex yuh awm pa khioxkhaw Mose, khet khankix yum, daux nyiex, daux yaong khankix mai daux kaung khankix. <sup>14</sup> Kix khrawm mai pum ti deuh mai haktiex hoik sioe cux. <sup>15</sup> Yam yaox Pharaw ka hoik yiien ceu an khankix, nawh deeh kiien rhawm mai ang nghiet lox kix awm pa hoik krai Siyiex heue.

### ***Kharhawm Jao Maing***

<sup>16</sup> Khaix an, Siyiex krai ka Mose, "Ah nin ka Arun, nyeu khaox grix maix mai lah ka phawng tiex mai an tak lih ti mawh maing, ka daux haktiex Ejiptux khawmuik." <sup>17</sup> Kiex yuh awm an, Arun nyeu taix tix tau mai khaox grix tix mai lah ka phawng tiex mai an lih ti mawh maing ka piang pui mai piang tobrie khawmuik mai phawng tiex lih mawh maing ka daux haktiex Ejiptux khawmuik. <sup>18</sup> Viang cao chix simeed khankix coca ti yuh an awm pa chix tix kawx, kix ang pon yuh, mawh kheu nan, maing hoik lih koe piang pui mai tobrie. <sup>19</sup> Cao chix simeed khankix ah nin ka Pharaw "In mawh sibrawm giien taix Siyiex. "Viang mawh nan, Pharaw ca kawm kiien rhawm mai ang nghiet ka lox kix awm pa krai Siyiex.

### ***Kharhawm Jao Prawp***

<sup>20</sup> Siyiex ah nin ka Mose, "Kaoh ponngawb caocao mai hu pau ka Pharaw yam hoek nawh ka rawm klawng mai ah nin ka nawh, Siyiex ah nin, "Kieh pui Aux lih hu, sonsang krub kix ka Aux. <sup>21</sup> Phan maix ang kieh pui Aux khankix lih hu, Aux tak ploi phung prawp khankix hoek piang maix, piang kawncau maix, piang pui maix, piang nyiexma maix khawmuik, nyiexma pui Ejiptux tak naog ka phung prawp mai ka piang tiex dee cung kix." <sup>22</sup> "Ka daux singaix an, Aux tak goih ti deuh haktiex Goshen ka dee ot pui Aux mai phung prawp tak ang koe tan, sonsang tawng maix ka mawh Aux Siyiex daux sigreung haktiex. <sup>23</sup> "Aux tak yuh mhai pa daoxam sinax pui Aux mai pui maix, mhai pa daoxam in tak lih mawh pasax." <sup>24</sup> Siyiex yuh ceu in mai phung prawp khankix hoek ka daux nyiex Pharaw mai ka daux nyiex kawncau nawh khankix mai ka daux haktiex Ejiptux khawmuik hoik lauxleeng ka jao phung prawp. <sup>25</sup> Pharaw kok Mose mai Arun ah nin, "Hu heue, krub ka Siyiex pex ka daux haktiex in. <sup>26</sup> Mose ah nin, ang khaw ti yuh nan, mawh kheu ceu pa tan ka Siyiex mawh ceu pa

seeing brai pui Ejiptux khankix kah, phan yix tan ceu pa seeing brai ka sivoe ngai pui Ejiptux khankix, kix tak dheem yix ka simaox ang mawh lie?" <sup>27</sup> "Yix caw ti hu ka daux tiag loe singaix krax mai tan ka Siyiex yix awm pa hoik tawm Nawh Cao ka yix." <sup>28</sup> Pharaw ah nin, "Aux tak kieh pex hu krub Siyiex pa mawh Siyiex pex ka daux tiag, mawh ngie ang pex yaox ti hu dee singai khaing. Khioxkhaw son aux liak." <sup>29</sup> Khaix an Mose ah nin, "Aux lih hu khaing maix mai aux tak rawgbuan ka Siyiex, sonsang lih hu phung prawp an khankix khaing maix pasax, khaing kawncau maix mai khaing pui maix khankix, viang mawh nan, maix paw lai baox pielhen, son ang maix ploi pui khankix hu krub ka Siyiex." <sup>30</sup> Mose lih hu khaing Pharaw mai rawgbuan ka Siyiex. <sup>31</sup> Siyiex yuh awm lox pa rawg Mose mai grheu phung prawp khankix khaing Pharaw, khaing kawncau nawh mai khaing pui nawh khankix, tom ang lai deuk tix mu kawx. <sup>32</sup> Pharaw baox nie kiien rhawm yam in mai nie ang ploi pui khankix hu heue.

### ***Krax Kha Jao Preng***

**9** Khaix an Simiang Siyiex ah nin ka Mose, laig hu ah nin ka Pharaw, "Siyiex, pui Hebrie ah nin, " "Kieh pui Aux lih hu, sonsang krub kix ka Aux. <sup>2</sup> "Phan maix kawm thiang ang kieh kix lih hu, <sup>3</sup> Jhak heue, Taix Siyiex tak hoek tau mai jhawm saux preng, ka piang tobrie pex daux kaung, brung, la, kala-uk, mawie mai yung khankix. <sup>4</sup> Siyiex tak yuh ceu pa tang siyox sinax tobrie pui Isarelaux mai tobrie pui Ejiptux khankix, mawh kheu nan, tobrie pui Isarelaux tak ang yum tix mu kawx. <sup>5</sup> Siyiex krai ti deuh bawg yam ah nin, "Pasax Siyiex tak sang yuh ceu in khankix ka daux haktiex in." <sup>6</sup> Ka daux pasax Siyiex yuh ceu in khankix mai kieh tobrie pui Ejiptux yum khawmuik, viang mawh nan, tobrie pui Isarelaux khankix ang yum tix mu kawx. <sup>7</sup> Pharaw ploi pui hu jhak mai tawng ka ang tobrie pui Isarelaux khankix yum tix mu kawx, viang mawh nan, rhawmrhi Pharaw ca kawm kiien mai ang cu ti ploi pui khankix lih hu heue.

### ***Krax Kha Jao Saux Muad***

<sup>8</sup> Siyiex ah nin ka Mose mai Arun, "Teei

nyaox tix dawm khaing glah ngu mai kieh Mose rhuat plak raoma ka sivoie ngai Pharaw. <sup>9</sup> "Phawng nyaox an tah ka dauh haktiex Ejiptux khawmuik mai an lih mawh jhawm saux muad ka piang pui mai tobrie ka dauh meung Ejiptux kudahdee." <sup>10</sup> Kix teei nyaox khaing glah ngu mai cung ka sivoie Pharaw mai Mose rhuat nyaox an plak raoma mai lih mawh jhawm saux muad ka piang pui mai tobrie khankix. <sup>11</sup> Cao chix simeed ang lai pon cung sivoie Mose jao jhawm saux muad, mawh kheu jhawm saux muad koe piang cao chix simeed mai piang pui Ejiptux khawmuik. <sup>12</sup> Siyiex kieh rhawm Pharaw kiien mai nawh ang nghiet ka lox kix awm hoik kraih Siyiex ka Mose heue.

### *Krax Kha Jao Pre*

<sup>13</sup> Khaix an Siyiex ah nin ka Mose, "Kaoh ponngawb caocao mai cung sivoie Pharaw ah nin ka nawh, "Siyiex pui Hebrie ah nin, "Kieh pui Aux lih hu sonsang krub kix ka Aux. <sup>14</sup> "Yam in, Aux tak ploi ceu pa kharhawm khawmuik ka dauh rhawmrhi maix, ka piang kawncau maix mai ka piang pui maix, sonsang tawng maix ang pui pa awm Aux koe tix kaux kawx ka dauh haktiex in khawmuik. <sup>15</sup> "Mawh kheu yam in Aux nyeu taix tix mai yuh krax kharhawm ka maix mai pui maix khankix, ka jhawm saux preng mai tat maix grai grup khaing haktiex, <sup>16</sup> "Viang mawh nan, grawng pa kieh Aux maix im ju mawh sonsang jhi Aux maix yaox sibrawm tix dauh maix mai sonsang ao min Aux ka dauh haktiex in khawmuik. <sup>17</sup> Tokaux maix kawncau kiien rhawm mai nunai ka pui Aux mai ang ploi kix hu. <sup>18</sup> Pasax bawgyam in, Aux tak kieh pre ting lih ka dauh meung Ejiptux, pa ang sax koe tom yam jah haktiex Ejiptux ti kaw tix, tom hoek in singaix. <sup>19</sup> "Ploi pui maix hu khrawm tobrie pa koe dauh kaung khankix, sonsang lawduan. Mawh kheu pre tak sang lih ka piang pui kukaux mai tobrie pa ot dauh kaung pa ang nyang khrawm hoek ka nyiex khawmuik, kix tak yum." <sup>20</sup> Can pui pa lhat ka gumlox Siyiex, ka sinax kawncau Pharaw, kieh siliex tix mai tobrie niied to ti ing ka nyiex. <sup>21</sup> Viang mawh nan, pui pa ang deuh gumlox Siyiex koe ceu, prah siliex mai tobrie tix dauh kaung. <sup>22</sup> Siyiex ah nin ka Mose, "Nyeu taix maix ka plak raoma, sonsang lih pre ka dauh

haktiex Ejiptux khawmuik, ka piang pui, ka piang tobrie mai ka piang khaox ox ribriem pa koe dauh kaung, kudahdee ka dauh haktiex Ejiptux." <sup>23</sup> Mose nyeu khaox grix tix ka plak raoma mai Siyiex ploi lox sinum praix, pre mai ngu lih ka piang haktiex. Siyiex kieh lhiex mai pre lih ka piang haktiex Ejiptux, <sup>24</sup> Pre pa khao mai ngu pa kied kin ting lih, pa ang sax koe dauh haktiex Ejiptux tix bawx kawx, jah tom yam mawh nawh meung haktiex tix mu. <sup>25</sup> Pre khankix dheem ka can pa koe ka dauh haktiex Ejiptux, can pa koe dauh kaung, pui, tobrie, ribriem mai kieh khaox ox khankix goh. <sup>26</sup> Mawh ngie dauh haktiex Goshin, dee ot pui Isarela khankix, pa ang lhiex pre lih kah. <sup>27</sup> Pharaw ploi pui hu, kok ka Mose mai Arun ah nin ka kieh, "Yam in aux hoik lud, Siyiex mawh pa rahsee, pui aux khankix mai aux hoik mawh pa lud." <sup>28</sup> Rawgbuan ka Siyiex, kieh naox heue, son ang sinum praix mai pre khankix baox lih, aux tak kieh pex lih hu, pex tak ang lai yaox ti ot ka meung in." <sup>29</sup> Mose ah nin ka nawh, "Khaix hoik lih aux khaing dauh veng, aux tak yaog taix tix ka Siyiex mai lox sinum praix tak yiennyawng. Pre khankix kawx, tak ang lai baox koe, sonsang tawng maix haktiex in mawh cie Siyiex." <sup>30</sup> "Viang mawh nan, son maix mai kawncau maix khankix, aux tawng ang pex nyang lhat graung ka Siyiex tom yam in." <sup>31</sup> Yam in khaox gan mai nghoxkoi khankix hoik lauxleeng. Grawh grawng nawh, nghoxkoi hoik kaux mai khaox gan khankix kawx, hoik pruh tai. <sup>32</sup> Nghox ca mai pang nghox khankix, ang nyang bax lauxleeng, kheu mawh plix nghox pa lha khaing paox tix. <sup>33</sup> Mawh kheu nan Mose lih hu khaing Pharaw dauh veng mai yaog taix tix lih ka Siyiex. Khaix an lox sinum praix pre khankix yiien. Mai lhiex ang lai lih ka piang tiex. <sup>34</sup> Yam hoik yaox Pharaw ka hoik yiien lhiex pre mai lox sinum praix khankix, nawh deeh baox lud mai rhawmrhi nawh deeh kiien tau mai kawncau nawh khankix. <sup>35</sup> Mawh kheu nan, rhawmrhi Pharaw baox kiien mai nawh ang kieh kawncau praix Isarela khankix lih hu, awm gumlox pa hoik kraih Siyiex ka Mose heue.

### 10 *Krax Kha Jao Sido*

Yam in, Siyiex ah nin ka Mose, "Hu ka Pharaw, mawh kheu hoik kieh Aux rhawmrhi nawh mai rhawmrhi kawncau nawh khankix kiien sonsang jhi Aux mhai pa daoxam sivoe nawh." <sup>2</sup> "Maix krai kawncau simex mai kawncau saux tix khankix mhong grawng sibrawm pa ting lhaong pa hoik yuh Aux dau meung Ejiptux mai mhai pa daoxam pa hoik yuh Aux ka dau sinax kix, sonsang tawng kix mawh Aux Siyiex." <sup>3</sup> Mawh kheu nan, Mose mai Arun hoek ka Pharaw ah nin, "Mawh kheu Siyiex ceu pui Hebie khankix ah nin maix ang cu ti deuh rhawm tiem sivoe ngai Aux, sang rheeng miexgrheeng? Kieh pui Aux lih hu, sonsang krub kix ka Aux." <sup>4</sup> "Phan maix kawncau sang thiang ti kieh pui Aux lih hu, jhak heue, pasax Aux tak kieh sido khankix hoek ka dahdee kuang maix heue." <sup>5</sup> "Kix tak kheem ka piang tiex son ang pui tix kaux kawx lai chix yaox ka tiex mai kix kawncau sang ih can pa kawncau deuk khaix pre. Mai kix tak ih ka lhax khaox lhax ox pa koe dau kaung pex khawmuik." <sup>6</sup> "Kix tak naog ka dau nyiex haw maix, ka dau nyiexma kawncau maix khankix mai ka dau nyiex pui Ejiptux khawmuik, pa ang pex sax yaox tix bawg kawx dau ju tax pex tom yam jah kix ti ot ka piang ca haktiex in, tom in singaix heue." Nawh deeh veeh ti lih khaing Pharaw. <sup>7</sup> Khaix an, kawncau Pharaw khankix ah nin ka nawh, "Pui in tak sang tawx krax tuktiak ka ex rheeng miexding? Kieh kix lih hu, sonsang krub kix ka Siyiex tix. Ang maix nyang tawng ka lauxleeing meung Ejiptux lie?" <sup>8</sup> Mawh kheu nan, Mose mai Arun deeh hoek ka Pharaw mai nawh ah nin ka kix, "Hu mai yuh kaing krub ka Siyiex pex, viang mawh nan, pui pa sang lih hu khankix mawh pui mawx?" <sup>9</sup> Mose deeh ah nin, "Yix tak lih hu tau mai pui ting pui iak mai kawncau simex kawncau sibun yix mai yung, pex mai tobrie khawmuik. Grawh grawng nawh yix sang yuh pawie ka Siyiex." <sup>10</sup> Khaix an Pharaw ah nin ka kix, "Kieh Siyiex ot tau mai pex, yam kieh aux pex mai khawm kawncau nyawm iak khankix lih hu, yuh satix, pex hoik keud pa caox caig dau rhawm pex." <sup>11</sup> "Ang mawh nan, pex viex pa mawh simex khankix mai lih hu yuh kaing krub ka Siyiex, awm pa hoik koe rhawmrhi

pex ti yuh. "Nawh grheu kix lih hu khaing sivoe ngai tix. <sup>12</sup> Khaix an Siyiex ah nin ka Mose, "Nyeu taix maix ka piang haktiex Ejiptux, sonsang lih sido khankix ka piang haktiex Ejiptux mai ih ribriem pa koe piang tiex pa kawncau deuk khaix pre khawmuik. <sup>13</sup> Mose nyeu khaox grix tix ka piang haktiex Ejiptux mai Siyiex kieh bhaung ting hoek khaing plak toh mai phlu ka piang haktiex khawmuik dau singaix an mai dau sawm an. Yam hoek plak ponngawb, bhaung ting plak toh an viex sido khankix hoek. <sup>14</sup> Sido khankix hoek ka piang haktiex Ejiptux khawmuik mai tum ka piang haktiex mee pa kuang Ejiptux. Sido khankix kied mawh pa langteung, sido awm ankix ang sax lih bawg yam pa hoik luan mai tak ang lai koe khaix in sax. <sup>15</sup> Mawh kheu sido khankix hoik kheem ka piang tiex khawmuik, haktiex hoik faik mai kix ih ribriem kuceu pa koe piang tiex mai plix khaox plix ox pa koe piang khaox, pa hoik deuk khaix pre. Mawh kheu nan canceu pa klai khankix ang lai koe tix dah kawx piang khaox ox dau kaung mai dau haktiex Ejiptux khawmuik. <sup>16</sup> Khaix an Pharaw niied ti kok ka Mose mai Arun ah nin, "Aux hoik lud ka Siyiex pex mai pex. <sup>17</sup> "Mawh kheu nan, yam in yuh buanson pluatploi phimap aux pie bawg in ha! mai khioxkhaow ka Siyiex pex, sonsang deeh teei Nawh Cao krax pa yumbawg in hu khaing aux." <sup>18</sup> Mawh kheu nan, Mose lih khaing Pharaw mai khioxkhaow ka Siyiex. <sup>19</sup> Siyiex deeh veeh bhaung pa ting riang khaing plak klip singaix, sonsang deeh teei sido khankix hu dee singai mai phlu kix hu ka dau rawm sigrit sigra raoh, sido tix mu kawncau ang lai deuk ka dau mee haktiex pa kuang meung Ejiptux. <sup>20</sup> Viang mawh nan, Siyiex deeh kieh Pharaw deeh baow kiien rhawmrhi mai nawh ang kieh kawncau praix pui Isarela khankix lih hu heue.

### *Krax Kha Jao Pa Faik*

<sup>21</sup> Siyiex ah nin ka Mose, "Nyeu taix maix ka plak raoma, sonsang faik praix ka piang haktiex Ejiptux, pa mawh pa faik pa chix pupi ti hu. <sup>22</sup> Mawh kheu nan, Mose nyeu taix tix plak raoma mai pa faik lih koe ka

piang haktiex Ejiptux khawmuik daux loe ngaix.<sup>23</sup> Kix ang chix yaox paox tix tix kaux lai tix kaux maikix ang lai pon kaoh khaing dee ot tix been loe ngaix. Viang mawh nan, kaw praix Isarela khankix pon pa riieng ka daux nyiex ot kix khawmuik.<sup>24</sup> Khaix an Pharaw kok ka Mose ah nin, “Hu mai yuh kaing krub ka Siyiex, prah ngie yung mai pex mai tobrie pex plak khaix awx. Sibun mai kaw nyawm khankix kawx, kieh lih hu tau mai pex.”<sup>25</sup> Viang mawh nan, Mose deeh ah nin, “Maix tak tawx tobrie pa sang tan yix mai kraung tan pa sang gleeing yix sonsang tan yix ka Siyiex yix.”<sup>26</sup> “Tobrie cie yix kawx, tak yaox ti hu tau mai yix, pie gip caong tix mu kawx, tak ang yaox ti prah khaing yix, mawh kheu nan, yix tak viex ankix sonsang krub yix ka Siyiex tix, yix ang nyang tawng ka pa sang krub tix ka Siyiex tom yam hoek yix tan.”<sup>27</sup> Viang mawh nan, Siyiex deeh kieh rhawm rhi Pharaw kiien mai nawh ang cu ti ploi kix hu.<sup>28</sup> Khaix an Pharaw ah nin ka Mose, “Hu dee singai khaing aux. Yuh satix maix mai paw lai hoek yaox ka pakngai aux tix bawg kawx. Grawh grawng nawh, singaix yaox maix pakngai aux maix tak yum kah.”<sup>29</sup> Mose deeh ah nin, “Awm pa ah maix! aux tak ang lai baox yaox ka pakngai maix pie tix bawg kawx heue.”

**11** *Grawng Yum Kawn Ai*  
Siyiex ah nin ka Mose, “Aux tak deeh viex krax kharhawm baox koe tix ceu ka piang Pharaw mai meung Ejiptux. Khaix an nawh tak kieh pex lih hu khaing tin. Yam kieh nawh pex lih hu, nawh tak grheu pex lih khawmuik tix dom neh.”<sup>2</sup> “Krai ka pui khankix, sonsang mhong kix mai kieh simex kukaux mai sibun kukaux mhaing ti cie kraung mau, kraung khri khankix khaing paox plawg tix.”<sup>3</sup> Siyiex kieh pui in khankix pon buanson ka sivoengai pui Ejiptux khankix, lheu khaing an Mose mawh pui pa ting min plakngai ka daux haktiex Ejiptux mai sivoengai kawncau Pharaw mai sivoengai pui khawmuik.<sup>4</sup> Khaix an Mose ah nin, “Mawh kheu Siyiex hoik ah nin, “Yam greung sawm Aux tak lih hu, ka daux sinax pex meung Ejiptux.”<sup>5</sup> Can pa mawh kawncau Ai pa koe daux haktiex Ejiptux tak yum, jah ka kawncau Ai Pharaw, pa ngawm piang dang ngeung mai pa mawh kawncau Ai kawncau

sibun nawh khankix pa ot plak khaix mai kawncau liang tix keh khaing tobrie khawmuik.<sup>6</sup> Khaix an krax yiem riag pa kied ting tak koe ka daux haktiex Ejiptux kudahdee, pa ang sax koe glang ka in dix mai pa ang lai deeh koe khaix sax.<sup>7</sup> Viang mawh nan, Aux tak ang kieh sox tix mu kawx pon ti raoh ka kawncau praix Isarela tix kaux kawx, khawm pui, khawm tobrie, sonsang tawng pex ka pa tang siyox pa yuh Siyiex sinax pui Ejiptux mai pui Isarela khankix.<sup>8</sup> Kawncau maix khankix tak hoek ka aux mai gup ti krub ka aux mai kix tak ah nin, lih hu tau mai pui pa hawt khaix maix. Khaix an Aux tak lih hu.” Nawh lih hu khaing Pharaw ka daux pa kied songrhawm song rhi.<sup>9</sup> Siyiex ah nin ka Mose, “Pharaw tak ang cu nghiet ka maix, sonsang baox nie lih mhai pa dao xam Aux ka daux haktiex Ejiptux.”<sup>10</sup> Mawh kheu nan, Mose mai Arun yuh mhai pa dao xam in khawmuik sivoengai Pharaw mai Siyiex deeh kieh rhawm rhi Pharaw kiien mai nawh ang cu pui Isarela khankix lih hu khaing daux haktiex nawh.

**12** *Grawng Pawie Pasakha*  
Siyiex sikah ka Mose mai Arun ka daux haktiex Ejiptux ah nin,<sup>2</sup> “Khix in tak mawh khix num jah mai mawh khix tix son pex.”<sup>3</sup> “Pax krai ka pui Isarela ah nin, ka daux khix in kao ngaix, pui kukaux tak teei kawncau yung iak son tix, awm pa hoik koe ka daux nyiex keeing nawh, son nyiexma tix lhang kawncau yung iak tix mu.”<sup>4</sup> Phan nyiexma mawx mawh pui tux ang uik ih nex kawncau yung iakan, kieh nawh greem ti ih tau mai paox plawg tix mai simin ding koe pui miex kaux, tawx son pa ih kix tom kub mai nawh tak teei kawncau yung tix mu,<sup>5</sup> kawncau yung an tak mawh pa ang koe dee mat dee pliag mai kieh mawh kawncau yung mhaing pa ang nyang naog tix num. Tak teei khaing yung khankix, phan ang mawh nan khaing pex khankix.<sup>6</sup> Maix tak priex kawncau yung an tom hoek kao pon ngaix ka daux khix in. Pui haohhun Isarela khankix tak pah kawncau yung an plak bo.<sup>7</sup> Kix tak teei nham tix blah mai kraix ka pang khaox siviex khawm ra plak mai ka piang nuk siviex khankix ka nyiex dee ih kix.

<sup>8</sup>Khaix an kix tak ih nex dauw sawm an, kix tak ih nex tong ka ngu tau mai blah, pa ang sau susaix mai tauw mai tauw lhax pa song. <sup>9</sup>Paw doh ih nex im mai nex ngaik. Viang mawh nan, kaing, caong, tawm mai sok rhawm, pex tak pon ti ih khaix hoik tong pex ka ngu. <sup>10</sup>Maix tak ang pon ti deuh nex an tom hoek plak ponngawb mai pa kawn deuk tom ponngawb maix tak gleeing ankix ka ngu. <sup>11</sup>Pex tak ih nawh yuh nin, Nhawt maox rawd nyoï pex, ceep kiep pex mai giex khaox grix pex. Mawh kheu nan, pex tak ih nawh phaiphai, in mawh pawie Pasakha Siyie. <sup>12</sup>Mawh kheu dauw sawm an, Aux tak lih hu ka dauw meung Ejiptux kudahdee mai pah ka pa mawh kawn Ai khankix, dauw haktiex Ejiptux, pui khawm tobrie Ejiptux khankix Aux tak ciyang ka kix. Aux mawh Siyie. <sup>13</sup>Yam in nham tak mawh mhairug son pex, ka dauw nyiex pa ot pex, yam yaox Aux ka nham, Aux tak via khaing pex mai krax kharhawm tak ang lai koe ka piang pex mai sonsang ang pex lauxleeing yam hoek Aux ti pah ka kawn liang haktiex Ejiptux.” <sup>14</sup>“Mawh kheu nan, singaix in tak mawh krax pa dohkeud son pex mai pex tak priex singaix an mawh pawie tix mu son Siyie ka dauw doeh ru pex mai kieh mawh beenli pa caw pex ti yuh leeingju. <sup>15</sup>Pex tak ih blah pa ang sau susaix aliah ngaix, dauw sigaix jah pex tak teei ti tik susaix khaing dauw nyiex tix. Grawh grawng nawh, pui mawx angah pa ih blah pa sau susaix dauw singaix jah, tom hoek dauw aliah singaix, tak yaox ti tik ka pui an khaing ceu pui Isarela. <sup>16</sup>Dauw singaix jah, tak koe krax kraixkhrawm pa singax singeh mai ka dauw singaix aliah kawx, pex tak koe krax kraixkhrawm pa singax singeh, kaing jhaw ceu pa yuh ka mawx kawx, tak ang pon ti yuh dauw singaix an khankix, lheu khaing khre pex pa ih tix kukaux. <sup>17</sup>Mai pex tak yuh pawie ih blah pa ang sau susaix ka dauw singaix an, Aux tak teei krunaing pex lih khaing haktiex Ejiptux, pex tak priex singaix in, dauw baux ju doeh ru pex, mawh beenli pa caw pex ti yuh leeingju. <sup>18</sup>Ka dauw khix jah, kao pon ngaix plakbo, pex tak ih blah pa ang sau susaix tom hoek tixnga tix ngaix dauw khix an plak bo. <sup>19</sup>Glang aliah ngaix an, paw kieh susaix koe dauw nyiex pex awx. Can pui pa ih ka blah pa sau susaix, viang nawh mawh nyosinie mai pui pa

**12:14-20** Lih 23:15; 34:18, Krub 23:6-8, Si 28:17-25, Pi 16:3-8. **12:23** He 11:28. **12:29** Lih 4:22-23.

keh dauw haktiex an kawx, Aux tak teei ti tik nawh khaing cub pui hun Isarela. <sup>20</sup>Pex tak ang yaox ti ih ka ceu pa sau susaix tix ceu kawx, ka dee ot pex, pex tak ih ka blah pa ang sau susaix.” <sup>21</sup>Khaix an Mose kok ka kuad song Isarela khankix ah nin, “Teei kawn yungiak tix mu, pah yam pawie Pasakha son nyiexma mawx nyiexma an.” <sup>22</sup>“Pex tak teei rao tauw im krim tix jhoï mai ce dauw nham pa koe dauw tawg mai awt ka nuk siviex mai pang khaox siviex ra plak ka nham pa koe dauw tawg an. Paw kieh pui tix kaux kawx lih hu ka plak praix nyiex tom hoek ponngawb pasax.” <sup>23</sup>“Grawh grawng nawh, Siyie tak lih hu sonsang pah ka pui Ejiptux khankix mai yam yaox Nawh Cao nham pa koe piang nuk mai piang pang khaox siviex khawm ra plak, Siyie tak luan khaing siviex an mai ang tawx akhuang ka pa yuh lauxleeing an, laig dauw nyiexma pex sonsang pah ka pex.” <sup>24</sup>“Pex tak priex ti yuh ceu in mawh beenli pa caw pex ti yuh son pex mai son kawn simex pex leeingju.” <sup>25</sup>Yam hoek pex ka dauw haktiex pa tawx Siyie ka pex, awm hoik tawx Nawh Cao gumlox sijax mukheu Tix mai pex tak priex ti hawt yuh kaing in.” <sup>26</sup>“Phan kawn praix pex chaw yuh nin, grawh grawng been kaing in, koe dee bleeh yuh ka mawx?” <sup>27</sup>“Pex tak deeh ah nin, “In mawh pawie Pasakha, pa appong ex ti tan ka Siyie, pa hoik lih hu mai luan khaing nyiexma kawn praix pui Isarela dauw meung Ejiptux, yam pah Nawh Cao ka pui Ejiptux khankix mai kieh nyiexma ex khankix lawdluan. “Mawh kheu nan, pui khankix gup kaing tix mai krub ka Siyie. <sup>28</sup>Khaix an kawn praix Isarela lih hu mai yuh awm gumlox pa hoik tawx Siyie ka Mose mai Arun heue.

### ***Krax Kha Jao Yum Kawn Ai***

<sup>29</sup>Yam hoek greung sawm, Siyie pah ka laung kix dauw thawng tiex mai kawn liang tobrie khawmuik. <sup>30</sup>Mawh kheu nan, Pharaw mai kawncaw nawh khankix mai pui Ejiptux khankix kaoh greung sawm mai hoik yiem riagyo sigrien sigre dauw meung Ejiptux. Grawh grawng nawh, nyiexma pa ang koe pui yum ang lai koe tix nyiex kawx heue.

### **Grawng Lih Hu Pui Isarelux**

<sup>31</sup> Khaix an Pharaw kok Mose mai Arun daux ponsawm ah nin, “Kaoh lih hu khaing sinax pui aux khankix, maix khawm kawn praix Isarelux khankix, hu ti yuh kaing krub ka Siyiey awm pa hoik krai pex.” <sup>32</sup> “Tei yung mai pex cie pex, khawm tobrie khankix awm pa hoik krai pex mai lih hu mai nawb buan ka aux nang!” <sup>33</sup> Pui Ejiptux niied ti sigleeig ka ceu pui Isarelux khankix sonsang ploï kix hu khaing haktiex phaiphai mai kix ah nin, “Phan pex ang lih hu, yix tak yum khawmuik.” <sup>34</sup> Pui ankix tei mien blah im, pa ang sau susaix mai kie ti viex tawg kluklao blah ka man mai kix klawm piang klip tix. <sup>35</sup> Kawn praix Isarelux khankix yuh awm lox krai Mose mai kix mhaing kraung mau, kraung khri tix mai kraung ceep tix ka pui Ejiptux khankix. <sup>36</sup> Siyiey tawx pui ankix, mawh pa pon buanson ka sivoë ngai pui Ejiptux khankix, sonsang khrierien kix ti tawx ceu pa mhaing kix. Mawh kheu nan, kix rhim ti tei kraung khrai pui Ejiptux khankix. <sup>37</sup> Khaix an ceu pui Isarelux khankix lih khaing Ramase mai hu ka Sukok. Pui pa lih hu ka caong tix simex nongnong koe liah sien kaux ang nyang sawn kawn nyawm iak mai sibun khankix. <sup>38</sup> Pui haohhun pa mawh pui luk laig daux kix khawmuik kawx, lih hu tau mai kix, khawm yung, pex mai tobrie kix tomnie. <sup>39</sup> Kix viex mien blah im pa ang viex susaix, khaing daux meung Ejiptux. Grawh grawng nawh, kix hoik grheu kix lih hu khaing meung Ejiptux mai kix ang lai pon pau, sonsang sau kix susaix daux blah mai cox khre yuh sin son kix. <sup>40</sup> Ceupui Isarelux khankix ot daux meung Ejiptux hoik koe pon yieh tixngoe num. <sup>41</sup> Yam hoik hoek dee sidah pon yieh tixngoe num ka daux singaix an, can pui krunaing Siyiey khawmuik lih hu khaing meung Ejiptux. <sup>42</sup> Sawm an mawh sawm pa priex kix ti dohkeud ka Siyiey pa tei kix lih khaing meung Ejiptux. In mawh sawm Siyiey, son doeh ru pui Isarelux khawmuik, sonsang priex kix ku ju leeingju heue.

### **Grawng Pawie Pasakha**

<sup>43</sup> Siyiey ah nin ka Mose mai Arun, “In mawh beenli son pawie Pasakha. Pui tang ceu tix kaux kawx tak ang pon ti ih kah.” <sup>44</sup> “Viang mawhnan, cansiliex pa hoikliagka mau

kukaux phan hoik pat hak tix, nawh tak pon ti ih heue.” <sup>45</sup> “Nyosinie mai pui cangcaing tix kaux kawx tak ang pon ti ih.” <sup>46</sup> “Tak pon ti ih ka daux nyiey tix lhang, pex takang pon ti viex nex lih plak praix nyiey mai pex tak ang pon ti kieh si-ang khankix pot.” <sup>47</sup> “Cub pui hun Isarelux khawmuik tak priex beenli pawie an.” <sup>48</sup> “Yam hoek nyosinie tix kaux kaux ti peung tau mai pex, phan nawh simie ti priexrien beenli pawie Pasakha Siyiey, kieh simex khawmuik pat hak tix. Khaix an kieh kix hoek dex mai laig daux pawie. Kix tak lih ti awm pui pa keh daux haktiex an. Can pui pa ang nyang pat hak, tak ang yaox ti ih.” <sup>49</sup> “Beenli pa caw ti hawt yuh, tak koe tix ceu khaing son pui pa keh daux haktiex an mai son nyosinie pa hoek ti peung sinax pex. <sup>50</sup> Ceu pui Isarelux khankix hawt ti yuh awm gumlox tawm Siyiey ka Mose mai Arun. <sup>51</sup> Ka daux singaix an tixdom neh, Siyiey viex krunaing Isarelux khankix lih khaing daux haktiex Ejiptux cub mawx cub an heue.

**13** **Appong Kawn Ai**  
Siyiey ah nin ka Mose, <sup>2</sup> “Appong kawn Ai plix num khankix ka Aux, ka daux ceu pui Isarelux, can pa mawh kawn Ai plix num khawm pui mai tobrie mawh cie Aux heue.”

### **Pawie Blah**

<sup>3</sup> Mose ah nin ka pui khankix, “Dohkeud ka singaix in, pa mawh singaix lih hu pex khaing meung Ejiptux, dee yuh pex kaing siliex. Grawh grawng nawh taix ting riang Siyiey, hoik viex pex lih khaing daux haktiex an, pex tak ang pon ti ih ka blah pa sau susaix.” <sup>4</sup> “Ka daux singaix lih hu pex an mawh daux khix Abibax. <sup>5</sup> Yam viex Siyiey pex hoek ka daux haktiex ceu pui Khanan mai ceu pui Hittix, ceu pui Amawrix, ceu pui Hiwix, ceu pui Yebusix, pa hoik tiextu Nawh Cao ka keeing pex khankix, sonsang tawx ka pex. Haktiex an mawh haktiex dee lih rawm teeih mai rawm hia mai pex tak yaox ti priex been kaing in daux khix in.” <sup>6</sup> “Daux aliah singaix, pex tak ih ka blah pa ang koe susaix mai yam hoek daux singaix aliah, pex tak yuh pawie son Siyiey.” <sup>7</sup> “Blah pa ang koe susaix tak pon ti ih daux aliah singaix, blah pa sau susaix, takang pon koe

sinax pex mai susaix khankix kawx tak ang pon kieh koe dee ot pex khawmuik.”<sup>8</sup> “Ka daux singaix an maix tak krai ka kawn praix maix ah nin, “Kheu inkix hoik mawh pa yuh Siyiex son aux, yam lih hoek aux khaing meung Ejiptux.”<sup>9</sup> In tak mawh mhairug ka daux tawm taix maix mai son krax dohkeud ka kaingre maix, kieh gumlox beenli Siyiex koe daux jheeh pex. Mawh kheu taix pa ting riang Siyiex hoik viex pex lih khaing meung Ejiptux.”<sup>10</sup> Mawh kheu nan, pex tak priex ka gumlox beenli in, daux bawgyam ankix ku num heue.”

#### **Tan Kawn Ai Plix Num**

<sup>11</sup> Yam viex Siyiex maix laig daux haktiex ceu pui Khanan, awm gumlox pa hoik tiextu Nawh Cao ka maix mai keeing maix mai tawx haktiex inkix ka maix.<sup>12</sup> Maix tak deuh kawn Ai plix num mai can kawn tobrie pa liang tix keh mawh son Siyiex. Can pa mawh mhaing khankix tak mawh cie Siyiex.”<sup>13</sup> “Can kawn la iak pa liang ti keh sivoe ku mu, maix tak deeh taoh nawh ka kawn yung iak tix mu. Phan ang rhawm taoh, pex tak raig ngawg kawn la an maix tak deeh taoh ka kawn Ai pa liang ti keh khawmuik.”<sup>14</sup> “Yam mhaing kawn simex maix grawng inkix daux bawgyam pa sang hoek sax, nawh tak ah nin, “Dee bleeh in mawh patix lie?” Maix tak deeh ah nin ka nawh, “Mawh kheu taix pa ting riang Siyiex, hoik viex ex lih khaing meung Ejiptux, dee yuh ex siliex.”<sup>15</sup> Yam an Pharaw ang kieh ex lih hu, Siyiex pah ka kawn Ai pa koe daux haktiex Ejiptux, khawm kawn Ai pui mai kawn liang tobrie khankix. Mawh kheu nan, aux tak appong ti tan ka can kawn pa liang ti keh khaing tobrie khawmuik ka Siyiex. Viang mawh nan, kawn simex aux khankix pa mawh kawn Ai khawmuik, aux tak deeh taoh kah.”<sup>16</sup> “Inkix tak mawh mhairug ka daux tawm taix maix mai mawh mhai ka kaingre maix. Grawh grawng nawh, Siyiex hoik viex ex lih khaing daux meung Ejiptux, ka taix pa ting riang Nawh heue.”

#### **Hu Daux Tiag**

<sup>17</sup> Yam kieh Pharaw pui khankix lih hu, viang krax plak haktiex Philitix dex kawx, Siyiex ang thong kix hu, mawh kheu Siyiex ah nin, “Pui inkix tak deeh tieh rhawm tix, yam yaox kix ka

naing mai deeh veeh ti ing ka haktiex Ejiptux.”<sup>18</sup> Mawh kheu nan, Siyiex thong pui inkix hu krax daux tiag, baoh vung viang rawm sigrit sigra Edom. Ceu pui Isarelix khankix lih hu cub mawx cub an, khaing haktiex Ejiptux mai khawm kraung naing pa koe kix.<sup>19</sup> Mose tee ti viex si-ang Yosiep hu tau mai tix. Mawh kheu hoik deuh nawh gumlox pa tiextu ka ceu pui Isarelix khankix ah nin, “Siyiex tak hoek ti kiangien ka pex tete mai pex tak deeh viex si-ang aux hu khaing tin tau mai pex.”<sup>20</sup> Mawh kheu nan, kix hu khaing Sukok mai bang ti ot ka daux veng Etham, pa koe hawt daog daux tiag tan.”<sup>21</sup> Siyiex hu sivoe kix, yam pongaix Nawh Cao thong kix hu daux krax ka rong paiawm mai yam hoek ponsawm, Nawh Cao thong kix hu daux krax ka rong ngu, sonsang jhan pa riieng ka kix. Mawh kheu nan, kix yaox ti hu plak pongaix mai plak ponsawm, ku ngaix ku sawm heue.”<sup>22</sup> Nawh Cao ang tee rong paiawm an plak pongaix mai rong ngu an plak ponsawm khaing sivoe kix heue.

#### **14 Tiang Rawm Sigrit Sigra**

Simiang Siyiex ah nin ka Mose,<sup>2</sup> “Krai ka ceu pui Isarelix khankix mai kieh kix bang ti ot sivoe veng Pihahiro, sinax veng Mizadaw mai rawm sigrit sigra pa see veng Balazephon, kix tak bang ti ot sivoe an hawt praok rawm sigrit sigra.”<sup>3</sup> “Pharaw tak ah nin ka grawng ceu pui Isarelix khankix, kix hoik hoek dee sikhawp haktiex mai hoik vuvie ti tan, kheu krax daux tiag hoik nyeep ka kix.”<sup>4</sup> “Aux tak kieh rhawm Pharaw kien mai nawh tak hawt khaix pex mai Aux tak pon min plakngai ka piang Pharaw mai ka piang krungaing nawh khawmuik, sonsang tawng pui Ejiptux khankix mawh Aux Siyiex mai kix yuh awm an.”<sup>5</sup> Kheu koe pui krai simiang Ejiptux mhong grawng hoik to tua pui khankix, Pharaw mai kawncaw nawh khawmuik deeh tieh rhawm ka piang pui ankix mai ah nin, “Ex hoik yuh ceu inkix mai ex hoik kieh pui Isarelix khankix lih hu khaing pa yuh siliex son ex yuh ka mawx?”<sup>6</sup> Pharaw khre linglawx naing tix mai tee pui naing khankix hu tau mai tix.”<sup>7</sup> Nawh tee linglawx naing, pa laug tix liah yieh lhang

mai can linglawx naing meung Ejiptux khankix tau mai cao kaing naing pa brug linglawx ku lhang. <sup>8</sup>Simiang Siyiex kieh rhawm Pharaw meung Ejiptux kiien, nawh tom hawt khaix ceu pui Isarelix khankix, mawh kheu ceu pui Isarelix khankix lih hu tau mai krax pa vaorhawm tix. <sup>9</sup>Pui Ejiptux khankix hawt khaix kix tau mai linglawx naing Pharaw mai pui naing brung mai krunaing nawh khawmuik krup kix ka dee bang kix ti ot hawt rawm sigrit sigra, ka veng Pihahirot pa see veng Palazephong. <sup>10</sup>Yam dex hoek Pharaw, ceu pui Isarelix khankix yaog tix jhak mai yaox pui Ejiptux khankix hawt khaix kix. Mawh kheu nan, kix kied koe krax lhat graung mai ceu pui Isarelix khankix riagyo ka Simiang Siyiex. <sup>11</sup>Kix ah nin ka Mose, "Mawh ang simeeig lai koe daux meung Ejiptux maix hoik teei yix hu dee singai, sonsang yum yix daux tiag lie? Maix hoik yuh ceu inkix ka yix mai viex yix lih khaing meung Ejiptux yuh ka mawx lie?" <sup>12</sup>In mawh lox pa dawg kraik yix ka maix daux meung Ejiptux ang mawh lie? Kieh yix tang ot, grham yix yuh kaing pui Ejiptux. Mawh kheu pa yuh yix kaing pui Ejiptux nielheu mhawm khaing yum yix daux tiag. <sup>13</sup>Mose ah nin ka pui khankix, "Paw lhat graung, cung ka daux krax pa nhim rhawm mai pau ti jhak ka krax taoh pa yuh Simiang Siyiex son pex daux in singaix. Grawh grawng nawh, pui Ejiptux pa yaox pex daux in singaix, pex tak ang lai baox yaox kix tix bawg kawx heue." <sup>14</sup>"Simiang Siyiex tak puing naing son pex, pex paw nye, ot yiien mhawm mhawm." <sup>15</sup>Simiang Siyiex ah nin ka Mose, "Maix riagyo ka Aux yuh ka mawx? Kraik ka ceu pui Isarelix khankix hu plak sivoie ngai. <sup>16</sup>Yaog khaox grix maix mai nyeu taix maix ka piang rawm sigrit sigra mai goih rawm ra plak, ceu pui Isarelix khankix tak yaox ti hu piang dee kroh tiex daux sigreung rawm sigrit sigra. <sup>17</sup>Aux tak kieh rhawm pui Ejiptux khankix kiien mai kix tak hawt khaix pex, Aux tak pon min plakngai ka piang Pharaw mai ka piang krunaing nawh khawmuik, khawm linglawx naing nawh, pui naing brung nawh. <sup>18</sup>Khaix an, pui Ejiptux khankix tak tawng mawh Aux Simiang Siyiex, yam hoik pon Aux min plakngai ka piang Pharaw mai piang linglawx naing nawh mai piang pui naing brung nawh

khawmuik." <sup>19</sup>Kawncau Siyiex pa hu sivoie dee bang pui Isarelix, deeh gah ti hoek ka plak khaix kix mai rong paiawm pa hu sivoie kix, deeh cung ka plak khaix kix. <sup>20</sup>Hoik hoek daux sinax dee bang pui Ejiptux khankix mai dee bang pui Isarelix, rong paiawm an tawx pa faik ka plak pui Ejiptux mai tawx pa rieng ka pui Isarelix, son ang khawm ra plak lai pon hoek dex paox tix leeingsawm. <sup>21</sup>Mose nyeu khaox grix tix lih ka piang rawm sigrit sigra mai Simiang Siyiex kieh rawm sigrit sigra deeh plak khaix ka bhaung ting pa kaoh khaing plak toh leeingsawm mai rawm sigrit sigra lih mawh tiex kroh mai rawm khankix goih ti hu khaing paox tix ra plak. <sup>22</sup>Ceu pui Isarelix khankix, lih hu ka daux sigreung rawm sigrit sigra, ka piang tiex kroh mai rawm awm guh ding son kix plak dawm mai plak goix kix. <sup>23</sup>Pui Ejiptux khankix hawt pheet kix daux sigreung rawm sigrit sigra tau mai brung Pharaw linglawx naing nawh mai pui naing brung nawh khawmuik. <sup>24</sup>Yam hoek plak ponngawb, Siyiex jhak ti yaox ka piang krunaing pui Ejiptux khankix, ka rong ngu paiawm mai Nawh Cao tawx krax sivix ka pui naing Ejiptux khankix. <sup>25</sup>Nawh Cao teei ti tik jaong linglawx naing kix, sonsang nu kix ti hawh, pui Ejiptux khankix ah nin, "Kieh ex to khaing pakngai ceu pui Isarelix khankix! mawh kheu Simiang Siyiex hoik puing ka ex son kix, <sup>26</sup>Siyiex ah nin ka Mose, "Nyeu khaox grix maix piang rawm sigrit sigra, sonsang deeh kleuk rawm ka piang pui Ejiptux, ka piang linglawx naing mai ka piang pui naing brung khawmuik." <sup>27</sup>Mose nyeu khaox grix tix ka piang rawm sigrit sigra mai yam hoek plak ponngawb, rawm sigrit sigra khankix deeh kleuk paox tix mai naog awm diag prim. Yam sang to pui Ejiptux khaing daux rawm, Siyiex kheem pui Ejiptux daux sigreung rawm sigrit sigra. <sup>28</sup>Rawm deeh hoek mai kheem ka linglawx naing pui naing brung mai krunaing Pharaw khawmuik, pa laig hawt khaix pui Isarelix ka daux rawm sigrit sigra, kix ang lai deuk pie tix kaux kawx. <sup>29</sup>Pui Isarelix khankix yaox ti hu ka piang tiex kroh daux sigreung rawm sigrit sigra mai rawm hoik mawh guh ding ka plak dawm

mai plak goix kix. <sup>30</sup> Ka daux singaix an Siyiex hoik taoh ka pui Isarela khankix khaing daux tawm taix pui Ejiptux mai pui Isarela hoik yaox ka to kaux yum pui Ejiptux hawt praok rawm sigrit sigra. <sup>31</sup> Pui Isarela khankix hoik yaox ka kaing ceu pa ting, pa hoik yuh Siyiex ka pui Ejiptux, pui khankix tom lhat graung ka Siyiex mai yumrhawm ka Siyiex mai kawncaw Nawh Mose heue.

**15**

***Lairhax Mose***

Yam an, Mose mai pui Isarela khankix rhax lairhax ka Siyiex yuh nin, “Aux tak rhax lox rhax ka Siyiex, mawh kheu hoik pex Nawh Cao ka daux pa ting min plakngai, brung mai pui pa brug brung khankix, Nawh Cao hoik tik daux rawm sigrit sigra. <sup>2</sup> Siyiex mawh riang rao aux mai lairhax auh, Nawh hoik mawh krax taoh son aux, kheu Nawh mawh Siyiex keeing aux mai aux tak yaog yaw Nawh ting. <sup>3</sup> Siyiex mawh pui naing, ceukaux Nawh mawh Simiang Siyiex. <sup>4</sup> Nawh Cao hoik tik linglawx naing Pharaw mai kranaing nawh daux rawm sigrit sigra, cao kaing naing pa hoik laug nawh kawx, hoik simam daux rawm sigrit sigra raoh. <sup>5</sup> Rawm hoik kheem ka kix, kix hoik com awm lon simaox greem rawm. <sup>6</sup> Simiang Siyiex eue, taix khawn dawm Maix hoik mawh pa koe min plakngai ka daux sibrawm, Simiang Siyiex eue, taix khawn dawm Maix hoik dheem pui pa koeng tom phawng. <sup>7</sup> Maix Cao hoik mawh pa kied ting sibrawm, Maix Cao hoik pex ka pui ankix pa tiehfen ka Maix, Maix hoik ploi krax songrhawm Tix hu awm ngu mai gleeing kix lauxleeng awm nyhee. <sup>8</sup> Bhawm pa lih khaing daux meeh Maix mai rawm khankix khrawm paox tix tau, rawm khankix jung rahsee awm ton gawng mai dee raux rawm hoik kiien ka daux rawm sigrit sigra heue.” <sup>9</sup> Pui koeng ah nin, aux tak hawt pheet kix, aux tak krup ka kix, aux tak goih kraung pa tudrhim, krax koe rhawm aux, tak fah ka piang kix. Aux tak tee lawm vaid tix lih, taix aux tak yuh kix lauxleeing.” <sup>10</sup> “Maix Cao kieh bhaung ting phlu rawm sigrit sigra hoik kheem ka kix, kix com greem rawm awm sivun ka daux rawm pa ting riang. <sup>11</sup> Simiang Siyiex eue, ka daux siyiex tang ceu mawh mawx pa awm Maix lie? Mawh mawx pa kied singax singeh pa kied ting min

plakngai mai koe krax lhat graung daux pa yaogyawkah, yuh pa daoxam khankixuik. <sup>12</sup> Maix nyeu taix khawn dawm tix lih, haktiex hoik bleet ka kix. <sup>13</sup> Daux krax cauxrhawm Maix, thong pui pa hoik taoh Maix khankix hu ka riang rao Maix ka dee ot pa singax Maix.” <sup>14</sup> “Pui tak mhong mai lhat graung kah, krax lauxrhawm tak hoek ka piang dee ot pui Philitix. <sup>15</sup> Yam an cao kaing pui Edom khankix hoik yaohyee, pui Mawbax pa ting riang rao, krax lhat graung hoik giex kix, pui pa ot Khanan khawmuik hoik siyaung sikua hu. <sup>16</sup> Krax lhat mai krax yaoh hoek piang kix, kheu plawng taix pa ting sibrawm Maix, kix hoik kaog awm simaox, tom yam hoik luan pui khankix. Simiang Siyiex eue, yam hoik luan pui pa hoik laug Maix khankix, <sup>17</sup> Maix tak viex kix laig mai sum kix ot ka daux gawng sinngao Maix ka dee an, Simiang Siyiex eue, mawh dee pa hoik yuh Maix son dee ot Maix Cao. Simiang Siyiex eue, mawh dee singax singeh pa hoik phan hoik yuh Maix ka taix Tix. <sup>18</sup> Siyiex tak kuang leeingju leeingphan.” <sup>19</sup> Mawh kheu brung Pharaw mai linglawx naing nawh mai pui naing brung nawh, laig ka daux rawm sigrit sigra mai Siyiex deeh kieh rawm sigrit sigra kheem ka piang kix. Viang mawh nan, ceu pui Isarela khankix, hu ka piang tiex kroh dauxsigreung rawm sigrit sigra heue.

***Lairhax Meriam***

<sup>20</sup> Puxke sibun Arun pa mawh Meriam, sibun cao jhai giex kraung tah daux taix tix mai can sibun khawmuik lih hu hawt khaix nawh, tau mai tah kraung tah mai graoh heue. <sup>21</sup> Meriam kawx “Rhax lai ka Simiang Siyiex mawh kheu hoik pex Nawh Cao ka daux krax pa koe min plakngai, brung mai cao pa brug brung khankix, Nawh Cao hoik tik daux rawm sigrit sigra!”

***Yuh Rawm Song Deeh Tie***

<sup>22</sup> Mose viex pui Isarela hu khaing rawm sigrit sigra raoh. Khaix an, kix lih hu ka daux tiag Shurax loe ngaix, ka daux tiag an ang yaox rawm ceeix kawx. <sup>23</sup> Yam hoek kix ka Mara, kix ang pon nyaux ka rawm pa koe daux Mara khankix, mawh kheu song rawm an, mawh kheu nan, ceukaux dee an, tak kok mawh Mara tom in singaix.

<sup>24</sup> Pui khankix deeh baox ngia tan ah nin ka Mose, "Ex sang nyaux patix lie?" <sup>25</sup> Mawh kheu nan, nawh riagyo ka Simiang Siyiex mai Simiang Siyiex jhi nawh yaox khaox tix gaw. Yam tik nawh khaox an ka dauw rawm, rawm deeh tie kah, Nawh Cao yuh gumlox beenli son kix mai Nawh Cao cheuk ti yaox kix tan heue. <sup>26</sup> Nawh ah nin "Phan pex cu nghiet ka lox Simiang Siyiex pex mai yuh pa rahsee sivoe ngai Nawh Cao mai daong yhaok tix ka gumlox pingnyap Nawh khankix mai hawt gumlox beenli Nawh, Aux tak ang lai deuh jhawm saux ka piang pex tix ceu kawx, awm pa hoik viex Aux hoek ka piang pui Ejiptux. Mawh kheu Aux mawh Simiang Siyiex Cao pai jhawm saux. <sup>27</sup> Kix hoek ka Elem dee koe rawm dauw, kao ra mu mai khaox jhie yaong atixgliah gaw mai kix peung tan hawt rawm heue.

### **16 Blah Mannax Mai Keed**

Cub pui hun pui Isarelaux khankix lih hu khaing baoh Elem mai hoek ka dauw tiag Sin, pa koe sinax Elem mai gawng Sina, ka dauw khix ra kao phuan ngaix, khaix hoik lih kix khaing haktiex Ejiptux. <sup>2</sup> Cup pui hun pui Isarelaux khankix, ngia ka Mose mai Arun kheu krax kharhawm tix dauw tiag, <sup>3</sup> Pui Isarelaux khankix ah nin ka kiex, "Phan exyum ka dauw taix Simiang Siyiex, dauw haktiex Ejiptux, yam ngawm ex mai aw nex mai sak vaig tix ka priex nielheu mhawm mai maix lai hoik viex yix hoek ka dauw tiag, sonsang yum cub pui hun ka pa cai rhawm tix heue." <sup>4</sup> Simiang Siyiex ah nin ka Mose, "Aux tak kieh lhiex blah lih khaing raoma son pex mai pui khankix tak khrawm tom kub son tix ku ngaix, Aux tak cheuk ti yaox kix, sonsang tawng Aux kix hawt ang hawt ka gumlox Aux." <sup>5</sup> "Yam hoek singaix liah, kix tak khrieren ti khrawm lheu khaing ku singaix ra son." <sup>6</sup> Mawh kheu nan, Mose mai Arun ah nin ka kawn praix Isarelaux khankix, "Dauw bo in, pex tak tawng ka mawh Siyiex pa viex pex lih khaing haktiex Ejiptux, <sup>7</sup> plak ponngawb, pex tak yaox min plakngai Siyiex mawh kheu hoik mhong Nawh Cao lox ngia pex, mawh kheu mawh yiex pui yuh ka mawx pex lai deuh phimap ka yiex lie?" <sup>8</sup> Mose deeh ah nin, "Yam tawx Siyiex pex ih nex tom kub plakbo mai blah plak ponngawb, gumlox in tak grumnaog, mawh kheu Siyiex hoik mhong lox pa ngia tiehfeen pex

ka Nawh Cao, "Mawh ex pui yuh ka mawx? lox pa ngia tiehfeen pex ang mawh ngia tiehfeen kayiex, mawh pa ngia tiehfeen ka Siyiex heue. <sup>9</sup> Mose ah nin ka Arun, "Krai ah nin ka cub pui Isarelaux khankix, hoek dex ka Siyiex. Mawh kheu hoik mhong Nawh Cao lox pa ngia pex, " <sup>10</sup> Yam sikah Arun ka cub pui hun Isarelaux khankix, kix simi ti jhak ka dauw tiag. Kix yaox min plakngai Siyiex jhan lih khaing dauw paiawm." <sup>11</sup> Siyiex ah nin ka Mose, <sup>12</sup> "Aux hoik mhong lox pa ngia pui Isarelaux khankix, krai kix mhong, pex tak yaox ti ih nex plak ponbo mai pex tak yaox ti ih blah plak ponngawb maipex tak tawng ka mawh Aux Siyiex pex." <sup>13</sup> Plak ponbo keed khankix lih hoek naog hawt dee bang kix ti ot, plak ponngawb rawm ciex lih hawt rawb vungviang dee bang kix ti ot, <sup>14</sup> Khaix hoik deeh haok rawm ciex, ceu pa awm mu rawm rha khlawp pa lawmle iak koe ka piang tiex ka dauw tiag tan. <sup>15</sup> Yam yaox kawn praix Isarelaux ka an, kix ah nin ka paox tix tix kaux lai tix kaux, "In mawh patix lie? mawh kheu ang kix tawng ka mawh an patix. Mose ah nin ka kix, "In mawh blah pa hoik tawx Simiang Siyiex, sonsang ih pex." <sup>16</sup> "Simiang Siyiex tawm lox ah nin, kieh pui kukaux khrawm son tom kub ih tix, tix kaux tix awmie, awm diag koe jung pui pa ot dauw nyiex gox khankix." <sup>17</sup> Pui Isarelaux khankix yuh awm pa ah nawh, pui nie khrawm hawt nie tix mai pui tux khrawm hawt tux tix heue. <sup>18</sup> Yam tong kix ti yaox ka khrawng awmie, pui pa khrawm tomnie ang lai lheu mai pui pa khrawm iak ang lai cud, pui kukaux hoik khrawm awm pa kub ih kaux mawx kaux an heue. <sup>19</sup> Mose ah nin, "Paw kieh pui tix kaux kawx deuh tom hoek ponngawb." <sup>20</sup> Kix ang nghiet ka lox Mose, pui tix blah kawn deuh tom hoek plak ponngawb mai lih mawh graik mai sioe cux. Mose songrhawm ka kix, <sup>21</sup> kix khrawm an ku ngawb, son pui kukaux, son pa kub ih kaux mawx kaux an, viang mawh nan, yam hax koek an lih ti mawh rawm. <sup>22</sup> Yam hoek singaix liah, kix khrawm blah ra son, tix kaux pui ra awmie, cao kuang cub pui hun Isarelaux hoek ti krai ka Mose,

<sup>23</sup> Nawh ah nin ka kix, “In mawh pa hoik tawm Siyiex, pasax mawh singaix tuah mai mawh singaix laux mai singaix pa singax singeh ka Siyiex, ngaong ti deuh awm pa sang ngaong pex mai tung ti deuh awm pa sang tung pex son singaix tuah, deuh pa kawm deuk ka son pex tom hoek ponngawb.” <sup>24</sup> Kix deuh an tom hoek plak ponngawb, awm lox ah Mose mai an ang lai sioe mai ang koe graik, <sup>25</sup> Mose ah nin, “Ih pa deuk in daux singaix, mawh kheu mawh singaix tuah cie Siyiex, in singaix maix tak ang yaox ceu in daux kaung, <sup>26</sup> “Pex tak khrawm nawh daux liah singaix, viang mawh nan, ka daux singaix aliah, mawh singaix tuah, tak ang lai koe mai ang lai yaox.” <sup>27</sup> Pui tixblah lih hu ka daux singaix aliah, sonsang khrawm tix kah, kix ang yaox tix ceu kawx. <sup>28</sup> Simiang Siyiex ah nin ka Mose, “Pex kawm sang thiang ka lox tawm pingnyap Aux mai lox tat jhawm prawng Aux miexgrheeng lie? <sup>29</sup> Jhak heue, Siyiex tawx singaix tuah ka pex, yam hoek liah singaix Nawh Cao tawx blah son rangaix, kieh pui kukaux ot dee ot tix, paw kieh pui lih hu khaing dee ot tix tix kaux kawx, ka daux singaix aliah. <sup>30</sup> Mawh kheu nan, pui khankix lauxlee tix daux singaix aliah. <sup>31</sup> Nyiexma pui Isarelix khankix kok ceukaux blah an mawh manna, an paing awm simie taux ki, awm jhawm blah kluklao tix mai rawm hia. <sup>32</sup> Mose ah nin, “In mawh lox tawm Siyiex, teei ti deuh manna tix awmie, sonsang deuh pex ru ti yaox tix ju hoik tix ju mai kix tak yaox blah pa eei Aux pex ka daux tiag, yam viex Aux pex lih khaing haktiex Ejiptux.” <sup>33</sup> Mose ah nin ka Arun, “Teei ang tix mu mai sau blah manna tix awmie ka daux an mai deuh sivoe Siyiex sonsang priex pex an daux ru tix tix ju hoik tix ju.” <sup>34</sup> Awm gumlox pa hoik tawx Siyiex ka Mose, Arun deuh an sivoe ceu pa kham mhairug mai priex kah. <sup>35</sup> Pui Isarelix khankix hoik ih manna tixpon num, tom hoek kix ka haktiex dee ot tix mai kix ih manna tom hoek kix ka mee haktiex Khanan. <sup>36</sup> tix awmie koe kao son tix son epha heue.

## **17** *Rawm Khaing DauX Rang*

Cub pui hun Isarelix lih khaing daux tiag baoh haktiex Sin awm gumlox pa hoik tawm

**16:23** Lih 20:8-11. **16:31** Si 11:7-8. **16:33** He 9:4. **16:35** Yaw 5:12. **17:1-7** Si 20:2-13. **17:3** Lih 14.12, 16.3. **17:14** Pi 25:17-19; 1Sa 15:2-9.

Siyiex, kix hu bang ti ot ka daux Rephidim, dee an rawm ang koe sonsang nyaux pui kah. <sup>2</sup> Pui khankix simah ka Mose ah nin, “Tawx yix nyaux rawm,” mai Mose ah nin ka kix, “Pex lai simah mai aux yuh ka mawx? Pex lai cheukcheu ka Siyiex yuh ka mawx?” <sup>3</sup> Pui khankix kied sang nyaux nie rawm mai ngia simah ka Mose ah nin, “Maix lai viex yix lih khaing Ejiptux, sonsang pah yix mai kawm praix yix mai tobrie yix tau ka daux pa simie ti nyaux nie rawm yuh ka mawx?” <sup>4</sup> Mose riagyo ka Siyiex, “Aux sang yuh ka mawx ka pui inkix? Kix dex sang dheem aux ka simaox.” <sup>5</sup> Siyiex ah nin ka Mose, “Lih hu sivoe pui khankix mai kok kuad song pui Isarelix mai viex khaox grix pa koe daux taix maix pa hoik lah maix rawm klawng Nilax kah mai lih hu. <sup>6</sup> Aux tak cung plak sivoe maix tan, ka piang rang baoh Hawrap, maix tak lah ka rang an mai rawm tak lih khaing daux an, sonsang pon nyaux pui heue. “Mose yuh awm an sivoe ngai kuad song pui Isarelix khankix. <sup>7</sup> Nawh kok ceukaux dee an mawh Masa mai Meribax, mawh kheu pui Isarelix khankix simah mai cheukcheu ka Siyiex ah nin, “Ot Siyiex sinax yix lie? Phan ang mawh nan ang ot lie?”

### *Pex Ka Pui Amaliet*

<sup>8</sup> Pui Amaliet hoek mai puing ka pui Isarelix ka baoh Rephidim. <sup>9</sup> Mose ah nin ka Yawsux, “Laug pui khankix ka son ex mai hu puing ka pui Amaliet, pasax aux tak cung ka piang choek gawng tau mai khaox grix Siyiex ka daux taix tix.” <sup>10</sup> Yawsux yuh awm pa ah Mose mai puing ka pui Amaliet, Mose, Arun mai Hurax haok ka piang choek gawng. <sup>11</sup> Yam yaog Mose taix tix, pui Isarelix pex kah mai yam nyah nawh taix tix, pui Amaliet pex kah. <sup>12</sup> Mawh kheu hoik meue taix Mose, kix tom teei simaox tix mu mai deuh ka greem nawh mai nawh ngawm ka piang an. Arun mai Hurax joh taix nawh tix plak tix kaux tom klip singaix. <sup>13</sup> Yawsux pah ka simiang Amaliet mai pui nawh khankix yum ka lawm vaid. <sup>14</sup> Siyiex ah nin ka Mose, “Tiem ti deuh in ka daux phuk lai, sonsang mawh pa dohkeud kah mai phat Yawsux mhong, Aux tak preet ti tik ceukaux pui Amaliet

khaing greem raoma.”<sup>15</sup> Mose sum khu dee tan mai kok ceukaux mawh Yahowanitsi, dee blee mawh Siyiex Cao pa pex.<sup>16</sup> Taix Siyiex Cao pa pex ah nin, “Siyiex tak yuh naing ka pui Amaliet tix ju hoik tix ju heue.”

### **18** *Krax Keud Pa Tawx Yesaraw*

Yesaraw cao giex kaing li Midian, pa mawh paox Mose, hoik mhong ka can pa yuh Siyiex ka Mose mai son pui nawh Isarela, grawng pa viex Siyiex pui Isarela lih khaing Ejiptux.<sup>2</sup> Khaix an Paox Mose pa mawh Yesaraw viex moeng Mose, Zibawrax pa hoik ploinawh ing<sup>3</sup> tau mai kawn simex nawh ra kaux, ceukaux tix kaux mawh Gerashom, mawh kheu nawh ah nin, “Aux hoik sax mawh nyosinie dauh haktiex tangdah.”<sup>4</sup> Ceukaux an tix kaux mawh Eliaza. Mawh kheu nawh ah nin, “Siyiex keeing aux, mawh pa teem aux mai kieh aux lawduan khaing lawm void Pharaw.”<sup>5</sup> Paox Mose pa mawh Yesaraw viex moeng Mose mai kawn simex nawh ra kaux hoek tau ka Mose dauh tiag, dee bang nawh ka gawng Siyiex.<sup>6</sup> Yam an, pui tix kaux hoek ah nin ka Mose, “Paox maix Yesaraw hoek tau mai moeng maix, khawm kawn simex maix ra kaux.”<sup>7</sup> Mose lih plak praix mai rieb ka paox tix mai nawh ngeuh kaing tix mai ngheet ka nawh mai kiex chawm grawng krax nyawm ot paox tix tix kaux hoik tix kaux mai laig dauh nyiex gox man.<sup>8</sup> Mose krai paox tix Yesaraw mhong grawng pa hoik yuh Simiang Siyiex, ka Pharaw mai ka pui Ejiptux khankix mai ceu pa yaox pui Isarela pa nu pa ciien dauh krax dauh laux mai grawng pa hoik kieh Siyiex kix lawduan.<sup>9</sup> Yesaraw gauxrhawm, son krax pa mhawm pa yuh Siyiex khawmuik ka pui Isarela khankix pa hoik taoh Nawh Cao kix khaing dauh tawm taix pui Ejiptux.<sup>10</sup> Yesaraw ah nin, “Kieh Siyiex koe buanson, pa taoh maix luan khaing dauh taix pui Ejiptux mai khaing taix Pharaw mai pa taoh pui khankix luan khaing taix pui Ejiptux.”<sup>11</sup> “Aux hoik tawng Simiang Siyiex mawh pa ting khaing siyiex tang kaux mai pexkapui patingrhawm canyhaukapiang pui Isarela khankix.”<sup>12</sup> Paox Mose Yesaraw yuh krax tan pa gleeing mai tan ka Siyiex, Arun mai kuad song pui Isarela khankix hoek sonsang ih priex tau mai paox Mose sivoie Siyiex.

### *Bawg Yam Prawng Ca (Pi 1:9-18)*

<sup>13</sup> Daux singaix pasax, Mose ngawm sonsang prawng ca ka pui khankix mai pui khankix cung sivoie Mose, jah ponggawb tom hoek ponbo.<sup>14</sup> Yam yaox paox Mose ka ceu pa yuh nawh ka pui khawmuik, nawh ah nin, pa yuh maix ka pui in khankix mawh ceu pa yuh ka mawx? maix lai ngawm ti prawng ca nong nong mai kieh pui cung plak sivoie tix, jah ponggawb tom hoek ponbo yuh ka mawx?<sup>15</sup> Mose ah nin ka paox tix, “Mawh kheu pui khankix hoek ka aux, sonsang chawm kix ka Siyiex,<sup>16</sup> Yam simah kix mai paox tix, kix hoek ka aux mai aux prawng see sinax kix mai aux kieh kix tawng ka beenli Siyiex mai lox tat jhawm prawng Nawh Cao khankix.”<sup>17</sup> Paox Mose deeh ah nin ka nawh, “Ceu pa yuh maix in, ang mawh pa khaw.”<sup>18</sup> “Maix mai pui pa ot tau mai maix, tak awn riang rao, mawh kheu beeh glawm in mawh pa ciien son maix, maix ang doh pon yuh nongnong.<sup>19</sup> Nghiet ka lox aux yam in, aux tak tawx rhawm keud dong sawn ka maix mai Siyiex tak ot tau mai maix, maix tak mawh pa yuh kaing khankix sivoie Siyiex mai viex grawng khankix hoek ka Siyiex<sup>20</sup> mai maix tak gau kix ka lox lai beenli mai lox tat jhawm prawng Siyiex mai kieh kix tawng krax pa sang lawng kix mai kaing pa khaw kix ti yuh.<sup>21</sup> Lheu khaing an laug pui pa sang pon yuh kaing khaing pui in khawmuik, pui pa lhat graung ka Siyiex, pui pa kaux sijax mai pui pa koeng ka sinngao pa ang rahsee mai yaog cao pa kuang ka piang kix, pa kuang ka piang cub tix rheng, ka piang cub tix yieh, ka piang cub tix phuan mai ka piang cub kao kaux.<sup>22</sup> Kieh kix tang prawng ca ka pui ku bawg yam. See pa ting ceu khankix kix tak viex hoek ka maix, phan mawh see pa iak kuceu, kieh kix tang prawng, mawh kheu nan, kix rom ti klawm beeh glawm mai maix, an tak mawh pa chaong son maix.<sup>23</sup> Phan maix yuh ceu in, awm lox pa tawm Siyiex ka maix, maix tak pex mai kaing tak kauxcong mai pui khawmuik tak hu ka dee ot tix ka dauh pa nim.”<sup>24</sup> Mose nghiet ka lox paox tix

mai yuh awm pa ah nawh,<sup>25</sup> Mose laug pui pa pon yuh cao kaing ka daux pui Isarelax mai kieh kix yuh cao kaing ka piang pui khankix, pa kuang ka piang cub tix rheng, ka piang cub tixyieh, ka piang cub tixphuan mai ka piang cub kao kaux.<sup>26</sup> Kix prawng ka pui ku bawgyam mai kix viex grawng see pa nu hoek ka Mose, see pa iak kuceu kix tang prawng ca.<sup>27</sup> Mose kieh paox tix deeh ing mai nawh deeh hu ka haktiex ot tix heue.

## 19

### *Gawng Sina*

Khaix hoik lih hu pui Isarelax khankix khaing haktiex Ejiptux, ka daux khix loe tix ngaix, kix hoek ka daux tiag Sina.<sup>2</sup> Khaixhoik lih kix khaing Rephidim mai hoek ka tiag Sina, kix bang ti ot ka daux tiag tan, pui Isarelax khankix bang ti ot hawt sivoie gawng an.<sup>3</sup> Mose haok ka Siyiex mai Siyiex kok nawh khaing piang gawng ah nin, "Maix tak yaox ti kraik ka nyiexma Yakop mai ka pui Isarelax."<sup>4</sup> "Pex hoik sax yaox pa hoik yuh Aux ka pui Ejiptux mai Tokaux Aux hoik viex pex lih khaing Ejiptux awm viex klang krih kawn tix ka piang pruiktix."<sup>5</sup> "Phan pex cu nghiet ka gumlox Aux mai priex gumlox sijax mukheu Aux, pex tak mawh sinngao cie Aux sinax pui khawmuik, mawh kheu can pa koe ka piang haktiex khawmuik mawh cie Aux."<sup>6</sup> "Pex tak mawh simiang cao giex kaing li khankix mai mawh ceu pui pa singax singeh ka Aux, inkix mawh gumlox pa sang kraik maix ka kawn praix Isarelax khankix."<sup>7</sup> Mose deeh hoek mai kok kuad song cao kaing khankix mai kraik gumlox pa hoik tawm Siyiex ka nawh ka plak sivoie ngai kix.<sup>8</sup> Pui khawmuik deeh pawk lox tix dum tau ah nin, "Ex tak sang yuh awm lox pa hoik kraik Simiang Siyiex khawmuik. "Mose viex gumlox kraik pui khankix hu ka Siyiex.<sup>9</sup> Siyiex ah nin ka Mose, "Jhak heue, Aux tak hoek ka maix, ka dee kied pu ceep paiawm, sonsang mhong pui yam sikah Aux ka maix mai yumrhawm ka maix leeingju. Mawh kheu nan, Mose deeh kraik gumlox pa ah kawn pui ka Siyiex.<sup>10</sup> Khaix an Siyiex ah nin ka Mose, "Hu ka pui khankix mai kieh kix singax singeh daux singaix mai pasax mai kieh kix sidaux kraung tix,<sup>11</sup> yam hoek daux loe singaix, kieh kix khrierien tix, mawh kheu yam hoek daux

loe singaix, Siyiex tak lih hoek ka piang gawng Sina ka sivoie ngai kawn pui khawmuik."<sup>12</sup> Maix tak yuh mee hawt rawb vungviang gawng mai ah nin, "Yuh satix pex paw luan khaing mee in mai paw haok ka piang gawng mai paw teeh ka caonggawng, pui mawx angah pa teeh ka gawng tak kieh nawh yum tete."<sup>13</sup> "Pie taix kawx tak ang pon ti teeh kah, tak caw ti dheem nawh ka simaox. Phan ang mawh nan puing nawh yum ka te, pui angah, tobrie angah, tak ang yaox ti im. Yam mhong luah lox teettawng tom rheeng, kix tak yaox ti hoek dex gawng."<sup>14</sup> Mose lih hoek khaing piang gawng ka pui khankix, kieh pui singax mai kieh kix sidaux kraung tix,<sup>15</sup> Nawh ah nin ka pui khankix, "Yam hoek daux loe singaix kieh kix khrierien tix, paw kieh kix dex mai sibun."<sup>16</sup> Yam hoek daux loe singaix plak pongawb, lox tuh sah mai plukplak praix lih mai paiawm pa kied pu ceep ka piang gawng mai lox teettawng pa kied ting sinum lih, mawh kheu nan, pui pa ot ka daux nyiex bang kied lhat graung ka tete.<sup>17</sup> Mose viex pui khankix lih khaing daux nyiex bang, sonsang yaox ka Siyiex mai kix cung hawt caong gawng.<sup>18</sup> Gawng Sina hoik naog ka taox ngu, mawh kheu Siyiex lih hoek ka piang gawng ka daux sinax ngu, taox ngu an awm taox ngu pa kaoh khaing daux glah ngu mai gawng an hoik yungyang khawmuik.<sup>19</sup> Yam sinum luah lox teettawng tom rheeng mai nie baon niied ti ting sipie, Mose sikah mai Siyiex mai Nawh Cao pawk ka lox nawh ka daux sinum praix.<sup>20</sup> Siyiex lih hoek ka piang choek gawng Sina. Siyiex kok Mose ka piang choek gawng mai Mose kawx haok heue.<sup>21</sup> Siyiex ah nin ka Mose, "Lih hu mai tawx lox kieh pui rien rhawm tix, Aux lhat kix breeng tix laig, sonsang jhak ka Simiang Siyiex mai pui khankix tak lauxleeing tomnie."<sup>22</sup> "Caogix kaing li pa hoek dex Simiang Siyiex khankix kawx, kieh kix yuh tokaux tix singax, phan ang mawh nan, Siyiex tak kieh kix lauxleeing."<sup>23</sup> Mose deeh ah nin ka Siyiex, "Pui khankix ang lai pon haok ka piang gawng Sina, kheu Maix Cao hoik tawx krax rien rhawm ah nin ka yix, yuh

19:5 Pi 4:20, 7:6, 14:2, 21, 26:18, 19; Ti 2:14, 1Pe 2:9.  
19:6 Jhi 1:6, 5:10. 19:12-19 He 12:18-20. 19:16 Jhi 4:5.  
19:16-18 Pi 4:11-12.

mee vie hawt rawb vungviang gawng mai kieh gawng singax,”<sup>24</sup> Siyiex deeh ah nin ka Mose, “Lih hu mai deeh viex Arun haok tau mai maix, viang mawh nan, paw kieh cao giex kaing li mai pui khankix, breeng ti haok ka Siyiex, mawh kheu Aux lhat kix hoek krax lauxleeing.”<sup>25</sup> Mose lih hu ka pui khankix mai kraik ka kix heue.

## 20 *Lox Pingnyap Kao Gum* (Pi 5:1-21)

Simiang Siyiex kraik gumlox inkix khawmuik ah nin,<sup>2</sup> “Aux mawh Siyiex maix pa viex maix lih khaing haktiex Ejiptux mai khaing daux dee mawh maix siliex.”<sup>3</sup> “Lheu khaing Aux, maix tak ang pon ti krub ka Siyiex tang kaux.”<sup>4</sup> “Maix tak ang pon ti yuh rieanggrang tix ceu kawx son tokaux tix, pa awm grang pakpeung pa koe daux raoma mai pa koe piang haktiex, phan ang mawh nan, canceu pa koe daux rawm greem haktiex khankix kawx, ang pon ti yuh,<sup>5</sup> “Maix tak ang pon ti krub mai yuh kaing son kix, mawh kheu Aux mawh Siyiex maix, mawh Siyiex pa bak viang mai pa deeh viied phimap keeing pex khankix, ka piang kawx praix nawh tom hoek loe ju mai pon ju, ka doeh ru maix mai can pui pa koeng ka Aux.”<sup>6</sup> Viang mawh nan, Aux tak jhi krax cauxrhawm Tix ka pui pa moh ka Aux mai can pui pa priex ti hawt gumlox mukheu Aux khankix tom hoek kaing rheng ju pui.”<sup>7</sup> “Maix tak ang pon ti kok ceukaux Siyiex maix giexgoing. Pui pa kok ka ceukaux Siyiex giexgoing, Siyiex tak ang deuh nawh mawh pa ang koe phimap.”<sup>8</sup> “Dohkeud ka singaix tuah mai een singax singeh.”<sup>9</sup> Maix tak coca ti yuh kaing yuh tix khawmuik daux liah singaix.<sup>10</sup> Daux singaix aliah, mawh singaix tuah Siyiex maix, maix mai kawx simex kawx sibun maix, kawncaw simex kawncaw sibun maix, khawm tobrie maix mai khawm nyosinie pa ot daux sivix maix khawmuik, tak ang pon ti yuh kaing tix ceu kawx daux singaix an heue.<sup>11</sup> Mawh kheu Siyiex hoik phan raoma mai haktiex, rawm sigrit sigra mai can pa koe daux nawh khawmuik daux liah singaix mai Nawh lauxlee Tix ka daux aliah singaix, mawh kheu

Siyiex nawb buan ka singaix tuah mai kieh mawh singaix pa singax singeh heue.<sup>12</sup> “Yungyi ka miex keeing tix, sonsang mhawm ka maix mai sonsang langju maix ka piang haktiex pa tawx Siyiex ka maix.”<sup>13</sup> “Maix tak ang pon ti pah ju pui yum.”<sup>14</sup> “Ang pon ti phit vao mai moeng kawx pui.”<sup>15</sup> “Ang pon ti briex.”<sup>16</sup> “Ang pon tix kham mhairug pa ang mawhmeh ka paox plawg tix.”<sup>17</sup> “Maix tak ang pon ti ghoing ka nyiexma paox plawg tix, ang pon ti ghoing ka moeng paox plawg tix, kawncaw simex kawncaw sibun nawh, mawie nawh, la nawh mai canceu pa mawh cie paox plawg maix tix ceu kawx heue.”

## *Grawng Lhat Ka Siyiex* (Pi 5:22-33)

<sup>18</sup> Yam mhong pui khankix sinum praix mai plukplak praix mai lox teettawng mai taox ngu khaing daux gawng, pui khankix lhat graung siyaung mai cung dee singai<sup>19</sup> mai kix ah nin ka Mose, “Maix sikah ka yix, yix tak sang nghiet lox maix, paw kieh Siyiex sikah tau mai yix liak, phan ang mawh nan, yix tak yum kah.”<sup>20</sup> “Mose ah nin ka pui khankix, “Paw lhat graung, mawh kheu Siyiex hoek ti cheukcheu ka pex sonsang lhat graung pex ka Nawh Cao mai sonsang ang pex yuh phimap.”<sup>21</sup> Pui khankix cung dee singai, viang mawh nan Mose greed ti dex dee pu ceep paiawm ka dee ot Siyiex.

## *Khu Dee Tan*

<sup>22</sup> Siyiex ah nin ka Mose, “Maix tak ah nin ka pui Isarela khankix, pex hoik yaox sikah Aux khaing raoma.”<sup>23</sup> Lheu khaing Aux, maix tak ang pon ti yuh rieang siyiex mau mai rieang siyiex khri son tokaux tix<sup>24</sup> Maix tak yuh khu dee tan ka tiex son Aux mai maix tak tan krax tan pa gleeing mai krax tan pa nhim, pa mawh yung mai mawie ka piang an, ka dahdee deuh Aux min ceukaux Tix kudah, Aux tak hoek ti nawb buan ka maix.”<sup>25</sup> Phan maix yuh khu dee tan simaox son Aux, maix tak ang pon ti yuh ka simaox pa hoik bre ti mhawm mhawm, phan maix yuh ka kraung taix pa shiao tix ka simaox an, maix hoik kieh nawh seeing brai.

20:4-5 Lih 34:17, Krub 19:4; 26:1, Pi 4:15-18, 27:15. 20:5-6 Lih 34:6, 7, Si 14:18, Pi 7:9-10. 20:7 Krub 19:12. 20:8 Lih 16:23-30, 31:12-14. 20:9-10 Lih 23:12, 31:15, 34:21, 35:2, Krub 23:3. 20:11 Yam 2:1-3, Lih 31:17. 20:12 Pi 27:16, Mat 15:4, 19:19, Mak 7:10, 10:19, Luk 18:20, Efe 6:2, 6:3. 20:13 Yam 9:6, Krub 24:17, Mat 5:21, 19:18,

Mak 10:19, Luk 18:20, Ro 13:9, Ya 2:11. 20:14 Krub 20:10, Mat 5:27, 19:18, Mak 10:19, Luk 18:20, Ro 13:9, Ya 2:11. 20:15 Krub 19:11, Mat 19:18; Mak 10:19, Luk 18:20, Ro 13:9. 20:16 Lih 23:1, Mat 19:18, Mak 10:19, Luk 18:20. 20:17 Ro 7:7, 13:9. 20:18-19 He 12:18-19. 20:25 Krub 27:5-7, Yaw 8:31.

<sup>26</sup>Maix tak ang pon ti haok piang khu dee tan ka bawng, sonsang ang krax kakhkaong maix sidawng piang an heue.

**Lox Tat Son Siliex** (Pi 15:12-18)

**21** “In khankix mawh grawng krax prawng ca pa sang deuh maix sivoe ngai kix. <sup>2</sup>Phan maix liag ka siliex ceu pui Hebrie tix kaux, nawh tak yaox ti yuh kaing son maix liah num, yam hoek ka dauh aliah num, nawh tak pon ti lawdluan mai ang yaox ti tawx tittix. <sup>3</sup>Phan nawh hoek tix kaux nongnong, nawh tak deeh lih hu tix kaux nongnong, phan nawh hoek mai moeng tix, nawh tak yaox ti lih hu mai moeng tix. <sup>4</sup>Phan cao simiang nawh tee nawh koe moeng mai moeng nawh keh kawn simex kawn sibun, moeng nawh mai kawn praix nawh khankix tak mawh cie cao simiang mai nawh tak yaox ti lih hu nongnong. <sup>5</sup>Phan siliex krai lox sidawng yuh nin, aux moh kasimiang tix mai moeng mai kawn praix tix, aux ang rhawm lih hu ka dauh pa lawdluan. <sup>6</sup>Khaix an cao simiang nawh tak viex nawh hu ka Siyiex mai nawh tak viex nawh hoek ka diang siviex, phan ang mawh nan, ka rong sidub mai cao simiang nawh tak cieh yaok nawh ka kat lawm mai nawh tak mawh pui pa yuh kaing nawh leeingju. <sup>7</sup>Phan pui tix kaux kaux coh kawn sibun tix, sonsang mawh siliex, nawh tak ang yaox ti lih hu awm siliex simex khankix, ” <sup>8</sup> “Phan sibun an ang yuh pa khawrhawm ka cao simiang tix, pa hoik tee nawh ti moeng, khaix an nawh tak kieh sibun an pon krax lawdluan, nawh ang koe akhuang tix coh sibun an, ka pui haktiex tang praix, mawh kheu hoik pielhen nawh ka sibun an. <sup>9</sup> “Phan nawh hoik liag sibun an mawh moeng kawn simex tix, nawh tak priex nawh awm kawn sibun tix.” <sup>10</sup> “Phan nawh baox tee tix koe moeng tang kaux, nawh tak ang kieh priex preem, kraung ceep nawh mai akhuang pa caw nawh ti pon awm glang ka an, ang caw ti yawm pie ceex kawx.” <sup>11</sup> “Phan ang pon yuh ceu in loe ceu son nawh, sibun an tak lih hu giex mai ang lai pon mau ngawh tokaux tix heue.”

**Prawng Son Pui Pa Simah**

<sup>12</sup>“Pui mawx pa tawk pui tix kaux yum, tak deeh kieh nawh yum tete.” <sup>13</sup>“Viang mawh nan, phan nawh ang keud ti pah ka nawh kawx,

phan Siyiex kieh nawh yum dauh taix nawh, Aux tak sang khriren dee sang to nawh ti klawd. <sup>14</sup>“Phan pui tix kaux kaux, keud pa ang khaw ka paox plawg tix mai pah ka nawh, viang to tix mox ka khu dee tan Aux kawx, tak bluh nawh lih khaing khu dee tan mai pah ka nawh.” <sup>15</sup>“Pui pa pah ka miex keeing tix tak kieh nawh yum tete.” <sup>16</sup>“Pui pa briex ka pui mai coh nawh phan yaox ka dauh tawm taix nawh, tak kieh nawh yum tete.” <sup>17</sup>“Pui pajhaxlawg ka miex keeing tix tak kieh nawh yum tete.” <sup>18</sup>“Phan pui simah mai paox tix mai dheem ka simaox, phan ang mawh nan, tap nawh ka taix tix, phan nawh ang yum mai ot ka dee it tix.” <sup>19</sup>“Phan nawh deeh pon kaoh, hu lailing plak praix mai grix ti khaox, khaix an pui pa hoik tawk ka nawh, tak pon krax pluatploi, viang mawh nan, nawh tak yaox ti plud son kaing jhaw pa hoik gla nawh mai kiangiien ka nawh tom deeh nyawm ot nawh heue.” <sup>20</sup>“Phan pui tix kaux tawk ka siliex simex siliex sibun tix ka khaox mai yum dauh taix nawh, nawh tak pon krax pa ciyang.” <sup>21</sup>“Phan siliex an kawn im ju tix ngai ra ngaix, cao nawh tak ang lai pon krax ciyang, mawh kheu siliex an mawh pa hoik liag nawh ka mau tix heue.” <sup>22</sup>“Phan pui simah ka paox tix mai hu krox ka sibun pa koe kaux tix kaux mai laux kawn, viang nawh ang koe khaix mat kawx, nawh tak pon krax ciyang tete khaing mex sibun an tete mai nawh tak plud awm pa hoik tat cao prawng see.” <sup>23</sup>“Phan sibun an koe khaix mat tix ceuceu, nawh tak tawx ju son ju, <sup>24</sup>ngai son ngai, rhang son rhang, taix son taix, caong son caong, <sup>25</sup>pa hax ngu son pa hax ngu, pa pliang son pa pliang, pa mat son pa mat.” <sup>26</sup>“Phan pui tix kaux tawk ka ngai siliex simex mai siliex sibun tix kieh laux, nawh tak ploi nawh lih hu kheu hoik laux ngai nawh.” <sup>27</sup>“Phan nawh tawk ka siliex simex siliex sibun tix khankix, tom gaoh rhang, nawh tak ploi nawh lih hu kheu hoik gaoh rhang nawh heue.”

**Prawng Son Tobrie**

<sup>28</sup>“Phan mawie teed ka simex, sibun tix kaux kaux tom yum, tak dheem mawie an

ka simaox mai ang pon ti ih ka nex. Viang mawh nan, cao mawie tak pon krax pluatploi." <sup>29</sup> "Phan mawie an dawg teed pui ka dauw bawgyam pa hoik luan mai pui hoik kraih grawng in ka cao mawie, phan nawh ang priexrien mai mawie an baoh deeh teed ka simex, sibun tix kaux kaux yum, tak dheem mawie an yum ka simaox mai cao mawie kawx tak pah nawh yum." <sup>30</sup> "Phan kix kieh plud ka mau, nawh tak yaox ti deeh taoh ju tix, ka ngawh nawh, awm pa hoik tat kix ka piang nawh." <sup>31</sup> "Phan teed ka kawn simex kawn sibun pui, nawh tak yaox ti sau awm been pa hoik tat." <sup>32</sup> "Phan mawie teed ka siliex simex siliex sibun tix kaux kaux, cao mawie tak yaox ti tawx mau tixngoe shekhe ka cao siliex an mai tak dheem mawie an yum ka simaox." <sup>33</sup> "Phan pui tix kaux kaux paoh ti deuh dauw o, phan ang mawh nan, kaong dauw tiex mai ang tawb kheem, phan brung mai mawie pui cod ka dauw o an," <sup>34</sup> "Pui pa kaong dauw tiex an, tak deeh cox dauw tiex an mhawm mai nawh tak plud mau ka cao tobrie an, tobrie pa yum tak mawh cie nawh." <sup>35</sup> "Phan mawie pui tix mu hu teed ka mawie pui tang kaux tom yum, kiex tak coh mawie pa kawn im an mai goih mau, mawie pa hoik yum an kawx, kiex tak goih greung." <sup>36</sup> "Phan cao mawie hoik tawng mawie an hoik sax teed pui bawgyam pa hoik luan mai phan cao mawie an ang priexrien, nawh tak yaox ti plud mawie son mawie, tobrie pa hoik yum an tak mawh cie nawh heue."

### *Prawng Son Kraung*

**22** "Phan pui tix kaux briex mawie mai yung, pah angah, coh angah, nawh tak deeh yaox ti plud mawie phuan mu son mawie tix mu mai yung pon mu son yung tix mu." <sup>2</sup> "Phan yaox yam preeng pui briex tix laig dauw nyiex mai phan kix tawh nawh yum, phimap tak ang koe son nham pa hoik jauh yuh nawh heue," <sup>3</sup> "Phan singaix hoik lih, nawh tak koe phimap son pa jauh nham heue. Mawh kheu nawh tak deeh yaox ti plud tom grumnaog, phan nawh ang koe tix ceu kawx, nawh tak coh tokaux tix kheu jao briex nawh," <sup>4</sup> "Phan kawn yaox mawie angah yung angah pa kawn im ka dauw taix pui briex, nawh tak deeh yaox ti plud ra son." <sup>5</sup> "Phan pui tix kaux kieh

tobrie ti hu ih ka kaung pui, phan ang mawh nan, sipeem plix siiet mai blha tobrie ti ih ka kaung pui, nawh tak yaox ti teei canceu pa nie mhawm khaing dauw kaung cao nawh mai ceu pa nie mhawm pa kaoh khaing dauw sipeem plix siiet nawh plud kah." <sup>6</sup> "Phan keeig ngu hax yeem pang kat khankix mai deeh hu proe ka lhiem nghox, pum nghox pui mai kieh kaung pui laux khawmuik, cao pa jah keeig ngu an tak deeh yaox ti plud tete heue." <sup>7</sup> "Phan pui tix kaux kieh paox plawg tix priex mau angah, kraung angah, phan pui briex pon briex khaing dauw nyiex nawh, phan pon giex pui briex an, nawh tak deeh plud ra son." <sup>8</sup> "Phan kix ang yaox pui briex, kix tak viex cao nyiex hoek ka plak sivoe ngai Siyiex mai ciied ti yaox grawng hoik teei ang teei ka kraung paox plawg tix." <sup>9</sup> "Grawng ceu pa lud mai kraung pui, pa dex mai mawie, la, yung angah, kraung ceep mai tang ceu pa ah, in mawh kraung cie aux, phan tang kaux ah nan, kiex ra kaux tak yaox ti hoek ciied sivoe ngai Siyiex, pui pa som, tak deeh kieh nawh plud ka paox plawg tix ra son." <sup>10</sup> "Phan pui tix kaux kieh paox plawg tix priex la, mawie, yung mai tobrie tang ceu tix mu, phan hoik yum angah, phan mat angah mai ang yaox yam grheu pui nawh hu dee singai angah," <sup>11</sup> cao pa priex kraung an tiextu ka sivoe ngai paox plawg tix mai sivoe ngai Siyiex, grawng ang tix sax teei kraung paox plawg tix mai cao kraung tak caw ti rieb ka lox an mai ang lai kieh nawh plud." <sup>12</sup> Viang mawh nan, phan pui briex tobrie an khaing nawh tete, nawh tak deeh yaox ti plud ka kraung an. <sup>13</sup> Phan mawh tobrie bliex pa kiied kah, nawh tak yaox ti jhi to yum an mawh mhairug, nawh ang lai yaox ti plud kah. <sup>14</sup> "Phan pui tix kaux vai tix ceuceu khaing paox plawg tix, phan an lih ti mat angah, yum angah, yam ang cao ot, pui vai tak yaox ti plud awm pa khaw mai jum an." <sup>15</sup> "Viang mawh nan, phan cao nawh ot, pui vai tak ang yaox ti plud, phan mawh pa vai ka ngawh, cao tobrie tak pon ngie ngawh vai khaing heue.

**Prawng Son Kapaox**

<sup>16</sup>“Phan pui tix kaux nyawglaw ka bunkrih pa ang koe paox klieh, it tau mai nawh, nawh tak tawx phak ka sibun an mai kieh mawh moeng tix.” <sup>17</sup>Phan keeing sibun an thiang ti ang tawx ka simex an, nawh tak yaox ti plud mau, awm ngawh phak son bunkrih an. <sup>18</sup>“Maix tak ang pon kieh sibun pa koe preu im ju.” <sup>19</sup>“Pui pa phit vao mai tobrie, tak kieh nawh yum tete.” <sup>20</sup>“Pui pa hu yuh krax tan ka siyiex tang kaux, lheu khaing Siyiex tix kaux khaing, nawh tak pon krax lauxleeing.” <sup>21</sup>“Maix tak ang pon ti yuh krax khin ka nyosinie mai tuktiaktukte ka nawh, mawh kheu pex hoik sax mawh nyosinie ka dauh haktiex Ejiptux.” <sup>22</sup>“Maix tak ang pon ti map ka miexmai kawn doe.” <sup>23</sup>“Phan maix map kix ka ceu patix angah, lox riagyo kix ka Aux khawmuik, Aux tak mhong kah,” <sup>24</sup>krax pa kied songrhawm Aux tak lih mai Aux tak pah pex ka lawm vaid, moeng pex khankix tak mawh miexmai mai kawn praix pex khankix tak lih ti mawh kawn doe.” <sup>25</sup>“Phan maix tawx pui Aux pa hot sibhawm dauh sinax pex tix kaux yaog mau, maix tak ang pon ti yuh awm pui pa ploimauka nawh. Maix tak ang pon ti mhaing rao ka nawh.” <sup>26</sup>“Phan paox plawg maix tang prux it tix ka maix, maix tak deeh tawx an ka nawh, ka ang singaix nyang klip.” <sup>27</sup>Mawh kheu nawh koe prux pa lhop tix pheengie son tokaux tix, nawh tak sang lhop patix yam it tix lie? Yam riagyo nawh ka Aux, Aux tak mhong, kheu Aux koe krax pa cauxrhawm. <sup>28</sup>“Maix tak ang pon ti ah lox pa ang cee ang cak ka Siyiex mai ang pon ti jhaxlawg cao kaing piang pui ceu pex tix kaux kawx.” <sup>29</sup>“Maix tak ang pon ti tuk bawgyam sonsang tan tix plix khaox plix ox pa liang tix pon mai rawm plix siiet.” “Maix tak yaox ti tawx kawn Ai tix ka Aux.” <sup>30</sup>“Maix tak yuh ka mawie mai yung maix khankix awm an. Maix tak kieh kawn mawie kawn yung ot mai miex nawh aliah ngaix, ka dauh daix ngaix maix tak yaox ti ap ka Aux.” <sup>31</sup>“Maix tak mawh pui pa singax ka son Aux, maix tak ang pon ti ih nex pa hoik kiied tobrie bliex dauh kaung, maix tak taing sox ih heue.”

**22:16-17** Pi 22:28-29. **22:18** Pi 18:10, 11. **22:19** Krub 18:23, 20:15-16, Pi 27:21. **22:20** Pi 17:2-7. **22:21-22** Lih 23:9 Krub 19:33-34 Pi 24:17-18, 27:19. **22:25** Krub 25:35-38, Pi 15:7-11, 23:19-20. **22:26-27** Pi 24:10-13. **22:28** Kawn 23:5. **22:31** Krub 17:15. **23:1** Lih 20:16,

**23 Been Son Khawmuik**

<sup>1</sup>“Maix ang pon ti kraih lox pao pa lud, maix ang pon rom taix tix kham mhairug pa ang mawhmeh tau mai pui pa ang rahsee.” <sup>2</sup>“Maix tak ang pon ti hawt khaix pui hun mai yuh pa caox caig, sonsang via khaing pa rahsee, maix tak ang pon kham mhairug pa ang rahsee plak pui ting pui hun. <sup>3</sup>Yam prawng maix see, paw jhak pakngai pui hot sia. <sup>4</sup>“Phan maix yaox mawie, la cie pui koeng maix hoik lud krax, maix tak deeh tuk hoek tawx ka nawh.” <sup>5</sup>Phan maix yaox ka la cie pui pa koeng maix kah goh greem lhang kraung ciien tix, maix tak ang pon ti via, maix tak caw ti teem kah tete. <sup>6</sup>“Maix tak ang pon ti prawng ca ka pui hot sia ka dauh krax pa ang rahsee. <sup>7</sup>“Kieh tokaux maix singai khaing pa ang mawhmeh, paw pah ka pui pa ang koe phimap mai pui pa rahsee, mawh kheu Aux tak ang pluatploi ka pui pa ang rahsee. <sup>8</sup>Maix tak ang pon ti teei mau cun praok, mawh kheu mau cun praok tak kieh ngai pui pa koe pingnya dug mai kieh gumlox pui rahsee khankix lud krax. <sup>9</sup>“Pex tak ang pon ti yuh pa khin ka nyosinie, kheu hoik mawh pex nyosinie ka dauh haktiex Ejiptux, pex tawng rhawm rhi nyosinie heue.

**Prawng Son Singaix Tuah**

<sup>10</sup>“Maix rhuat simie liah num ka dauh ma kaung maix mai khrawm ka plix, <sup>11</sup>ka dauh num aliah, maix tak ang lai yuh mai grham laux tix, mawh kheu nan, pui pa hot sia paox ceu pui maix khankix tak yaox ti sum tix ih kah mai can pa deuk an, tobrie khankix tak yaox ti ih kah. Maix tak yaox ti yuh sipeem plix siiet maix mai sipeem khaox sanlun maix awm an. <sup>12</sup>“Ka dauh liah singaix maix tak yuh kaing jhaw tix mai ka dauh singaix aliah maix tak lauxlee tix, mawie maix mai la maix khankix kawx tak yaox ti lauxlee tix, siliex simex siliex sibun maix mai nyosinie maix tak deeh pon riang rao khraox kah. <sup>13</sup>Rien rhawm ka canceu pa hoik kraih Aux ka maix, paw kraih min ceukaux

Krub 19:11-12, Pi 5:20. **23:3** Krub 19:15. **23:4-5** Pi 22:1-4. **23:6-8** Krub 19:15, Pi 16:19. **23:9** Lih 22:21, Krub 19:33-34, Pi 24:17-18, 27:19. **23:10-11** Krub 25:1-7. **23:12** Lih 20:9-11, 31:15, 34:21, 35:2 Krub 23:3, Pi 5:13-14.

siyiex tang kaux mai paw kieh pui mhong  
grawng in khankix khaing jheeh maix heue.”

**Pawie Ting Loe Ceu** (*Lih 34:18-26; Pi 16:1-17*)

14 “Ka daux tix num maix tak yuh pawie ka son  
Aux loe bawg.” 15 “Maix tak yuh pawie blah pa  
ang sau susaix, pawie Azumax, maix tak ih blah  
pa ang sau susaix aliah singaix awm gumlox  
pa hoik tawm Aux ka maix, bawgyam hoik  
tat Aux ti deuh daux khix Abibalax, mawh  
kheu daux khix an, maix hoik lih hu khaing  
meung Ejiptux. Pui tix kaux kawx ang pon ti  
hoek plak sivoie ngai Aux mai taix yi tix.” 16  
“Maix tak yuh pawie gaing nghox, pa mawh  
pawie pa pon maix plix khaox plix ox pa liang  
khaing riang rao tix pa hoik sum maix daux  
ma kaung mai pawie khrawm plix khaox plix  
ox ka riang rao maix khaing daux ma kaung  
bawgyam sidah num. 17 “Ka daux tix num, pex  
can pa mawh nyawm simex khawmuik tak yaox  
ti bleeh ka sivoie Siyiex loe bawg.” 18 “Maix tak  
ang pon ti tan nham pa hoik appong tix ka  
Aux tau mai blah pa koe susaix mai ang pon ti  
priex bee pa hoik appong tix ka Aux deuk tom  
hoek plak pongawb.” 19 “Plix khaox plix ox pa  
liang maix ti pon khaing haktiex khankix, tak  
viex laig ka daux nyiex buan Siyiex maix.  
“Maix tak ang pon ti ngaik nex kawm pex daux  
rawm teeih miex nawh heue.

**Gumlox Sijax Mukheu**

20 “Aux ploi kawncau Siyiex ka sivoie maix,  
sonsang kiangiien ka maix daux krax mai  
sonsang viex maix hu ka dee hoik khrierien  
Aux.” 21 Rien rhawm mai cu nghiet ka lox nawh, paw  
thiang ka nawh, mawh kheu nawh tak ang  
pluatploi phimappex, mawh kheu min ceukaux  
Aux hoik koe ka daux nawh. 22 “Phan maix cu  
nghiet ka lox nawh mai hawt ti yuh awm pakrai  
Aux khawmuik, Aux tak koeng ka pui pa koeng  
ka maix khankix mai Aux tiebtie ka pui pa  
tiebtie ka maix.” 23 “Kawncau Siyiex Aux tak hu  
sivoie maix mai viex maix laig ka dee ot ceu pui  
Amawrix, ceu pui Hittix, ceu pui Pharazix, ceu  
pui Khananix, ceu pui Hiwix mai ceu pui  
Yebusix khankix, Aux tak yuh kix lauxleeing. 24  
“Maix tak ang pon ti ngeuh kaing tix ka siyiex  
kix mai hawt beenli kix mai yuh kaing awm pa  
yuh kix maix tak klup ti tik an khawmuik mai

raig ti tik rieanggrang pa krub kix  
lauxleeing. 25 Maix tak yuh kaing Siyiex tix  
mai Nawh Cao tak nawb buan ka blah mai  
rawm maix mai tak teei ti tik jhawm saux  
khaing sinax pex. 26 “Aux tak ang kieh pa  
laux kawm mai pa neh koe ka daux  
haktiex pex, Aux tak kieh baux ju pex  
grumnaog.” 27 “Aux tak ploi rhawm pa chix  
lhat graung ka Aux koe sivoie pex, Aux tak  
kieh krax sivix rhawm koe sinax ceu pui pa  
sang yuh pex laux pa sipub pex kah, Aux tak  
kieh pui koeng deeh veeh ti to khaing pex.  
28 Aux tak ploi awng lung hu sivoie pex,  
sonsang grheu pui Hiwix mai pui Hittix mai  
pui Khananix khaing sivoie pex. 29 Aux tak ang  
grheu pui an khankix lih khaing sivoie maix  
daux tix num, phan yuh nan haktiex tak lih  
ti yi mai tobrie bliex khankix tak pre  
haohhun sonsang kieh maix laux. 30 “Aux  
tak grheu kix khaing sivoie maix, tix  
bawg ceeix ceeix tom sidah pre maix  
haohhun mai pon ti cie haktiex an  
mawh sinngao tix. 31 “Aux tak tat mee  
haktiex maix jah ka rawm sigrit sigra  
raoh tom hoek ka rawm sigrit sigra  
Philitix mai jah khaing daux tiag tom  
hoek ka rawm klawng Upharetix, mawh  
kheu Aux tak ap pui pa ot haktiex an  
daux tawm taix maix, maix tak grheu  
kix lih sivoie maix. 32 “Maix tak ang pon ti  
yuh sijax mukheu tau mai kix mai siyiex  
kix. 33 “Kix tak ang yaox ti otdaux haktiex  
pex, phan yuh nan kix tak kieh pex lud ka  
Aux, mawh kheu phan pex yuh kaing siyiex  
kix, an tak mawh kie ka pex heue.”

**24 Krax Kaux Sijax Pui Isarelux**

Nawh Cao ah nin ka Mose, “Hoek  
mai haok ka Siyiex maix mai Arun, Nadat,  
Abihux mai khawm kuad song pui  
Isarelux atixgliah kaux mai kieh kix krub ka  
dee singai. 2 Mawh ngie Mose pa pon hoek  
dex ka Siyiex, pui tang kaux tak ang pon ti  
dex mai pui khankix kawx, tak ang pon ti  
haok tau mai nawh.” 3 Mose deeh hoek  
krai gumlox Siyiex mai lox lai beenli ka pui  
khawmuik mai pui khawmuik deeh pawk lox  
tix gum tau ah nin, “Ex tak sang yuh awm  
gumlox pa hoik krai Siyiex khawmuik.” 4 Mose  
tiem ti deuh gumlox Siyiex khawmuik, nawh  
kaoh pongawb caoco mai sum khu dee tan

23:15 Lih 12:14-20, Krub 23:6-6, Si 28:17-25. 23:16  
Krub 23:15-21, Si 28:26-31, Krub 23:39-43. 23:19 Pi  
26:2, Pi 14:21.

hawt caong gawng mai rong simaox kao ra mu awm koe ru pui Isarelaax kao ra ceu. <sup>5</sup> Nawh ploi kawng nyawm sinaw pui Isarelaax khankix, pa tan krax tan pa gleeing mai krax tan pa nhim ka mawie mhaing khankix ka Siyiex. <sup>6</sup> Mose teei nham tix plak mai sau ka daux pan khoe, nawh phruah nham an tix plak ka piang khu dee tan. <sup>7</sup> Nawh teei phuk lai sijax mukheu mai phat sonsang mhong pui ka khawmuik mai kix ah nin, "Ex tak sang yuh mai cu nghiet awm pa hoik krai Siyiex khawmuik." <sup>8</sup> Mose teei nham mai phruah ka piang pui khankix ah nin, jhak heue, "Nham sijax mukheu in, hoik mawh pa yuh Siyiex mhairug tau mai pex awm gumlox nawh khawmuik heue."

### *Gumlox Siyiex Piang Gawng*

<sup>9</sup> Mose haok ka piang gawng tau mai Arun, Nadat, Abihux mai khawm kuad song pui Isarelaax atixgliah kaux, <sup>10</sup> kix yaox ka Siyiex pui Isarelaax mai ka greem caong Nawh Cao koe siang simaox pa klai singi raoma. <sup>11</sup> Khaix hoik yaox cao kaing pui Isarelaax khankix ka Siyiex, Nawh Cao ang tawx taix tix ka kix, mawh kheu nan, kix ih mai nyaux tau tan. <sup>12</sup> Siyiex ah nin ka Mose, "Haok ka Aux piang gawng mai pau tan, Aux tak tawx khlawp simaox pa hoik tiem Aux ti deuh gumlox beenli mai gumlox pingnyap khankix sonsang gau maix ka kix." <sup>13</sup> Mose kaoh cung mai cao teem nawh Yawsux, haok ka piang gawng Siyiex. <sup>14</sup> Nawh ah nin ka kuad song khankix, "Pau yix tin, tom deeh hoek yix ka pex, Arun mai Hurax tak ot tau mai pex, phan pui tix kaux kaux yaox krax pa nu tix ceuceu, kieh nawh hu ka kiex." <sup>15</sup> Khaix an, Mose haok ka piang gawng mai paiawm tawb kheem ka gawng. <sup>16</sup> Min plakngai Siyiex lauxlee tix ka piang gawng Sina mai paiawm ceep ka piang gawng liah singaix, yam hoek daux aliah ngaix Nawh Cao kok Mose khaing daux sigreung paiawm. <sup>17</sup> Min plakngai Siyiex jhan rieng ka piang choek gawng awm gleeing ngu, kawng praix Isarelaax khankix pon ti yaox kah. <sup>18</sup> Mose laig daux sigreung paiawm mai haok ka piang gawng mai ot ka piang gawng tixpon ngaix tixpon sawm heue.

**25** *Pa Tan Son Pa Singax* (Lih 35:4-9)  
Siyiex krai ah nin ka Mose, <sup>2</sup> "Krai ka pui Isarelaax khankix, sonsang viex kix krax pa tan tixka Aux, maix takrieb ti teei khaing pui pa gauxrhawm ti tan ka Aux kukaux. <sup>3</sup> Krax tan pa caw maix ti rieb teei khaing kix, tak mawh khri, mau mai tawng, <sup>4</sup> kraung klai raoma mai kraung pa lung pliex mai kraung pa raoh rawt khawm kraung man pa taing ti ka keei ceu pa mhawm mai kraung hauk pex khankix, <sup>5</sup> hauk kawng yung pa hoik siang ti raoh, hak phix tiex mai khaox Akashax. <sup>6</sup> Bee pa sang tok, bee pa sang groi mai ceu pa sioe bhawng son nyawng bhawng pa sang gleeing. <sup>7</sup> Siang simaox bawd raoh, siang simaox pa sang tok ka naok sibex dhah dawd taix pa ceep cao giex kaing li khankix. <sup>8</sup> Kieh kix yuh dee singax son Aux mai Aux tak ot sinax kix. <sup>9</sup> Maix tak yuh awm pa hoik jhi Aux ka maix khankix, pa mawh pakpeung nyiex gox buan man mai pakpeung kraung khrai khawmuik heue.

### *Teug Buan* (Lih 37:1-9)

<sup>10</sup> "Kix tak yuh teug buan tix mu ka khaox Akashax, krax lang ra sawk mai tix diex, krax vieh tix sawk mai tix diex, krax lhaong tix sawk mai tix diex. <sup>11</sup> "Maix tak om ka khri naw plak daux mai plak praix mai kawb kraung khri rawb vungviang ka praok khawmuik. <sup>12</sup> Maix tak yuh jeep khri pon mu mai kab ka daog teug buan an pon plak mai kieh jeep khri koe tix plak ra mu. <sup>13</sup> Maix tak yuh khaox glawm ka khaox Akashax mai om an ka khri. <sup>14</sup> Maix tak sau khaox glawm ka daux maox jeep khri an, pa hoik kab tix ka daog teug buansang klawm kix kah. <sup>15</sup> Tak kieh khaox glawm laig ka daux jeep khri teug buan mai ang pon ti teei lih khaing daux an. <sup>16</sup> Maix tak sau mhairug pa sang tawx Aux ka maix daux teug buan an. <sup>17</sup> Maix tak deeh yuh dawb teug buan pa cauxrhawm an ka khri, krax lang kieh koe ra sawk mai tixdiex, krax vieh tix sawk mai tix diex. <sup>18</sup> Maix tak yuh riang Cherubin ra mu ka khri mai kab ka piang toh dawb teug buan pa cauxrhawm plak in plak an. <sup>19</sup> Deuh rieng Cherubin ka daog plak in tix mu mai ka daog plak an tix mu, maix tak kieh rieng

Cherubin pa koe daog teug buan rop ti mawh tix mu tau ka dawb teug dang ngeung pa cauxrhawm an. <sup>20</sup> Rieang Cherubin tak di pruiik tix ka piang teug buan mai tawb dawb teug buan ka pruiik tix mai ralai veeh pakngai ka plak paox tix, pakngai Cherubin khankix jhak ka daog teug buan dang ngeung pa cauxrhawm an. <sup>21</sup> Maix tak tawb dawb teug buan pa cauxrhawm an ka piang teug buan, maix tak sau ceu pa kham mhairug pa sang taxw Aux ka maix ka daux teug buan. <sup>22</sup> Aux tak sipub maix tan mai sikah tau mai maix khaing ka piang teug buan pa cauxrhawm ka daux sinax rieang Cherubin ra mu ka piang teug pa kham mhairug, Aux tak tawm gumlox ka maix son pui Isarela khankix heue.

**Grawng Pheen Deuh Blah** (Lih 37:10-16)

<sup>23</sup> “Maix deeh yuh pheem tix mu ka khaox Akashax, kieh lang ra sawk, vieh tix sawk mai krax lhaong tix sawk mai tix diex. <sup>24</sup> Maix tak om ka khri naw mai kawb kraung khri ka hawt vungviang an. <sup>25</sup> Maix tak yuh lat koe tix tawp mai kawb hawt vungviang an ka kraung khri. <sup>26</sup> Maix tak yuh daux jeep khri pon mu mai sau ka caong pheem khawm pon daog. <sup>27</sup> Kieh jeep khri an dex mai lat pheem, sonsang giex khaox glawm pa klawm ka pheem. <sup>28</sup> Maix tak yuh khaox glawm ka khaox Akashax mai om ka khri, sonsang pon klawm ka pheem. <sup>29</sup> Maix tak yuh pan, lawk tuh, klong mai kawk nyaux pa sang lhaok pa dex mai kraung pa shiao piang pheem, maix tak yaox ti yuh ceu ankix ka khri naw naw. <sup>30</sup> Maix tak deuh blah pa tan tix ka piang pheem an sivoe Aux jheeng jheeng.

**Pang Jawk Ten Khri** (Lih 37:17-24)

<sup>31</sup> “Maix tak yuh jawk ten khri tix mu, ka khri naw naw, jaong num pang nawh khankix tak bre ti tawk ka daix, kaw nawh, plix nawh mai tai nawh khankix kieh lih mawh tix mu tau mai an. <sup>32</sup> Kieh kak lih koe khaing pang jawk ten khri tix plak loe mu. <sup>33</sup> Kak loe kak pa lih khaing pang jawk ten khri, ka piang ku mu koe tux tai kraox nhawng ka mai caw ti koe kaw loe mu pa awm grang plix ceem khaox, <sup>34</sup> Ka piang pang jawk ten khri kieh koe pa awm tux tai kraox nhawng tau mai kaw pon mu pa awm grang plix ceem khaox. <sup>35</sup> Kak khankix pa lih khaing pang jawk ten khri liah kak, ka greem kak khawm ra plak,

caw ti koe tux tai tix plak tix mu. <sup>36</sup> Tux tai mai kak khankix tak kleuk ti mawh tix mu tau, pang jawk ten khri an khawm kreng tak mawh pa yuh ka khri naw. <sup>37</sup> Maix tak yuh kaw ngu aliah mu mai tok ka kaw ngu an sonsang jhan pa riieng ka sivoe pheem. <sup>38</sup> Sigiiep ngu mai kaw sau sigiiep ngu kaw tak mawh pa yuh ka khri naw. <sup>39</sup> Can kraung pa shiao ka pang jawk ten khri khankix tak caw ti yuh ka khri naw. <sup>40</sup> Rien tix sonsang yuh maix kuceu awm pa khaw mai grang pa hoik jhi Aux ka maix ka piang gawng heue.”

**26 Nyiex Gox Buan Man** (Lih 36:8-38)

“Lheu khaing an maix tak yuh nyiex gox buan man, ka man tie kao pheem pa hoik taing ka keei ceu pa mhawm pa klai raoma mai pa lung plix mai pa raoh rawt khawmuik maix yuh ti sau rieang Cherubin pa mhawm ka piang an. <sup>2</sup> Man tie tix pheem kieh lang tixnga daix sawk, plak vieh pon sawk. man tie an ku pheem kieh sidu paox tix. <sup>3</sup> Man tie an phuan pheem caing kleuk paox tix mawh tix pheem mai pa deuk an phuan pheem kaw caing kleuk paox tix mawh tix pheem. <sup>4</sup> Maix tak yuh daux jhup maox koe ka praok man tie ka man pa klai raoma see dee sitoe kix ti caing ku pheem, awm an maix tak deeh yuh nawh ka daog plak praix man tie an tix mu sonsang sitoe man ra pheem mawh tix mu. <sup>5</sup> Maix tak yuh daux jhup maox koe tix phuan mu, ka man tie an tix mu mai deeh yuh daux jhup maox koe tix phuan mu ka daog man tie an ra mu tix mu, sonsang sitoe daux jhup man an kab tix tau. <sup>6</sup> Maix tak yuh grok khri tix phuan mu mai fak man tie an kix tau ka grok khri kieh kleuk paox tix, sonsang mawh nyiex gox buan man tix lhang. <sup>7</sup> “Maix tak yuh man tawb kao tix pheem ka hak pex, son sang lhop ka piang nyiex gox buan man. <sup>8</sup> Man tie tix pheem kieh lang tixngoe sawk mai plak vieh pon sawk, man tie ankix kao tix pheem kieh sidu paox tix. <sup>9</sup> Maix tak kleuk man tie an phuan pheem tau mai man tie an liah pheem tau, maix tak niiep ti deuh man tie liah pheem an ka sivoe nyiex gox buan man heue. <sup>10</sup> Ka daog man tie an tix pheem, maix tak yuh daux jhup man koe tix phuan daux mai ka daog man tie an ra pheem tix

phoon, yuh dauh jhup man koe tixphuan dauh. <sup>11</sup> “Maix tak yuh grok tawng lheung tixphuan mu mai fak ankix ka dauh jhup man khankix mai kleuk an ka piang, kieh mawh nyiex gox buan man tix lhang. <sup>12</sup> Toh man pa kawm deuk ka piang nyiex gox buan man an tix plak, kieh takteue tix lih ka plak khaix nyiex gox buan man. <sup>13</sup> Man tawb nyiex gox buan pa lheu khaing plak piang ra sawk, sonsang tawb nyiex gox buan man kieh takteue tix ka praok nyiex gox buan man tix plak tix sawk. <sup>14</sup> Maix tak yuh pa tawb nyiex gox buan man ka hak yung pa hoik siang tix raoh mai hak phix tiex khankix ka piang hauk yung. <sup>15</sup> “Maix tak yuh ding jung nyiex gox buan man ka khaox phia Akashax. <sup>16</sup> Krax lang phia kieh koe kao sawk, krax vieh tix sawk mai tix diex. <sup>17</sup> Phia ku plah, tak koe caong ra mu, sau kleuk paox tix, mawh kheu nan, maix tak yuh nyiex gox buan man an ka phia khawmuik. <sup>18</sup> Maix tak yuh phia ding son nyiex gox buan man plak jee koe tixnga plah, <sup>19</sup> Maix tak yuh jhup jaong mau pa sang jhup ka jaong phia tixpon mu, phia ku plak kieh koe dauh jhup ra dah, <sup>20</sup> awm an, maix tak yuh phia ding nyiex gox buan man plak blaong koe tixnga plah, <sup>21</sup> Maix tak yuh jhup jaong mau tixpon mu, son sang jhup jaong phia tix plah ra mu. <sup>22</sup> Maix tak yuh phia ding nyiex gox buan man son plak klip singaix koe liah plah. <sup>23</sup> Maix tak yuh phia ding ra plah son daog nyiex gox buan man an ka plak khaix ra dah, <sup>24</sup> kix sau jhup ka plak caong mai ka plak piang kieh sidu paox tix, mawh kheu nan, an tak mawh son daog khawm ra plak, <sup>25</sup> phia daix plah, jhup jaong mau koe kao liah mu, phia tix plah koe dauh jhup jaong ra dah. <sup>26</sup> “Maix tak yuh lat pa lang ka khaox Akashax, sonsang sau ka jhup phia pa koe praok nyiex gox buan man an tix plak phuan gawng. <sup>27</sup> Maix tak yuh lat pa lang sonsang sau ka jhup phia plak khaix nyiex gox buan man phuan gawng. <sup>28</sup> Lat pa koe sigreung, tak kieh laig dauh jhup phia, jah ka toh plak in tom hoek ka toh plak an. <sup>29</sup> Maix tak om phia ankix ka khri mai yuh dauh jhup maox ka khri, sonsang giex lat kaux mai om lat ka khri. <sup>30</sup> Maix tak yaox ti sum nyiex gox buan man, awm grang pa hoik jhi ka maix ka piang gawng. <sup>31</sup> “Maix tak yuh man pa tie ka keei klai raoma, keei lung plieux mai keei paraoh rawt pa 26.31-37 Lih 36:35-38. 27:1-8 Lih 38:1-7.

hoik taingka keei ceu pa mhawm mai yuh ti sau rieang Cherubin pa mhawm ka piang an. <sup>32</sup> Maix tak fak man tie an ka rong khaox Akashax pon gawng pa hoik om ka khri, ka rong khaox an tak koe grok khri mai jhup jaong mau pon mu. <sup>33</sup> Maix tak fak man tie an ka rong khaox grok khri, khaix an maix tak viex teug pa kham mhairug laig tan ka plak khaix man tie an, man tie an tak mawh pa khan sinax dee singax mai ka dee kied blon singax. <sup>34</sup> Maix tak sau dawb teug krax pa cauxrhawm an ka piang teug buan pa kham mhairug ka dauh dee pa kied blon singax. <sup>35</sup> Maix tak deuh pheen ka plak praix man tieb an, ka praok plak blaong mai deuh pang jawk ten khri tix plak ka praok nyiex gox buan man ka plak jee mai kieh see paox tix. <sup>36</sup> “Maix tak yuh man tie diang siviex laig dauh nyiex gox buan man tix pheen ka keei pa klai raoma mai keei pa lung plieux mai keei pa raoh rawt pa taing ka keei ceu pa mhawm khaing cao pa taing man. <sup>37</sup> Maix tak yuh rong Akashax phuan rong, son man tie diang siviex an om khri ka piang. Maix tak baox deeh yuh dauh jhup jaong phuan dauh ka tawng lheung son an kix heue.

### **Grawng Khu Dee Gleeing Krax Tan**

**27**

(Lih 38:1-7)

“Maix tak yuh khu dee tan ka khaox Akashax, kieh krax lang koe phuan sawk. Kieh khu dee tan an sidu khawm pon daog mai kieh krax lhaong koe loe sawk. <sup>2</sup> Maix tak yuh rung koe pon mu ka piang daog pon daog mai rung ankix tak kieh mawh khaox Akashax tix ceu ngie. Maix tak om nawh ka tawng khawmuik. <sup>3</sup> Maix tak yuh aw tawng son pa sang sau kix nyaox mai sipeed vieh plah mai pan khoek mai khaox sigawng nex mai kraung pa shiao mai aw ngu khawmuik, maix tak yuh kraung pa shiao maix inkix ka tawng. <sup>4</sup> Maix tak yuh grheeng tix mu ka tawng mai yuh dauh jhup maox pon dauh, ka daog grheeng an pon plak. <sup>5</sup> Maix tak deuh grheeng an ka greem toh khu dee tan, kieh grheeng pa yuh maix khankix jah khaing plak greem tom hoek sigreung khu dee tan. <sup>6</sup> Maix tak yuh khaox glawm ka khaox Akashax mai om ka tawng. <sup>7</sup> Sau khaox glawm ka dauh maox jhup mai

kieh khaox glawm koe praok khu dee tan khawm ra plak, sonsang pon klawm kah. <sup>9</sup>Maix tak yuh khu dee tan ka phia, koe daux doh plak piang mai plak greem, mawh kheu nan, kix tak yuh awm pa hoik jhi Aux ka maix piang gawng heue.

***Man Vungviang Biang Nyiex Gox Buan***

*(Lih 38:9-20)*

<sup>9</sup>“Maix tak baox yuh man vungviang biang nyiex gox buan, son daog plak jee tak fak ka man pa taing ka keei ceu pa mhawm, kieh krax lang man an koe tixyieh sawk. <sup>10</sup>Rong khaox pa sang jung ka man an, tak kieh koe tixnga gawng mai daux jhup jaong an tixnga mu mai ankix tak mawh tawng khawmuik. Can grok pa koe ka rong ankix mai lat nawh khawmuik, tak kieh mawh pa yuh ka mau. <sup>11</sup>Awm an son krax lang plak blaong, maix tak fak man tie tixyieh sawk mai rong khaox tixnga gawng mai daux jhup jaong tawng tixnga mu mai grok ka rong khaox khankix, khawm lat mau heue. <sup>12</sup>Plak vieh vungviang biang plak klip singaix, tak kieh fak ka man tie pa koe tixphan sawk mai rong jung nawh kao rong mai daux jhup jaong ankix kao mu. <sup>13</sup>Plak vieh vungviang biang plak toh kawx, tak kieh nawh koe tixphan sawk. <sup>14</sup>Man tie khankix ka siviex lawng tix plak, tak kieh nawh koe kao phuan sawk ka plak in mai rong nawh loe rong mai daux jhup jaong loe mu. <sup>15</sup>Ka plakan tix plak kieh man tie koe kao phuan sawk mai rong nawh loe rong mai daux jhup jaong loe mu. <sup>16</sup>Son diang siviex lawng vungviang biang nyiex buan, tak kieh man tie koe kah, plak lang tixnga sawk mai kieh mawh man pa klai raoma, man pa lung plieux mai man pa raoh rawt, pa hoik taing tix ka keei ceu pa mhawm khaing cao pa taing man. Ankix tak koerongpon rong mai daux jhup jaong pon mu.” <sup>17</sup>Can rong khaox pa koe vungviang biang, tak kieh nawh koe lat pa yuh ka mau khawmuik. Grokkhankix kawx, tak mawh pa yuh ka mau mai daux jhup jaong ankix, tak kieh mawh pa yuh ka tawng. <sup>18</sup>Krax lang man tie vungviang biang, tak kieh koe tix yieh sawk, krax vieh tak kieh koe tixphan sawk khawmuik mai krax lhaong tak kieh koe phuan sawk pa hoik taing tix ka keei ceu pa mhawm, yuh daux jhup jaong khankix ka

tawng heue. <sup>19</sup>Can kraung pa shiao son nyiex gox buan man khawmuik mai lhak khawmuik mai lhak pa shiao son vungviang biang, tak kieh an mawh pa yuh ka tawng.

***Grawng Priex Ka Jawk Ten Khri***

*(Krub 24:1-4)*

<sup>20</sup>“Maix tak tawx gumlox tix ka pui Isarelaux khankix, sonsang viex kix bee pa singax pa krid khaing plix khaox Sanlun, son pa riieng mai sonsang kieh jawk ten khri riieng ang jud ang jai. <sup>21</sup>Kieh bang kum ka daux nyiex gox buan man an koe ka praix man tie ka sivoie ngai teug pa kham mhairug, Arun mai kawn simex nawh khankix tak cox rien kawng ngu tan, jah plak bo tom hoek plak ponggawb sivoie Siyiex. An tak mawh beenli ka doeh ru pui Isarelaux khankix leeingju heue.

***Kraung Ceep Cao Giex Kaing Li***

*(Lih 39:1-31)*

**28** “Maix tak teei puxke tix Arun, khawm kawn simex nawh khankix khaingdaux pui Isarelaux, sonsang mawh kix pui pa yuh kaing cao giex kaing li son Aux. Arun mai kawn simex nawh Nadat, Abihux, Elaza, Itama tak mawh cao giex kaing li greem maix. <sup>2</sup>Maix tak yuh kraung ceep pa singax son puxke maix Arun, sonsang mawh pa koe min plakngai mai pa mhawm grang. <sup>3</sup>Maix tak krai lox ka pui pa koe pingnya khankix pa hoik kieh Aux naog ka rhawmrhi pingnya pa chix tawng mai kix tak yuh kraung ceep Arun sonsang kieh mawh pa singax son nawh. Nawh tak mawh pui pa yuh kaing jhaw cao giex kaing li son Aux. <sup>4</sup>Inkix tak mawh kraung ceep pasang yuh kix, pa mawh man tie naok tix plah, sibex dhah dawd taix plak daux tix pheem, sibex lang plak praix tix pheem, sibex dawd taix pa mhawm taing tix pheem, man lawk kaing tix pheem mai man rawd nyoi tix mu. Mawh kheu nan, kix tak yuh kraung ceep pa singax son puxke maix Arun mai kawn simex nawh khankix, sonsang yuh kix kaing jhaw cao giex kaing li son Aux. <sup>5</sup>Kix tak teei khri mai keei pa klai raoma mai pa lung plieux mai pa raoh rawt mai man ceu pa mhawm, <sup>6</sup>kix yuh sibex dhah dawd taix ka keei mai khri, khawm

man pa klai raoma, man pa lung plieux, man pa raoh rawt mai man pa mhawm taing pa nie blon mhawm khaing paox tix. <sup>7</sup> Sibex dhah dawd taix an tak koe maox rawd piang klip ra nyaing mai kieh toh an khawm ra plak kleuk paox tix sonsang toe tau. <sup>8</sup> Man tie naok pa koe piang sibex dhah dawd taix an, tak mawh pa taing ka keei khri mai keei pa klai raoma mai pa lung plieux mai pa raoh rawt mai man ceu pa mhawm. <sup>9</sup> Maix tak teei simaox siang bawd raoh ra mu mai saik ti deuh ceukaux kawn simex Isarela khankix ka piang an. <sup>10</sup> Kieh ceukaux kix liah kaux koe ka piang simaox tix khlawp mai ceukaux pa kawn deuk an liah kaux koe ka piang simaox an tix khlawp awm jhong keh kix. <sup>11</sup> Kieh cang mhaw saik ti deuh ceukaux kawn simex Isarela khankix ka piang khlawp simaox khawm ra khlawp, maix tak priex an dau jawk aw khri. <sup>12</sup> Maix tak kawb simaox an ra khlawp ka piang klip sibex dhah dawd taix khawm ra plak mai priex awm simaox pa sang dohkeud kix ka kawn simex Isarela. Arun tak viex ceukaux kix sivoe Siyiex ka piang klip nawh khawm ra khawn, sonsang mawh krax pa dohkeud ka.” <sup>13</sup> Maix tak yuh jawk aw simaox an ka khri, <sup>14</sup> maix tak yuh maox khri pa mhawm ra nyaing awm maox duing mai phiawk ti deuh maox pa hoik duing an ka jawk aw simaox. <sup>15</sup> “Maix tak yuh man tie naok, sonsang shiao bawg yam prawng see, yuh awm sibex dhah dawd taix pa taing ka keei khri pa klai raoma, pa lung plieux mai pa raoh rawt man ceu pa blon mhawm taing khaing paox tix. <sup>16</sup> Man an tak yuh koe ra gawp mai kieh krax lang koe tix diex, krax vieh tix diex mai kieh daog sidu khawm pon plak. <sup>17</sup> Maix tak sau siang simaox ka piang man tie naok an pon rhoi, rhoi tix tak mawh siang simaox raoh, siang simaox Utapharax, siang simaox raoh kiien. <sup>18</sup> Rhoi ra tak mawh siang simaox pa klai, siang simaox pa klai riex mai siang simaox kiien. <sup>19</sup> Rhoi loe tak mawh siang simaox klai singi, siang simaox bawd paing mai siang simaox raoh klai. <sup>20</sup> Rhoi pon tak mawh siang simaox raoh toh, siang simaox paing pau mai siang simaox toh rieng, siang simaox ankix khawmuik tak priex dau jawk aw simaox khri. <sup>21</sup> Ka piang siang simaox ankix, tak kieh ceukaux kawn praix Isarela khankix koe kah awm koe ceukaux kix kao ra kaux. Ka piang siang simaox an tix mu, tak kieh kix saik ti

deuh ceukaux cum kao ra mu. Siang simaox ankix tak kieh koe awm doeh ru kix kao ra cub. <sup>22</sup> Maix tak yuh maox koe ka toh man tie naok, ka maox khri mhawm pa duing tix tau. <sup>23</sup> Maix tak yuh dau jhup khri ra mu pa koe dau son man tie naok an mai tok dau jhup khri ra dau ka toh man tie naok khawm ra plak. <sup>24</sup> Khaix an maix tak sau maox khri pa hoik duing tix ra mu ka dau jhup khri pa koe ka toh man tie naok an. <sup>25</sup> Toh maox khri pa duing kliien ra nyaing tak phiawk ti deuh ka aw simaox ra mu ka piang maox rawd piang klip, pa koe ka sibex dhah dawd taix an plak sivoe ngai. <sup>26</sup> Maix tak deeh yuh dau jhup khri ra mu mai sau nawh ka piang toh man tie naok an ra plak ka daog plak dau sibex dhah dawd taix. <sup>27</sup> Maix tak baoux yuh dau jhup khri ra mu mai sau ka piang maox rawd piang klip ra mu ka plak greem sibex dhah dawd taix ka plak sivoe ngai. Kieh gawng caing sitioe paox tix, ka plak dee kleuk gawng caing pa taing kix sibex dhah dawd taix an. <sup>28</sup> Kix tak sitioe dau jhup khri pa koe piang man tie naok an, ka dau jhup maox khri pa koe ka sibex dhah dawd taix. Kieh kix sitioe nawh ka maox keei pa klai raoma mai kieh an koe ka plak piang gawng caing pa hoik taing kix ka sibex dhah dawd taix, sonsang ang man tie naok an chix gah ti hu khaing sibex dhah dawd taix. <sup>29</sup> Arun tak viex man tie naok prawng see pa koe ceukaux kawn simex pui Isarela khankix ot ka piang dieb rhawm tix, yam laig nawh ka dee singax sonsang mawh krax pa dohkeud ka sivoe ngai Siyiex ku bawgyam heue. <sup>30</sup> Nawh tak sau Urim mai Tumin ka dau man tie naok prawng see an, ankix tak koe ka piang dieb rhawm Arun, yam hu nawh ka plak sivoe ngai Siyiex. Mawh kheu nan, Arun tak viex krax prawng see piang dieb rhawm tix, son kawn praix Isarela khankix ka plak sivoe ngai Siyiex jheeng jheeng heue.

### ***Sibex Pa Ceep Cao Giex Kaing Li***

<sup>31</sup> “Maix tak yuh sibex dhah dawd taix jiet khaw peung ka man klai raoma. <sup>32</sup> Kieh plak kaing koe dau ceep sigreung mai kieh man pa hoik taing an kawb hawt vungviang moing dau ngawg sibex dhah dawd taix an tix gawng son ang lai chix

griah. <sup>33</sup> Maix tak sau plix sibex pa lawmle khankix pa yuh ka man pa klai raoma, man lung plix, man raoh rawt hawt vungviang caong sibex dhah dawd taix an. Kieh plix hing khri koe ka sinax plix lawmle an. <sup>34</sup> Kieh plix hing khri tix mu mai plix sibex pa awm plix kla jiang tix mu, khan sinax paox tix ka piang hawt vungviang caong sibex dhah dawd taix ceep kix ku plak. <sup>35</sup> Arun tak ceep ka sibex dhah dawd taix in yam yuh nawh kaing jhaw Siyiex mai lox luah ankix, tak kieh pui mhong yam laig nawh ka dee pa singax singeh sivoie ngai Siyiex, khawm yam deeh lih nawh ka plak praix sonsang tawng grawng nawh ang yum kah. <sup>36</sup> Maix tak deeh baox yuh khlawp plah khri tix khlawp mai saik ngai lai ka piang pa awm cum tix mu pa ah nin, "Kieh mawh pa singax singehson Simiang Siyiex.

***Krax Pa Singax Singeh Son Siyiex***

<sup>37</sup> Maix tak phiawk ka maox pa klai raoma mai kieh koe ka piang man lawk kaing an ka plak sivoie ngai. <sup>38</sup> Khlawp plah khri an tak koe ka piang dong re Arun, sonsang mawh Arun cao pa klawm phimap pa dex mai pa tan pa singax pui Isarelaix mai viex hoek sigrhah kah, sonsang mawh krax tan pa singax mai khlawp khri an kieh ot piang dong re Arun jheeng jheeng, sonsang pon mawh kix pa rieb ti teei ka sivoie ngai Siyiex. <sup>39</sup> "Maix tak taing sibex dhah dawd taix ceep nawh plak daux ka keei ceu pa mhawm. Maix tak yuh lawk kaing ka man ceu pa mhawm mai maox rawd nyoi ka man pa hoik taing tix ka rawm rawn kuceu pa blon mhawm khaing paox tix. <sup>40</sup> "Maix tak yuh sibex dhah dawd taix son kawn simex Arun khankix mai maix tak yuh maox rawd nyoi son kix. Maix tak baox yuh mhok pa koe min plakngai mai pa mhawm grang. <sup>41</sup> Maix tak ceep ankix ka piang puxke tix Arun mai ka piang kawn simex nawh khankix. Maix tak groi rawm bee ka kix, appong kix mai kieh kix singax sonsang mawh kix pa yuh kaing jhaw cao giex kaing li son Aux. <sup>42</sup> Maix tak caing kix ceep khlawp ka man sonsang kheem kix krax kaig tua tix, jah ka nyoi tom hoek ka ba. <sup>43</sup> Kraung ceep ankix tak koe ka piang Arun mai kawn simex nawh khankix yam hoek kix ka daux nyiex gox buan man bang kum pui hun, phan ang mawh nan, kix tak ceep kraung ankix yam hoek kix hawt dex khu dee tan son kaing jhaw Siyiex ka dee pa singax, son

ang kix koe phimap mai yum. In mawh grawng beenli pa caw nawh, khawm doeh ru nawh ti yuh leeingju heue.

***Krax Appong Arun Mai Kawn Nawh***

**29**

*(Krub 8:1-36)*

"Inkix tak mawh grawng pa sang yuh maix ka kix, sonsang yuhkaing pa singax pa mawh kaing jhaw cao giex kaing li son Aux. Teei kawn mawie mhaing tix mu mai kawn yung mhaing ra mu pa mhawm loig. <sup>2</sup> Blah pa ang sau susaix mai blah pa kluklao mai bee pa ang sau susaix mai blah rhi khlawp pa sau bee mai pa ang sau susaix. Maix tak yuh blah an ka mien gaox nghox ca. <sup>3</sup> Maix tak sau blah an ka daux khrawng tix mu mai viex hoek tau mai kawn mawie mhaing mai kawn yung iak ra mu. <sup>4</sup> Arun mai kawn simex nawh khankix tak kieh kix hoek daux diang siviex nyiex gox buan man bang kum pui hun. Maix tak kieh kix heem rawm. <sup>5</sup> Maix tak tawx Arun ceep kraung pa mawh sibex dhah plak daux tau mai sibex dhah dawd taix mai man tie naok mai kieh nawh rawd maox rawd nyoi pa nie blon mhawm taing, pa koe ka sibex dhah dawd taix an. <sup>6</sup> Maix tak ceep man lawk kaing ka piang kaing nawh mai sau mhok khri pa singax ka piang man lawk kaing an. <sup>7</sup> Maix tak teei bee mai groi ka piang kaing nawh, <sup>8</sup> maix tak viex kawn simex nawh khankix hoek mai ceep kix cie sibex dhah plak daux. <sup>9</sup> Maix tak rawd maox rawd nyoi ka nyoi Arun mai kawn simex nawh khankix mai ceep kix cie mhok, kraung ceep cao giex kaing li khankix tak mawh cie kix awm mhairug gumlox beenli leeingju. Mawh kheu nan maix tak appong kaing jhaw cao giex kaing li ka Arun mai kawn simex nawh khankix. <sup>10</sup> "Maix tak viex mawie mhaing an, hoek ka daux bang kum pui hun sivoie nyiex gox buan man mai Arun khawm kawn simex nawh khankix tak deuh taix tix ka piang kaing mawie mhaing an. <sup>11</sup> Khaix an, maix tak suat mawie mhaing an sivoie ngai Siyiex hawt diang siviex laig bang kum pui hun daux nyiex gox buan man. <sup>12</sup> Maix tak teei nham mawie mhaing an tix blah ka giien taix tix mai kraix ka piang rung khu dee tan maix tak hieh nham pa kawn deuk ka praok caong khu dee tan khawmuik heue. <sup>13</sup> Maix tak teei

bee pa kheem kraung vaig, bee pa kheem ka piang tawm mai bee pa koe piang soklax mai khawm soklax an ra mu, maix tak deuh an khankix ka piang khu krub dee tan mai gleeing ka ngu. <sup>14</sup> Phan mawh nex mawie an, hak khawm roing khankix maix tak gleeing nawh ka ngu ka plak praix nyiex bang, in mawh son krax tan pa pluatploi phimap. <sup>15</sup> “Maix tak teei yung mhaing tix mu, kieh Arun mai kawn simex nawh khankix deuh taix tix ka piang kaing yung mhaing an. <sup>16</sup> Maix tak suat yung an, teei nham nawh mai phruah ka praok vungviang khu dee tan. <sup>17</sup> Khaix an maix tak pat nex yung khik mawx khik an mai sigrah kraung vaig mai caong khankix ka rawm mai sau ti deuh khik nex mai kaing tau. <sup>18</sup> Maix tak gleeing nex yung an kix khawmuik ka piang khu deetan. An mawh krax tan pa gleeing son Siyiex pa sioe baux mai an mawh krax tan pa gleeing tix ka ngu son Simiang Siyiex. <sup>19</sup> “Maix tak baux teei yung mhaing an tang mu, kieh Arun mai kawn simex nawh khankix deuh taix tix ka piang kaing yung an. <sup>20</sup> Khaix an maix tak pah yung an, teei nham nawh tixblah mai kraix ka piang dawng yhaok plak dawm Arun mai ka piang dawng yhaok plak dawm kawn simex nawh khankix mai ka piang giien ting taix khawn dawm kix mai ka piang giien ting caong khawn dawm kix mai phruah nham ankix khawmuik hawt vungviang praok khu dee tan. <sup>21</sup> Maix tak teei nham pa koe ka piang khu dee tan tixblah mai bee tixblah phruah ka piang Arun mai kawn simex nawh khankix mai ka piang kraung ceep kix, tokaux cao nawh mai kraung ceep nawh tak kieh singax mai tokaux kawn simex nawh khankix mai kraung ceep kix tak kieh singax. <sup>22</sup> “Maix tak teei bee yung mai sidax mai bee pa kheem ka piang kraung vaig, bee pa kheem ka piang tawm mai soklax ra mu mai bee pa koe ka piang soklax mai ba taix khawn dawm, in mawh yung pa hoik appong ti tan son Ara kix. <sup>23</sup> Maix teei blah tix lon, blah tix lon pa hoik kluklao tix mai bee, blah pa rhi khlawp tix khlawp, pa mawh blah pa ang sau susaix khaing daux kraung pa koe siove ngai Siyiex. <sup>24</sup> Maix tak sau inkix khawmuik ka daux tawm taix Arun mai ka daux tawm taix kawn simex nawh khankix, kieh mawh krax tan pa yangyeuh mai yangyeuh siove Siyiex. <sup>25</sup> Maix tak

deeh rieb ti teei ankix khaing daux tawm taix kix mai gleeing ka ngu ka piang khu dee tan krax tan pa gleeing, pa sioe bhawng ka siove Siyiex, mawh krax tan pa gleeing ka ngu son Siyiex. <sup>26</sup> “Maix tak teei naok yung mhaing pa hoik appong son ara Arun, kieh mawh krax tan pa yangyeuh siove Siyiex, naok an tak mawh son cie maix. <sup>27</sup> Khaing yung mhaing pa hoik appong an, maix tak kieh nex naok pa yangyeuh khaing pa hoik yangyeuh mai krax tan pa yaog khawm ba, pa hoik yaog mawh pa singax. Ankix tak mawh son Arun mai kawn simex nawh khankix, <sup>28</sup> an tak mawh krax tan pa kaoh khaing kawn praix Isarelux son Arun mai kawn simex nawh khankix leeingju heue. Mawh kheu krax tan pa yaog pa kaoh khaing kawn praix Isarelux, khaing pa hoik appong kix ka krax tan pa nhim, ankix tak mawh krax tan pa yaog son Siyiex. <sup>29</sup> “Kraung ceep pa singax Arun, tak mawh cie kawn simex nawh khankix khaix nawh sax, kix tak ceep yam groi bee ka kix mai yam appong kix tokaux tix, ka kaing jhaw cao giex kaing li. <sup>30</sup> Kawn simex pa plud ti mawh cao giex kaing li tang nawh, tak ceep kraung ankix aliah singaix, yam laig nawh ka daux nyiex gox buan man bang kum pui hun, sonsang yuh nawh kaing jhaw Siyiex ka dee pa singax. <sup>31</sup> “Maix tak teei nex yung mhaing pa hoik appong son Ara mai ngaik ka dee pa singax. <sup>32</sup> Khaix an Arun mai kawn simex nawh khankix, tak ih nex yung mhaing mai blah pa koe daux khrawng hawt diang siviex nyiex gox buan man bang kum pui hun. <sup>33</sup> Kix tak ih ceu ankix pa pluatploi phimap sonsang appong kix tokaux tix mai kieh kixmawh pa singax. Viang mawh nan, pui tang kaux tak ang pon ti ih, mawh kheu ceu ankix mawh pa singax. <sup>34</sup> Phan nex pa hoik appong son ara mai blah pa kawn deuk tom hoek plak ponngawb, maix tak gleeing ti tik ka ngu. Kheu mawh pa singax mai pui mawx kawx, tak ang pon ti ih. <sup>35</sup> “Mawh kheu nan maix tak yuh ankix ka Arun mai kawn simex nawh khankix, awm gumlox beenli pa hoik tawm Aux ka maix. Maix tak appong Ara kix tom hoek aliah singaix. <sup>36</sup> Maix tak tan mawie mhaing tix mu ku singaix, son krax tan pa pluatploi phimap, maix tak cox khre

khu dee tan an singax yam yuh maix krax pluatploi phimap tix maix tak awt ka bee sonsang deeh singax. <sup>37</sup> Daux aliah singaix maix tak yuh krax pluatploi phimap tix son khu dee tan mai kieh singax. Khu dee tan an tak mawh pa kied singax. Canceu pa hu teeh ka khu dee tan an, tak mawh pa singax heue.

**Krax Tan Son Ku Singaix** (Si 28:1-8)

<sup>38</sup> “Pa sang tan maix ka piang khu dee tan ku singaix, mawh kawn yung pa naog tix num ra mu, <sup>39</sup> Maix tak tan kawn yung tix mu, plak ponngawb mai kawn yung an tix mu plak bo. <sup>40</sup> Pa tan tau mai kawn yung tix mu, tak mawh mien nghox ca im kao son tix son tix epha pa klao tix tau mai bee khaox Sanlun pon son tix son pa mawh tix Hing mai rawm plix siiet pon son tix son pa mawh tix Hing, son krax tan pa nyaux. <sup>41</sup> Kawn yung an tix mu tak mawh pa tan plakbo, maix tak tan tau mai krax tan ceu pa ih mai krax tan pa nyaux, awm plak ponngawb, son pa sioe bhawng pa mawh krax tan pa gleeing tix ka ngu son Siyiex. <sup>42</sup> In tak mawh krax tan pa gleeing sijheeng son doeh ru pex ku ju, ka diang siviex nyiex gox buan man bang kum pui hun sivoie Siyiex, Aux sang yaox pex mai sikah tau mai pex tan. <sup>43</sup> Aux tak yaox kawn praix Isarela khankix tan mai nyiex gox buan man an tak singax kheu min plakngai Aux. <sup>44</sup> Aux tak kieh nyiex gox buan man bang kum pui hun mai khu dee tan singax, Aux tak kieh Arun mai kawn simex nawh khankix singax mai kieh kix yuh kaing jhaw cao giex kaing li son Aux. <sup>45</sup> Aux tak ot sinax kawn praix Isarela khankix mai mawh Siyiex kix. <sup>46</sup> Kix tak tawng mawh Aux Siyiex kix, pa viex kix lih khaing haktiex Ejiptux. Aux tak ot sinax kix mai Aux tak mawh Siyiex kix heue.”

**Khu Dee Tan Nyawng Bhawng**

(Lih 37:25-28)

**30** “Maix tak yuh khu dee tan ka khaox Akashax, sonsang gleeing nyawng bhawng ka piang an. <sup>2</sup> Krax lang kieh koe tix sawk mai krax vieh tix sawk mai kieh sidu khawm pon daog mai krax lhaong tak kieh koe ra sawk. Rung kawx tak mawh pa kleuk tix tau mai nawh. <sup>3</sup> Maix tak om khri pa mhawm plak piang hawt vungviang praok an khankix mai rung

nawh khankix maix tak kawb kraung khri ka praok vungviang khawmuik. <sup>4</sup> Maix tak yuh daux jhup khri ra mu son an, greem dee kawb tix kraung khri khawm ra plak. Maix tak deuh ankix ka praok khawm ra plak mai an tak mawh dee sau kix ti giex khaox glawm sonsang mawh dee klawm kix kah. <sup>5</sup> Maix tak yuh khaox glawm ka khaox Akashax mai om nawh ka khri. <sup>6</sup> Maix tak deuh an sivoie man tieb teug pa kham mhairug see dang ngeung krax cauxrhawm, ka teug pa kham mhairug dee sang yaox Aux maix. <sup>7</sup> Arun tak gleeing nyawng bhawng ka piang an ku ngawb, yam cox nawh ka kawx ngu khankix mai nawh tak gleeing nyawng bhawng ka piang an. <sup>8</sup> Yam tok Arun kawx ngu khankix plak bo, nawh tak gleeing nyawng bhawng ka piang an sivoie Siyiex, pa mawh nyawng bhawng pa gleeing jheeng jheeng son doeh ru maix ku ju. <sup>9</sup> Maix tak ang pon ti gleeing nyawng bhawng pa ang khaw ka piang an. Krax tan pa gleeing anghah, krax tan ceu pa ih anghah mai krax tan pa lhauk pa nyaux anghah maix tak ang pon ti yuh ka piang an. <sup>10</sup> Arun tak yuh krax tan pa pluatploi phimap ka piang rung khu dee tan an tix num tix bawg tau mai nham krax tan son krax pluatploi phimap. Nawh tak yuh krax pluatploi phimap ka piang an tix numtix bawg, in mawh beenli ka son doeh ru maix ku ju. Khu dee tan an mawh pa kied singax singeh son Siyiex heue.”

**Grawng Mau Pluatploi Phimap**

<sup>11</sup> Siyiex ah nin ka Mose, <sup>12</sup> “Yam teei maix ca rang ceu pui Isarela khankix grawng koe kix miexding, khaix an pui kukaux tak yaox ti tawx mau pa taoh ju tokaux tix ka Siyiex yam simin maix kix. An mawh son ang krax kharhawm lai koe sinax kix yam simin maix kix. <sup>13</sup> Can pui pa hoik laig carang kukaux tak tawx mau tix plak Shekhe awm mau Shekhe pa hoik appong kix ti tan, mau Shekhe tix plah koe tixnga Gerax. Mau tix plah Shekhe tak mawh pa tan ka Siyiex. <sup>14</sup> Pui pa hoik teei kix carang kukaux, jah tixnga num haok ka piang, tak tawx krax tan ceu an ka Siyiex. <sup>15</sup> Cao mitak ang yaox ti tawx lheu mai pui pahot siatakang yaox

ti tawx yawm khaing tix plak Shekhe yam tawx maix krax tan tix ka Siyiex. Sonsang yuh maix krax pluatploi phimap tokaux tix. <sup>16</sup> Maix tak teei mau tan pa pluatploi phimap ceu pui Isarelax khankix ka tix mai deuh mawh pa shiao son nyiex gox buan bang kum pui hun, an tak mawh krax pa dohkeud ka ceu pui Isarelax khankix sivoe Siyiex, sonsang yuh kix krax pluatploi phimap mai taoh ju tokaux tix.”

### **Pan Khoek Pa Yuh Ka Tawng**

<sup>17</sup> Siyiex ah nin ka Mose, <sup>18</sup> “Maix tak yuh pan khoek mai yuh caong nawh ka tawng sonsang khoek kah. Maix tak deuh nawh sinax nyiex gox buan man bang kum pui hun mai khu dee tan, maix tak sau rawm ka daux. <sup>19</sup> Arun mai kawn simex nawh khankix, tak khoek taix caong tix ka rawm an. <sup>20</sup> Yam laig kix daux nyiex gox buan man bang kum pui hun, phan ang mawh nan, yam hoek kix ka khu dee tan, sonsang yuh kaing krub ka Siyiex mai yam gleeing kix krax tan tix ka ngu son Siyiex, kix tak khoek tix ka rawm an, son ang kix yum kah. <sup>21</sup> Mawh kheu nan, kix tak khoek taix caong tix son ang kix yum, an tak mawh gumlox beenli son nawh maison doeh ru nawh khankix, tom hoeksidah leeingju heue.

### **Bee Groi Nyawng Bhawng**

<sup>22</sup> Siyiex deeh ah nin ka Mose, <sup>23</sup> “Baox teei nyawng bhawng son tokaux maix, pa mawh Muran phuan yieh Shekhe, khaox cai hung pa sioe bhawng ra yieh tixphuan Shekhe, mex pa nyawm sioe bhawng ra yieh tixphuan Shekhe, <sup>24</sup> khaox cai hung phuan yieh Shekhe mai bee Sanlun tix Hing. <sup>25</sup> Maix tak teei ka bee groi pa singax singeh pa mawh bee groi pa hoik klao pui pa chix yuh ceu pa sioe bhawng mhawm mhawm. <sup>26</sup> Maix tak groi ankix ka nyiex gox buan man bang kum pui hun, teug sijax mukheu pa kham mhairug khanki, <sup>27</sup> pheen mai kraung shiao piang pheen khawmuik, pang jawk ten khri mai kraung shiao tau mai an mai khu dee gleeing kix ti tan nyawng bhawng, <sup>28</sup> khu dee tan krax tan pa gleeing mai kraung shiao tau mai pan khoek mai khawm caong nawh. <sup>29</sup> Maix tak kieh ankix singax singeh, sonsang mawh pa kied singax mai can pa teeh ka an tak pon pa singax. <sup>30</sup> Maix tak groi bee ka Arun mai kawn

simex nawh khankix mai appong kix, sonsang yuh kix kaing jhaw cao giex kaing li son Aux. <sup>31</sup> Maix tak kraih ah nin ka ceu pui Isarelax khankix, in tak mawh bee groi pa singax ka son Aux daux doeh ru pex ku ju. <sup>32</sup> Bee an tak ang pon ti kraix ka pui, maix tak ang pon ti yuh bee ceu pa awm an tix ceu kawx, an mawh pa singax mai tak deuh an mawh pa singax ka son maix. <sup>33</sup> Pui pa yuh ceu bee pa awm an, phan ang mawh nan, pui mawx pa kraix an ka pui pa ang mawh cao giex kaing li, tak teei ti tik nawh khaing pui ceunawh. <sup>34</sup> Siyiex ah nin ka Mose, “Teei ceu pa sioe bhawng, pa mawh peeh khaox Natap mai liox khaox pa sioe bhawng mai peeh khaox Galaban mai peeh khaox Lawban pa singax tau mai pa sioe bhawng khawmuik mai ciang sidu ceu mawx ceu an. <sup>35</sup> Maix tak yuh nyawng bhawng ka ceu inkix, kieh cao pa chix yuh klao tau mai kih sonsang kieh ankix singax. <sup>36</sup> Maix tak teei ceu ankix tixblah mai tah tom mien, deuh ka sivoe teug buan pa kham mhairug daux nyiex gox buan man bang kum pui hun ka dee sang yaox Aux maix tan. An tak mawh pa kied singax ka son pex. <sup>37</sup> Nyawng bhawng pa sang yuh maix in, maix tak ang pon ti yuh ka son tokaux tix, awm pa hoik klao kix ti yuh, pex tak sang deuh an mawh pa singax ka son Siyiex. <sup>38</sup> Pui mawx angah pa yuh nyawng bhawng awm an, sonsang ngheet kah, tak teei ti tik nawh khaing pui ceu nawh khankix heue.”

### **Sum Nyiex Gox Buan Man** (Lih 35:30-36:1)

**31** Siyiex ah nin ka Mose, <sup>2</sup> “Jhak heue, Aux tak laug ti kok ka ceukaux Bezalelax kawn simex Urix, pa mawh kawn simex Hurax ka daux doeh ru Yudax. <sup>3</sup> Aux hoik kieh khuan Siyiex naog ka daux nawh, tawx pingnya mai krax tawng mai krax keud mai son krax grawng pa chix yuh kaing khawmuik. <sup>4</sup> Sonsang min yuh nawh kaing jhaw khaox kraung pa mhawm, kraung khri, kraung mau, kraung tawng, <sup>5</sup> grawng kaing pa chix pat, chix klaing, chix kleuk siang simaox mai kaing pa chix saik khaox mai grawng kaing pa chix yuh nawh kuceu. <sup>6</sup> Aux hoik yaog Aholibax kawn simex Ahisamat doeh ru Dan yuh

kaing tau mai nawh. Aux tak tawx pingnya ka pui pa koe pingnya daux rhawm kix, sonsang pon yuh kix canceu pa tawm Aux ka kix, <sup>7</sup> pa mawh nyiex gox buan man bang kum pui hun mai teug pa kham mhairug mai dang ngeung pa cauxrhawm, pa koe ka piang an mai can kraung pa shiao kuceu daux nyiex gox buan man, <sup>8</sup> pheen mai kraung pa shiao tau mai pheen, pang jawk ten khri pa singax mai kraung pa shiao tau mai an mai khu dee tan pa tok nyawng bhawng, <sup>9</sup> khu dee tan kix krax tan pa gleeing tau mai kraung pa shiao ka an, pan khoeok mai caong pan khoeok, <sup>10</sup> kraung ceep yam yuh kaing krub ka Siyiex, kraung ceep pa singax son cao giex kaing li pa mawh Arun mai kraung ceep kawm simex nawh khankix, sonsang yuh kix kaing jhaw cao giex kaing li son Siyiex. <sup>11</sup> Bee groi mai nyawng bhawng son dee singax, kix tak yuh ceu an awm gumlox pa tawm Aux ka maix heue."

#### **Grawng Been Singaix Tuah**

<sup>12</sup> Siyiex ah nin ka Mose, <sup>13</sup> "Maix krai ka pui Isarelaux khankix ah nin, pex tak priex ka singaix tuah Aux, mawh kheu mawh mhairug sinax Aux mai pex leeingju, sonsang tawng pex mawh Aux Siyiex pex pa kieh pex singax. <sup>14</sup> Mawh kheu nan, pex tak priexrien ka singaix tuah mawh pa singax son pex. Can pui pa yieh singaix tuah an, tak kieh nawh yum tete. Grawh grawng nawh pui pa yuh kaing ka daux singaix an, tak teei ti tik khaing sinax pui ceu nawh khankix. <sup>15</sup> Yuh kaing daux liah singaix, viang mawh nan, ka daux singaix aliah, mawh singaix tuah klaung mai singaix laux tix mai mawh singaix pa singax son Siyiex. Pui pa yuh kaing ka daux singaix tuah, tak kieh nawh yum. <sup>16</sup> Mawh kheu nan, daux doeh ru ceu pui Isarelaux khankix tak priexrien ka singaix tuah mawh gumlox sijax mukheu leeingju. <sup>17</sup> An mawh mhairug sinax Aux mai ceu pui Isarelaux khankix leeingju. Grawh grawng nawh, ka daux liah singaix, Siyiex hoik yuh raoma mai haktiex mai ka daux singaix aliah Nawh Cao ang lai yuh kaing mai laux lee Tix heue." <sup>18</sup> Yam hoik sikah Nawh Cao tau mai Mose ka piang gawng Sina, Nawh Cao tawx khlawp simaox ra khlawp ka Mose, pa mawh lox tawm pingnyap pa hoik tiem Siyiex ka giien taix Tix heue.

32:1 Kawn 7:40. 32:4 Kawn 7:41. 32:6 1Kaw 10:7. 32:13 Yam 17:8, 22:16-17.

#### **Grawng Rieang Mawie Khri**

(Krub 9:6-29)

**32** Yam yaoux pui Isarelaux khankix ka rheeng Mose, ang lih khaing piang gawng, kix kraixkhrawm paoux tix hoek ka Arun ah nin, "Kaoh heue, yuh rieang siyiex ka son yix pa sang thong yix hu sivoie, mawh kheu viex Mose yix lih khaing haktiex Ejiptux, yix ang tawng ceu pa hoik lih ti mawh ka nawh." <sup>2</sup> Arun ah nin ka kix, "Peeik krim khri pa koe ka yaok moeng pex, kawm simex kawm sibun pex khankix mai viex hoek ka aux." <sup>3</sup> Mawh kheu nan, pui khawmuik peeik krim khri pa koe ka yaok tix mai viex hoek ka Arun. <sup>4</sup> Nawh rieb ti teei khri khaing daux taix kix mai nawh yuh grang pakpeung ka kraung taix tix mai raug ti tawx rieang kawm mawie. Khaix an kix ah nin ceu pui Isarelaux eue, in mawh siyiex pex pa viex pex lih khaing meung Ejiptux." <sup>5</sup> Yam yaoux Arun an, nawh sum khu dee tan ka sivoie kawm mawie an mai Arun pao lox ah nin, "Pasax mawh singaix pawie son Siyiex." <sup>6</sup> Singaix pasax kix kaoh caocao mai yuh krax tan pa gleeing mai krax tan pa nhim, pui khankix ngawm ti ih mai nyaux, khaix an, kix deeh kaoh mai yuh krax klieh krax nyiah. <sup>7</sup> Siyiex ah nin ka Mose, "Lih hu heue, grawh grawng nawh, pui maix pa hoik viex maix lih khaing haktiex Ejiptux khankix hoik yuh krax pa lauxleeing ka tokaux tix. <sup>8</sup> Kix hoik niied ti veeh hu khaing daux krax pa hoik tawm Aux ka kix. Kix hoik raug rieang kawm mawie son tokaux kix mai krub kah mai appong krax tan tix ka an ah nin, pui Isarelaux khankix eue, in mawh siyiex pa viex pex lih khaing meung Ejiptux." <sup>9</sup> Siyiex ah nin ka Mose, "Aux hoik yaoux pui inkix mai kix mawh ceu pui pa kiien ngawg tete. <sup>10</sup> Mawh kheu nan maix grham Aux, sonsang lih krax songrhawm Aux ka piang kix, Aux sang yuh kix lauxleeing. Aux tak kieh maix mawh ceu pui pa ting lhaong." <sup>11</sup> Mose khioxkhaw ka Siyiex ah nin, "Siyiex eue, Maix songrhawm ka piang pui Maix khankix yuh ka mawx? Pui inkix mawh pa hoikviex Maix lih khaing haktiex Ejiptux ka sibrawm pa ting lhaong Maix, khawm taix pa ting riang Maix. <sup>12</sup> Chix sang kieh pui Ejiptux pon ti kraih ah nin yuh ka mawx? Nawh Cao hoikviex

kix lih hu, sonsang yuh krax kharhawm kix mai sonsang pah Nawh kix daux tiag mai sonsang yuh kix lauxleeing ka piang haktiex. Deeh veeh krax songrhawm Maix Cao mai deeh tieh rhawm Maix ang tawx krax kharhawm ka pui inkix, son ceu pui Maix khankix liak. <sup>13</sup>Dohkeud ka Abraham, Icak mai Isarela pa mawh kawncau Maix khankix, pa hoik tiextu Maix Cao ti ah nin, Aux tak kieh doeh ru pex haohhun, awm simuing piang raoma long mai haktiex inkix khawmuik, pa hoik ah Aux ti tawx ka doeh ru kix mai kix tak mawh pui pa pon sinngao ankix leeingju” <sup>14</sup>Mawh kheu nan, Siyiex deeh dohkeud tiehloh rhawm tix mai ang lai tawx krax kharhawm pa hoik ah Nawh Cao tix sang yuh ka ceu pui Nawh khankix. <sup>15</sup>Mose veeh ti lih hu khaing ka piang gawng tau mai khlawp simaox ra plah, pa hoik tiem ka gumlox tawm pingnyap ka daux tawm taix nawh. Khlawp simaox an ra plah hoik tiem tix khawm ra plah. <sup>16</sup>Khlawp simaox ra plah an, hoik mawh kaing pa yuh Siyiex mai khaix taix pa tiem an, hoik mawh khaix taix pa hoik tiem hoik pawd Siyiex ka piang khlawp simaox an. <sup>17</sup>Yam mhong Yawsux ka lox sinum riagy pui khankix, nawh ah nin ka Mose, “Lox sinum naing koe daux nyiex bang.” <sup>18</sup>Mose deeh ah nin, “Lox ankix ang lai mawh lox riagy kix grawng pex tix naing, ang lai mawh lox pa yiim kix grawng som tix naing, awm pa mhong aux lox ankix mawh lox rhax kix lai.” <sup>19</sup>Yam hoek nawh dex nyiex bang dommawx doman, nawh yaox ka riang kawm mawie mai krax graoh krax klieh kix mai Mose songrhawm mai taing ti tik khlawp simaox an pa koe daux taix nawh mai pah max ka greem caong gawng. <sup>20</sup>Khaix an nawh teei rieang kawm mawie pa hoik yuh kix mai gleeing ka daux ngu, krid tom mien mai rhuat ankix ka piang rawm mai kieh pui Isarela khankix nyaux kah. <sup>21</sup>Mose ah nin ka Arun, “Pui inkix yuh patix ka maix, lai kieh maix viex phimap pa ting hoek ka piang kix yuh ka mawx?” <sup>22</sup>Arun tom ah nin, “Paw nyang kieh krax songrhawm simiang aux lih ha liak. Maix hoik tawng koe krax pa caox ka daux rhawmrhi pui inkix. <sup>23</sup>Kix ah nin ka aux, yuh rieang siyiex son yix, pa sang thong yix hu sivoe, mawh kheu Mose cao pa viex yixlih

khaing haktiex Ejiptux, yix ang lai tawng ceu pa hoik lih ti mawh ka nawh. <sup>24</sup>Aux ah nin ka kix, “Can pui pa koe krim khri kieh peeik kah, kix tom tawx ka aux mai aux sau ka daux ngu mai lih ti mawh rieang kawm mawie.” <sup>25</sup>Yam yaox Mose ka ang pui khankix ceep kraung, kheu Arun hoik yuh kix ot kahkaong mai kieh kix tua sivoe pui koeng kix khankix heue. <sup>26</sup>Mose cung daux diang siviex nyiex bang kix ah nin, “Pui mawx pa ot plak Siyiex, kieh nawh hoek ka aux” mai kawm simex Lewix khankix khrawm paox tix hoek ka nawh. <sup>27</sup>Nawh ah nin ka kix, “Siyiex pa mawh Siyiex ceu pui Isarela ah nin, kieh pui kukaux tang giieb vaid ka nyoi tix mai hu lailing ka daux nyiex bang, laig ka daux siviex nyiex in tom hoek ka siviex nyiex an mai kieh pui kukaux pah ka puxaik tix, paox grawm tix mai paox plawg tix kukaux.” <sup>28</sup>Kawm simex Lewix khankix yuh awm pa kra Mose mai pui khankix yum been loe rheng kaux ka daux singaix an heue. <sup>29</sup>Mose ah nin, “Tang yuh tokaux tix singax mai appong ka Siyiex daux singaix, sonsang tawx Nawh buanson ka piang pex, mawh kheu hoik tiehfeen pui kukaux ka kawm simex tix mai puxaik tix.” <sup>30</sup>Singaix khaix, Mose ah nin ka pui khankix, “Pex hoik lud mai yuh phimap pa ting, mawh kheu nan, yam in aux sang deeh haok piang gawng ka Siyiex, sonsang deeh pon aux ti yuh krax pluatploi son phimap pex.” <sup>31</sup>Mose deeh hoek ka Siyiex ah nin, “Pui inkix hoik lud mai yuh phimap pa ting mai hoik yuh rieang siyiex khri son tokaux tix. <sup>32</sup>Phan Maix Cao koe rhawm ti pluatploi ka phimap kix pluatploi liak. Viang mawh nan, phan Maix Cao ang koe rhawm, aux rawg Maix preet ceukaux aux khaing daux phuk lai pa hoik tiem Maix Cao liak.” <sup>33</sup>Siyiex deeh ah nin ka Mose, “Pui mawx ang ah pa hoik lud ka Aux, Aux tak preet ceukaux nawh khaing daux phuk lai Aux. <sup>34</sup>Yam in deeh hu mai thong pui in hu ka dee pa hoik tawm Aux ka maix, jhak heue, kawncau Aux tak hu ka plak sivoe maix, yuh ka mawx angah, ka daux singaix yam hoek Aux ti tawx krax ciyang, Aux tak hoek ti tawx krax ciyang ka piang kix, son phimap pa

pa yuh kix.”<sup>35</sup> Siyiex tawx krax kharhawm jhawm saux preng ka pui an khankix, kheu jao yuh kix rieng kawm mawie tau mai Arun.

### **33 Gumlox Piang Gawng Sina**

Siyiex ah nin ka Mose, “Lih hu khaing tin, maix khawm can pui pa viex maix lih khaing meung Ejiptux khawmuik hu ka haktiex pa hoik tiextu Aux ti tawx ka Abraham, Icak mai Yakop awmlax pa hoik krai Aux yuh nin, Aux tak sang tawx ankix ka son doeh ru maix.”<sup>2</sup> Aux tak ploik kawncaw Siyiex Aux hu sivoie maix mai Aux tak grheu ceu pui Khanan, ceu pui Amawrix, ceu pui Hittix, ceu pui Parazi, ceu pui Hiwix mai ceu pui Yebusix lih khaing tan.”<sup>3</sup> Hu ka haktiex dee lih rawm teeh mai rawm hia, Aux tak ang lai hu tau mai pex, phan ang mawh nan, Aux lhat ti yuh pex lauxleeing hawt krax, kheu mawh pex ceu pui pa kiien ngawg.”<sup>4</sup> Yam mhong pui ka lox grawng pa caox in, kix riagyo mai lauxrhawm tix mai pui tix kaux kawx ang lai ceep khaox kraung.<sup>5</sup> Grawh grawng nawh Siyiex hoik ah nin ka Mose, “Krai ka ceu pui Isarelaux khankix, pex mawh ceu pui kiien ngawg. Phan Aux pon ti laig daux sinax pex been tixvud tixcu mai Aux sang yuh pex lauxleeing, mawh kheu nan, yam in peik khaox kraung pa koe ka kaux pex, sonsang tawng Aux pa sang yuh tix ka pex.”<sup>6</sup> Ceu pui Isarelaux khankix peik khaox kraung pa koe ka tokaux tix, hawt caong gawng Hawrap tan heue.

### **Grawng Yaoux Mose Ka Siyiex**

<sup>7</sup> Mose sum nyiex gox buan man plak praix nyiex bang, ka dee singai khaing nyiex bang mai nawh kok an mawh nyiex gox buan man bang kum pui hun mai can pui kukaux pa sawg ka Siyiex, lih hu ka nyiex gox buan man bang kum pui hun, pa koe plak praix nyiex bang.<sup>8</sup> Yam lih hu Mose ka nyiex gox buan man yam mawx angah, pui kaoh cung kukaux hawt diang siviex tix mai jhak ka Mose tom laig nawh ka daux nyiex gox buan man.<sup>9</sup> Yam laig Mose ka daux nyiex gox buan man, rong paiawm lih cung ka diang siviex nyiex gox buan man, Siyiex sikah tau mai Mose.<sup>10</sup> Pui khawmuik yaoux ka cung rong paiawm hawt diang siviex nyiex gox buan man mai pui kukaux kaoh mai krub nawh

**33:19** Ro 9:15 **34:6, 7** Lih 20:5-6, Si 14:18, Pi 5:9-10, 7:9-10.

daux diang siviex nyiex gox tix.<sup>11</sup> Siyiex sikah tau mai Mose pakngai taw pakngai, awm pa sikah pui tau mai paoux grawm tix, khaix an, Mose deeh ing ka nyiex gox tix, mawh kheu nan, Yawsux kawm simex Nun ang lai lih hu khaing nyiex gox buan man heue.

### **Sijax Mukheu Siyiex**

<sup>12</sup> Mose ah nin ka Siyiex, “Jhak heue, Maix Cao hoik ah nin ka aux, viex pui inkix hu, viang mawh nan, Maix Cao ang nyang kieh aux tawng ka pui pa sang ploik Maix Cao hu tau mai aux. Maix Cao hoik ah nin ka aux, Aux tawng ka ceukaux maix mai maix hoik mawh pa pon buanson ka plak sivoie ngai Aux.<sup>13</sup> Phan aux mawh pa pon buanson ka sivoie ngai Maix, aux rawg mhaing Maix jhi aux yaoux daux krax Maix Cao, sonsang tawng aux ka Maix Cao mai sonsang pon aux buanson ka sivoie ngai Maix Cao mai dohkeud ka pui inkix mawh ceu pui Maix Cao.”<sup>14</sup> Nawh Cao ah nin, “Aux tak hu tau mai maix mai Aux tak tawx maix lauxlee tix.”<sup>15</sup> Mose deeh ah nin ka Nawh Cao, “Phan Maix Cao ang hu tau mai yix, paw doh viex yix lih khaing tin liak.<sup>16</sup> Ceu pui Maix Cao mai tokaux aux, pui tang ceu tak sang tawng krax pa pon yix buanson ka sivoie ngai Maix Cao ka grawng ceu patix lie? Mawh kheu hu Maix Cao tau mai yix mai kieh yix tang siyox khaing ceu pui tang ceu pa ot ka piang ca haktiex in ang mawh lie?”<sup>17</sup> Siyiex ah nin ka Mose, “Aux tak yuh ceu inkix, pa hoik rawg mhaing maix, mawh kheu hoik pon maix buanson ka plak sivoie ngai Aux mai Aux tak tawng ka ceukaux maix.”<sup>18</sup> Nawh ah nin “Yuh buanson jhi aux yaoux min plakngai Maix Cao liak!”<sup>19</sup> Nawh Cao ah nin “Aux tak kieh pa mhawm Aux hu sivoie ngai maix mai Aux tak kieh lox krai pao ceukaux Simiang Siyiex lih sivoie maix. “Aux tak yuh buanson ka pui pa simie Aux ti yuh buanson kah mai Aux tak cauxrhawm ka pui pa simie Aux tix cauxrhawm kah.”<sup>20</sup> Viang mawh nan, Nawh Cao ah nin, “Maix ang pon ti yaoux ka pakngai Aux, grawh grawng nawh pui pa yaoux ka pakngai Aux, pa im ju tak ang koe pie tix kaux kawx.”<sup>21</sup> Siyiex ah nin, “Jhak heue, koe dee ot dex Aux tin tix dah mai maix tak cung ka piang rang.”<sup>22</sup> “Yam kawm hu min

plakngai Aux, Aux tak sau maix ka dauh doh rang an mai tawb veei maix ka taix Tix, yam hu Aux hawt maix.”<sup>23</sup> “Khaix an, Aux tak deeh yawh taix Cao tix hoek mai maix tak yaoh ka plak blawg Aux. Viang mawh nan, maix tak ang pon ti yaoh ka pakngai Aux heue.”

**Mose Deeh Yuh Khlawp Simaox**

(Pi 10:1-5)

**34** Siyie x ah nin ka Mose, “Deeh saik khlawp simaox ra mu, awm khlawp simaox pa yuh sivo e nhaox mai Aux tak tiem gumlox Aux khankix ka piang khlawp simaox an, awm pa koe ka piang khlawp simaox pa hoik tik maix nhaox.<sup>2</sup> Mawh kheu nan, kieh khlawp simaox an hoik plak ponggawb pasax mai haok ka piang gawng Sina jhi tokaux maix ka Aux, ka piang choek gawng tan.<sup>3</sup> Pui mawx angah tak ang pon ti haok tau mai maix, tak ang pon ti ot dex vungviang gawng, pie cub kawn yung mai cub tobrie khankix kawx, tak ang pon ti sawm ribriem hawt caong gawng an.”<sup>4</sup> Mose saik khlawp simaox ra mu awm khlawp simaox pa yuh sivo e nhaox, Mose kaoh ponggawb caocao mai haok ka piang gawng Sina, awm gumlox pa hoik tawm Siyie x ka nawh, nawh viex khlawp simaox an ra mu ka dauh tawm taix tix.<sup>5</sup> Siyie x lih hoek ka dauh paiawm, cung tau mai Mose tan mai kra i pao ceukaux Siyie x.<sup>6</sup> Siyie x hu plak sivo e nawh mai kra i pao ah nin, “Simiang! Simiang Siyie x pa koe krax cauxrhawm mai pa koe buanson, pa koe krax lang rhawm mai pa grumnaog ka dauh krax moh mai pa mawhmeh,<sup>7</sup> pa priex krax cauxrhawm ka pui kaing rheng kaing mheen, pa pluatploi ka pa lud mai phimap pui khankix, yuh ka mawx kawx Nawh Cao ang doh pluatploi phimap ankix dauh krax pa mawh pa giexgoing, son phimap keeing nawh khankix, tak ciyang piang kawn praix nawh mai kawn saux kawn sex nawh tom hoek doeh ru nawh loe pon ju.”<sup>8</sup> Mose niied ti gup kaing tix piang tiex mai krub ka Nawh Cao<sup>9</sup> ah nin, “Phan aux hoik mawh pa pon buanson ka sivo e Maix Cao, Siyie x eue, aux rawg mhaing Maix Cao hu tau sinax yix, viang yix mawh ceu pui pa kiien ngawg kawx mai pluatploi phimap pa caox pa hoik yuh yix, khawm phimap tokaux yix mai teei yix mawh sinngao Maix Cao liak.”

**34:13** Pi 16:21 **34:17** Lih 20:4; Krub 19:4; Pi 5:8, 27:15. **34:18** Lih 12:14-20, Krub 23:6-8, Si 28:16-25.

**Sijax Mukheu Pa Deeh Cox**

<sup>10</sup> Nawh Cao ah nin “Jhak heue, Aux yuh gumlox sijax mukheu tix mu sivo e ngai pui inkix khawmuik, Aux tak yuh krax pa daoxam pa ang sax yuh ka dauh haktiex in mai ka ceu pui tix cub kawx. Pui tang ceu pa ot sivo e siveng maix, tak yaoh ka kaing pa yuh Siyie x. Mawh kheu krax pa yuh Aux ka pex mawh krax pa lhat graung kah heue.”

**Ang Pon Ti Krub Rieanggrang**

(Pi 7:1-5)

<sup>11</sup> “Deuh tix tawng can gumlox pa hoik tawx Aux ka maix dauh in singaix jhak heue, Aux tak grheu ceu pui Amawrix, ceu pui Khanan, ceu pui Hittix, ceu pui Pharazix, ceu pui Hiwix mai ceu pui Yebusix lih hu sivo e maix.”<sup>12</sup> “Rien rhawm tix paw lai yuh sijax mukheu tau mai ceu pui pa ot haktiex dee sang hu maix kah, phan ang mawh nan, Aux lhat kix mawh kie taong ka dauh sinax pex.”<sup>13</sup> “Viang mawh nan, maix tak yieh khu dee tan kix lauxleeng khawmuik mai raigti tik rong simaox rieanggrang pa krub kix mai kid ti tik rieanggrang pa mawh khaox krub kix khawmuik.”<sup>14</sup> “Maix tak ang pon ti krub ka siyie x tang kaux, mawh kheu kok ceukaux Siyie x mawh pa bak pa viang koeng ka pa caox, Nawh Cao mawh pa bak pa viang koeng ka pa caox heue.”<sup>15</sup> “Aux lhat maix yuh sijax mukheu tau mai can pui pa ot haktiex an mai pui khankix hawt yuh kaing krub ka siyie x kix mai lud kah mai yam appong kix krax tan tix ka siyie x kix mai pui tix kaux kaux khaing dauh kix, tak kok ka maix mai maix tak ih ka pa appong pa tan kix.”<sup>16</sup> “Lhat maix kieh kawn simex tix khankix teei kawn sibun kix mai hawt yuh krax lud tau mai siyie x kix mai kieh kawn simex maix khankix lud tau mai siyie x kix.”<sup>17</sup> “Ang pon raug ti yuh rieanggrang siyie x son tix.”

**Pawie Loe Ceu** (Lih 23:14-19; Pi 16:1-17)

<sup>18</sup> “Maix tak priexrien ka pawie blah pa ang koe susaix, maix tak ih blah pa ang koe susaix ka dauh aliah singaix awm gumlox pingnyap pa hoik tawx Aux ka maix bawgyam khix Abibax pa hoik tat Aux ti deuh, mawh kheu lih maix khaing dauh meung Ejiptux ka dauh khix Abibax.”<sup>19</sup> “Can kawn Au plix num

mawh cie Aux, tobrie pa eei pex, mawie angah, yung angah, kawm pa pon pex phaoka pa mawh mhaing khawmuik tak mawh cie Aux.”<sup>20</sup> “Viang mawh nan, kawm la pa keh phaoka, maix tak deeh taoh nawh ka kawm yung, phan maix ang deeh taoh tak raig ti tik ngawg nawh, maix tak deeh taoh ka kawm Ai tix khankix. Paw kieh pui tix kaux kawx hoek mai taix yi tix ka sivoe Aux.”<sup>21</sup> “Maix tak yuh kaing krub liah singaix, daux singaix aliah maix tak lauxlee tix, viang mawh bawg yam yuh ma yuh kaung angah mai bawg yam vawg nghox ca khankix, maix tak lauxlee tix.”<sup>22</sup> “Maix tak yuh pawie gaing nghox daux aliah vang tuah, son plix nghox ca pa vawg maix phaoka mai pawie priex khrawm nghox ca yam hoik sidah num.”<sup>23</sup> “Pui maix pa mawh simex khankix tak hoek bleeh plak sivoe ngai Siyiex, pa mawh Siyiex ceu pui Isarelaix tix num loe bawg.”<sup>24</sup> “Aux tak grheu pui tang ceu sivoe maix mai kieh mee haktiex maix khankix nie baoux viehva mai tak ang koe pui pa ghoing ka haktiex maix yam hoek maix plak sivoe Siyiex tix num loe bawg.”<sup>25</sup> “Maix tak ang pon ti tan nham tau mai blah pa koe susaix, maix tak ang pon ti deuh pa tan tix daux pawie Pasakha tom hoek plak ponngawb.”<sup>26</sup> “Plix khaox plix ox pa liang maix ti pon khaing haktiex maix khankix, tak viex laig ka daux nyiex buan Siyiex maix, maix tak ang pon ti ngaik nex kawm pex daux rawm teeih miex nawh.”

### **Mose Mai Gumlox Pingnyap**

<sup>27</sup>Siyiex ah nin ka Mose, “Tiem ti deuh gumlox in khankix, grawh grawng nawh awm gumlox ceu pa kied ting ceu in, Aux tak yuh sijax mukheu mai maix khawm ceu pui Isarelaix khankix.”<sup>28</sup> Mose ot tau mai Siyiex tan, tixpon ngaix tixpon sawm, nawh ang ih priex mai ang nyaux rawm, Nawh Cao tiem gumlox sijax mukheu ka piang khlawp simaox an, pa mawh gumlox pingnyap kao gum heue.<sup>29</sup> Yam lih Mose khaing piang gawng Sina nawh viex khlawp simaox gumlox pingnyap ra mu daux taix. Yam lih nawh khaing piang gawng Mose ang tawng ka grawh riieng hak nex pakngai tix, khaix hoik sikah nawh tau mai Nawh Cao.<sup>30</sup> Yam jhak Arun mai ceu pui Isarelaix khankix ka Mose, kix yaoux hak nex pakngai

nawh hoik riieng mai kix koe krax lhat graung sonsang hoek kix dex nawh.<sup>31</sup> Mose kok ka kix mai Arun khawm cao kaing hoek ka tix mai sikah tau mai kix.<sup>32</sup> Khaix an, ceu pui Isarelaix khankix hoek dex nawh mai nawh tawx gumlox pingnyap khankix ka kix awm gumlox pa hoik sikah Siyiex tau mai nawh khawmuik ka piang gawng Sina.<sup>33</sup> Yam hoik sikah Mose tau mai kix, nawh tie man ka pakngai tix.<sup>34</sup> Viang mawh nan, yam laig Mose tix sikah tau mai Nawh Cao yam mawx angah, nawh plak man tie pakngai an tom ang nawh nyang lih hu ka plak praix mai nawh tak lih plak praix mai kraix gumlox ceu pa hoik tawm Siyiex ka ceu pui Isarelaix khankix.<sup>35</sup> Yam yaoux ceu pui Isarelaix khankix ka pakngai Mose yam mawx angah, hak nex pakngai Mose riieng, Mose tak baoux deeh tie pakngai tix ka man tie, tom hoek bawgyam laig sikah nawh tau mai Nawh Cao heue.

## **35 Grawng Been Singaix Tuah**

Mose kraix khrawm cub pui hun ceu pui Isarelaix khankix ah nin, “Inkix mawh gumlox pa hoik tawm Siyiex ka pex sonsang hawt yuh pex kah.”<sup>2</sup> “Yuh kaing ka daux liah singaix, singaix aliah mawh singaix pa singax singeh mai mawh singaix tuah singaix lauxlee son Siyiex, can pui pa yuh kaing ka daux singaix an, takkieh nawh yum.”<sup>3</sup> “Maix tak ang pon ti phlu ngu ka dee ot tix daux singaix tuah.”

### **Krax Tan son Nyiex Gox Buan Man**

(Lih 25:1-9)

<sup>4</sup> Mose kraix ka cub pui hun ceu pui Isarelaix khankix ah nin, “In mawh ceu pa hoik tawm Siyiex.<sup>5</sup> Ka daux pex pa sang tan son Siyiex, can pui pa koe rhawmrhi kieh nawh viex an khankix hoek tan ka Siyiex, can pa mawh khri mau mai tawng,<sup>6</sup> man klai raoma, man lung plix, man raoh rawt, man keei ceu pa mhawm mai hauk pex khankix.<sup>7</sup> Hak yung mhaing pa siang tix raoh, hak phix tiex mai khaox Akashax,<sup>8</sup> “Bee tok mai bee groi mai ceu pa sioe bhawng son nyawng bhawng pa sanggleeing,<sup>9</sup> “Siangsimaoux

34:19 Lih 13:2 34:20 Lih 13:13. 34:21 Lih 20:9-10, 23:12, 31:15, 35:2, Krub 23:3, Pi 5:13-14. 34:22 Krub 23:15-21, Si 28:26-31. 34:22 Krub 23:39-43.

34:25 Lih 12:10. 34:26 Pi 26:2. 34:26 Pi 14:21. 34:29-35 2Kaw 3:7-16. 35:2 Lih 20:8-11, 23:12, 31:15, 34:21, Krub 23:3, Pi 5:12-14.

bawd raoh mai siang simaox tang ceu khankix pa sang sau daux kraung ceep sibex dhah dawd taix mai ka daux man tie naok heue."

***Kraung Shiao Son Nyiex Gox Buan***

*(Lih 39:32-43)*

<sup>10</sup>"Can pui pa koe pingnya ka kaing khawmuik daux sinax pex, tak hoek mai yuh kaing ceu pa hoik tawm Siyiex khawmuik, <sup>11</sup>"Nyiex gox buan man mai nyiex gox mai pa tawb ka piang nyiex gox, canceu grok, khaox phia, lat, rong mai daux jhup jaong khankix, <sup>12</sup>teug buan sijax mukheu mai khaox glawm mai dieb teug buan dang ngeung krax pa cauxrhawm mai man tie pa sang tieb khankix. <sup>13</sup>Pheen mai khaox glawm nawh mai kraung pa shiao khankix mai blah pa tan ka plak sivoe ngai Siyiex, <sup>14</sup>Pang jawk ten khri mai kraung pa shiao tau mai an mai kaww ngu mai bee tok." <sup>15</sup>"Khu dee tan dee gleeing kix nyawng bhawng mai khaox glawm khankix, bee groi mai ceu pa sioe bhawng son nyawng bhawng pa sang gleeing mai man tie diang siviee dee laig kix ka daux nyiex gox buan man, <sup>16</sup>khu tan, dee tan krax tan pa gleeing tau mai grheeng tawng, khaox glawm nawh, pa shiao tix khawmuik mai pan khoek khawm caong nawh, <sup>17</sup>man pa sang fak tix daux biang nyiex gox buan man mai rong khaox nawh khankix, jhup jaong daux nawh khankix, man tie ka diang siviee dee laig kix ka daux biang nyiex gox buan man, <sup>18</sup>mai lhak nyiex gox buan man khankix, lhak pa shiao son daux biang nyiex gox buan mai maox nawh khankix khawm ra plak. <sup>19</sup>Kraung ceep yam yuh cao giex kaing li khankix kaing ka daux dee pa singax mai kraung ceep pa singax son cao giex kaing li Arun mai kraung ceep son kawn simex nawh khankix yam yuh kix kaing heue."

***Totaix Son Nyiex Gox Buan***

<sup>20</sup>Cub pui hun Isarelaux khawmuik li hu khaing sivoe Mose. <sup>21</sup>Can pui kukaux pa ceh daux rhawmrhi mai can pui kukaux pa koe rhawm haing khankix, viex krax tan tix ka Siyiex, son pa yuh kix nyiex gox buan man bang kum pui hun, grawng kaing jhaw Nawh khawmuik mai son kraung ceep pa singax khankix. <sup>22</sup>Kix khawm simex mai sibun, awm pa koe rhawm tix mai kix viex ble, krim meeh, jheep giien mai kong nhang khankix mai kraung khri kraung mau khawmuik, pui kukaux tawx ceu pa tan pa mawh khri ka Siyiex. <sup>23</sup>Pui

kukaux viex man klai raoma, man lung pliech, man raoh rawt, man pa taing ka keei ceu pa mhawm, hauk pex khankix, hak pex pa siang tix raoh mai hak phix tiex khankix hoek heue. <sup>24</sup>Can pui pa tan mau mai tawng khankix kukaux viex ti tan ka Siyiex mai pui pa koe khaox Akashax khankix kukaux kawx, viex hoek sonsang shiao dee yuh kaing jhaw Siyiex. <sup>25</sup>Sibun pa chix taing khankix, taing man ka taix tix, pa mawh man pa klai raoma, man lung pliech mai man raoh rawt tau mai man pa taing ka keei ceu pa mhawm khankix mai viex hoek heue. <sup>26</sup>Can sibun pa ceh daux rhawmrhi mai pa koe pingnya khawmuik taing hauk pex. <sup>27</sup>Kwad song cao pa kuang piang kix viex siang simaox bawd raoh, siang simaox tang ceu khankix pa sang tok kix ka piang kraung ceep sibex dhah dawd taix mai ka piang man tie naok <sup>28</sup>mai teei ceu pa sioe bhawng yuh nyawng bhawng, bee tok mai bee groi khankix. <sup>29</sup>Ceu pui Isarelaux khankix, viex ceu pa tan hoek ka Siyiex, awm pa koe rhawm kix ti tawx, can simex sibun pakoe rhawm ti viex kraung kuceu, pa hoik chix yuh kix, son kaing kuceu khawmuik ka Siyiex, kix yuh awm gumlox pa hoik tawm Siyiex ka Mose.

***Kaing Taix Son Nyiex Gox Buan Man***

*(Lih 31:1-11)*

<sup>30</sup>Mose ah nin ka ceu pui Isarelaux khankix, "Nghiet heue, Siyiex hoik kok ka ceukaux Bezalelaux pa mawh kawn simex Urix, Urix pa mawh kawn simex Hurax, pa mawh doeh ru pui Yudax," <sup>31</sup>Nawh hoik naog ka khuan Siyiex, pa kieh koe pingnya mai daux krax pa chix keud yuh mai krax tawng pa chix yuh kaing kuceu, <sup>32</sup>"Kaing pa chix yuh rieanggrang kuceu ka khri, ka mau mai tawng khankix, <sup>33</sup>pa chix pat chix kleuk ka siang simaox khankix, pa chix saik rieanggrang ka khaox mai pa min ka grawng kaing kuceu khawmuik. <sup>34</sup>Nawh Cao hoik tawx krax keud krax chix kuceu daux rhawmrhi nawh mai ka Ahawliba kawn simex Ahisamat doeh ru Dan, sonsang deeh chix gau sawn kiex ka pui khankix. <sup>35</sup>Nawh Cao hoik kieh kix grumnaog ka pingnya pa chix min ka kaing kuceu, son kaing pa saik mai kaing pa chix yuh pakpeung kuceu mai kaing pa chix taing man kuceu, sonsang taing kix man pa

klai raoma, man lung plieux, man raoh rawt mai man keei ceu pa mhawm mai kaing pa chix taing pakpeung kuceu khankix heue.”

**36** Bezalelax, Ahawliba mai can pui pa chix yuh kaing taix awm pa koe pingnya kix, pa hoik sau Siyiex pingnya dauw rhawm kix mai pa chix keud yuh, sonsang tawng kix ti yuh kaing khawmuik mai son kaing jhaw dee pa singax singeh, kix takyuh an awm lox tawm Siyiex.”

***Pui Khankix Viex Kraung Tan Tomnie***

<sup>2</sup>Mose kok ka Bezalelax, Ahawliba mai can pui pa chix yuh kaing taix kukaux, pa hoik tawx Siyiex pingnya dauw rhawm kix mai pui kukaux pa ceh rhawmrhi ti yuh kaing khankix hoek ti yuh kaing. <sup>3</sup>Kix rieb ti teei kraung pa tan ceu pui Isarelax khankix khaing Mose pa mawh kraung pa viex kix hoek, son kaing jhaw pa sang yuh kix dee pa singax mai kix baow viex kraung pa tan hoek awm pa koe rhawm kix ku ngawb. <sup>4</sup>Khaix an, can pui pa yuh kaing taix khankix mai pa yuh kaing kuceu, son dee pa singax singeh hoik naow kaing jhaw pa yuh tix mai tang ing kaux mawx kaux an <sup>5</sup>mai kix hoek krai ka Mose ah nin, “Pui khankix hoik viex pa nielheu khaing pa kub shiao ex son kaing jhaw pa hoik tawm Siyiex ka ex.” <sup>6</sup>Mose tawx lox, kieh kix krai pao pui pa ot dauw nyiex bang mhong ah nin. “Simex angah, sibun angah, paw lai baow viex kraung pa tan dee pa singax singeh hoek.” Pui khankix deeh yoi khaing krax tan tix. <sup>7</sup>Grawh grawng nawh, kraung pa pon kix hoik kub hoik naog, hoik nie tete son kaing pa sang yuh kix khawmuik heue.

***Sum Nyiex Gox Buan Man*** (*Lih 26:1-37*)

<sup>8</sup>Can pui pa chix yuh kaing kuceu dauw sinax kix pa mawh pui pa koe pingnya dauw rhawm tix, yuh man tie kao plah ka man pa hoik taing ti ka keei ceu pa mhawm, pa mawh man klai raoma, man lung plieux mai man raoh rawt mai kix yuh rieanggrang Cherubin ka piang man an, awm pa chix yuh kix. <sup>9</sup>Krax lang man tie ku plah koe tixnga daix sawk, krax vieh koe pon sawk mai man tie an sidu tau khawmuik. <sup>10</sup>Kix kleuk ti caing man tie an phuan pheeh lih mawh tix pheeh mai baow kleuk ti caing pa deuk an phuan pheeh mawh tix pheeh. <sup>11</sup>Nawh yuh dauw jhup maow koe ka praok man tie ka man pa klai raoma see dee sitioe kix ti caingkupheeh, awm pa hoikyuh ka piang

praok ka praix man tie an tix pheeh, pa mawh man tie ra pheeh tix pheeh. <sup>12</sup>Nawh yuh dauw jhup maow koe tixphuan dauw, ka piang man tie tix pheeh mai baow yuh dauw jhup maow koe tixphuan dauw ka praok plak blaong ka man tie an ra pheeh tix pheeh mai kieh dauw jhup maow an ralai giex man tie an tix pheeh hoik tix pheeh. <sup>13</sup>Nawh yuh grok khri tixphuan mu mai brawm man tie an tau ka kraung pa fak an, sonsang lih ti mawh nyiex gox buan man tix lhang. <sup>14</sup>Nawh yuh man tawb braux nyiex gox buan man ka hak pex mai yuh koe kao tix pheeh. <sup>15</sup>Krax lang man tawb braux an ku mu koe tixngoe sawk mai krax vieh koe pon sawk, man tawb braux an kao tix pheeh, mawh pa sidu tau. <sup>16</sup>Nawh kleuk ti caing man tie an phuan pheeh lih mawh tix pheeh mai man tie an liah pheeh baow kleuk tau mawh tix pheeh. <sup>17</sup>Nawh yuh dauw jhup maow koe tixphuan dauw ka piang praok man tie an see plak praix tix pheeh mai nawh baow yuh dauw jhup maow koe tixphuan dauw ka piang praok man tie an pa mawh ra pheeh tix pheeh. <sup>18</sup>Nawh baow yuh grok ka tawng tixphuan mu, sonsang kleuk man tawb nyiex gox buan man tau mai kieh mawh tix lhang khaing. <sup>19</sup>Nawh yuh pa tawb braux nyiex gox buan man ka hak yung pa hoik siang raoh mai deeh yuh pa tawb piang an ka hak phix tiex. <sup>20</sup>Son nyiex gox buan man, nawh yuh phia jung ka khaow Akashax khawmuik. <sup>21</sup>Krax lang phia ku plah koe kao sawk mai krax viex ku plah koe tix sawk mai tix diex. <sup>22</sup>Phia ku plah kieh kawb tix ka lat ra mu, sonsang kleuk paow tix, mawh kheu nan nawh yuh phia an khankix son nyiex gox buan man awm paow tix. <sup>23</sup>Nawh baow deeh yuh khaow phia khankix son nyiex gox buan man tixnga plah, son pa sang sau ka plak jee. <sup>24</sup>Nawh yuh dauw jhup jaong tixpon mu ka mau mai kieh koe greem khaow phia an tixnga plah. Ka greem phia tix plah kieh dauw jhup jaong koe ra mu, son lat ra mu mai dauw jhup jaong ra mu ka greem phia an tix plah mai son lat ra mu. <sup>25</sup>Son plak blaong nyiex gox buan man pa koe plak an tix plak, nawh yuh phia koe tixnga plah, <sup>26</sup>dauw jhup jaong an khankix

tixpon mu, pa yuh ka mau. Kieh daux jhup jaong koe ra mu greem phia tix plah mai baoux kieh daux jhup jaong koe ra mu ka phia an tix plah. <sup>27</sup> Son plak klip singaix nyiex gox buan man, nawh yuh phia koe liah plah. <sup>28</sup> Nawh baoux deeh yuh phia ra plah son daog plak khaix nyiex gox buan man khankix khawm ra daog. <sup>29</sup> Deeh kleuk an khankix ka plak greem mai ka plak toh tau ka daux jhup tix mu, kheu nan, nawh yuh ceu an khawm ra, son ra daog. <sup>30</sup> Phia koe daix plah, khawm daux jhup jaong khankix kao liah daux pa yuh ka mau mai kieh daux jhup jaong koe ra mu ka greem phia an khankix ku plah. <sup>31</sup> Nawh yuh khaox jhong pa sang chup ka khaox Akashax tix plak phuan gawng pa sang chup ka phia an khankix <sup>32</sup> mai nawh baoux yuh khaox jhong phuan gawng pa sang chup tix ka khaox phia an khankix son praok nyiex gox buan man ka plak an tix plak mai khaox jhong pa sang chup tix ka phia an phuan gawng son praok pa koe ka plak klip singaix. <sup>33</sup> Nawh yuh khaox jhong pa sang chup tix ka daux sigreung phia an khankix sonsang chix laig tom hoek ka toh an tix plak mai plak an tix plak. <sup>34</sup> Nawh om phia an ka rawm khri mai yuh daux jhup khankix ka khri, sonsang ralai giex khaox jhong pa hoik chup tix tau, nawh deeh om khaox jhong pa hoik chup an ka khri. <sup>35</sup> Nawh yuh man tie pa hoik taing ti deuh ka man klai raoma, man lung pliex mai man raoh rawt pa hoik taing ka keei ceu pa mhawm tix pheem. Man an khankix hoik taing tix ka grawng pa chix keud tix mai kix yuh rieangrang Cherubin ka piang an. <sup>36</sup> Nawh yuh rong khaox pon mu, ka khaox Akashax mai om ka khri, khawm grok khri pa koe ka rong mai deeh raug daux jhup jaong pon mu ka mau son rong an khankix. <sup>37</sup> Nawh baoux deeh yuh man tie diang siviex nyiex gox buan man tix pheem, ka man pa hoik taing tix pa mawh man klai raoma, man lung pliex, man raoh rawt mai man pa taing ka keei ceu pa mhawm khaing cao pa taing man tix kaux, <sup>38</sup> kieh rong khaox an phuan mu grum tau mai grok nawh khankix mai nawh om kaing rong an khankix mai toh lat ka khri, viang mawh nan, daux jhup jaong phuan mu yuh ka tawng heue.

### **Teug Buan Sijax Mukheu**

**37** (Lih 25:10-40, 27:1-8, 30:1-10)  
 Bezalelax yuh teug buan sijax mukheu ka khaox Akashax, krax lang koe ra sawk tix diex, krax vieh koe tix sawk tix diex mai krax lhaong koe tix sawk tix diex. <sup>2</sup> Nawh om khri naw plak daux mai plak praix mai kawb kraung khri ka hawt vungviang gawng nawh khawmuik. <sup>3</sup> Nawh raug daux jhup khri pon mu, sonsang sau nawh ka daog teug pon daog, daux jhup khri an sautixplakra mu. <sup>4</sup> Nawh yuh khaox glawm ka khaox Akashax mai om khri ka piang an. <sup>5</sup> Nawh sau khaox glawm an ka daux jhup khri pa koe ka praok teug buan, sonsang pon klawm kix ka teug buan an. <sup>6</sup> Nawh baoux deeh yuh dangngeung krax pa cauxrhawm ka khri nawnaw, krax lang koe ra sawk mai tix diex, krax vieh koe tix sawk mai tix diex. <sup>7</sup> Nawh yuh rieang Cherubin ra mu ka khri pa hoik raug tix mai deuh ka piang dangngeung krax pa cauxrhawm an tix plak tix mu. <sup>8</sup> Rieang Cherubin di prui k tix kheem ka piang dangngeung pa cauxrhawm an mai kieh pakngai Cherubin khankiex ralai veeh ka paoux tix ka piang dangngeung krax pa cauxrhawm an. <sup>9</sup> Rieang Cherubin di prui k tix ka piang mai kheem dangngeung krax pa cauxrhawm an ka prui k tix mai kieh pakngai Cherubin khankiex simi jhak ka paoux tix, ka piang dangngeung krax cauxrhawm an heue.

### **Grawng Yuh Pheen Tan Blah**

(Lih 25:23-30)

<sup>10</sup> Nawh yuh pheem ka khaox Akashax, plak lang koe ra sawk, plak vieh koe tix sawk mai plak lhaong koe tix sawk. <sup>11</sup> Nawh om an ka khri naw mai kawb kraung khri khankix hawt gawng vungviang praok khawmuik. <sup>12</sup> Nawh baoux yuh khaox lat praok pheem pa vieh been tix tiag taix, ka praok vungviang pheem mai kawb khri hawt vungviang praok an khawmuik. <sup>13</sup> Nawh raug daux jhup khri pon mu ka son pheem an mai sau daux jhup khri an khankix ka daog pon daog ka piang caong pheem pon mu. <sup>14</sup> Daux jhup khri koe dex hawt khaox lat praok pheem ka dee chup khaox yam klawm kix pheem an hu. <sup>15</sup> Nawh yuh khaox glawm ka khaox Akashax, sonsang klawm kix pheem hu mai om khri ka an. <sup>16</sup> Nawh yuh kraung shiao piang pheem khankix ka khri

naw, pa mawh pan, klong, lawk tuh mai kawh nyauxsonsanglhaukankixkahheue.

**Grawng Yuh Pang Jawk Ten Khri**

(Lih 25:31-40)

<sup>17</sup>Nawh baox yuh pang jawk ten khri ka khri naw, jaong num pang nawh, klong nawh, plix nawh mai rieang tai pa pruh hoik mawhpa tawk tikleuktau khawm kring.<sup>18</sup>Kak liah mu pa lih khaing jawk ten khri an ra plak mai lih khaing jawk ten khri plak in loe mu, plak an loe mu.<sup>19</sup>Piang kak pa koe plak in koe klong loe mu pa awm pakpeung pruh tai khaox ceem khaox mai koe plix koe tai, ka piang kak pa koe plak an kawx koe klong loe mu pa awm pakpeung pruh tai khaox ceem khaox mai koe plix koe tai, ka kak pa lih ka khaing jawk ten khri an khawm liah kak, tak awm an khawmuik.<sup>20</sup>Ka piang jawk ten khri an, koe klong pon mu, pa yuh awm pakpeung pruh tai khaox ceem khaox, khawm plix nawh mai pruh tai nawh.<sup>21</sup>Ka greem kak pa lih khaing pang jawk ten khri ra mu, koe plix pa hoik kleuk tix tau mai kak an ra mu, kak khankix liah mu pa lih khaing pang jawk ten khri hoik yuh nan khawmuik.<sup>22</sup>Plix nawh mai kak nawh khankix mawh pa kleuk tix tau mai pa hoik tawk ti yuh ka khri naw tau.<sup>23</sup>Nawh yuh kawh ngu aliah mu mai sigiiep ngu mai tawg nyaox khankix ka khri naw.<sup>24</sup>Nawh yuh pang jawk ten khri mai kraung pa shiao khankix ka khri naw tix talantan heue.

**Yuh Khu Dee Tan Nyawng Bhawng**

(Lih 30:1-5)

<sup>25</sup>Nawh yuh khu dee tan pa gleeing nyawng bhawng ka khaox Akashax, krax lang tix sawk, krax vieh tix sawk, khawm pon daog sidu paox tix, krax lhaong koe ra sawk, rung khankix mawh pa kleuk tix tau mai an khankix.<sup>26</sup>Nawh om khri ka piang an khankix mai praok vungviang mai rung nawh khankix, nawh baox deeh kawb hawt vungviang praok nawh ka kraung khri khawmuik.<sup>27</sup>Nawh yuh daux jhup khri ra mu koe ka greem kraung khri khankix ka plak daog khawm ra plak, sonsang giex khaox glawm yam klawm kix hu.<sup>28</sup>Nawh yuh khaox glawm ka khaox Akashax mai om ka khri heue.

**Yuh Bee Groi Nyawng Bhawng** (Lih 30:22-38)

<sup>29</sup>Nawh baox yuh bee groi pa singax singeh mai nyawng bhawng pa singax, ka ceu pa jiet nyawm sioe bhawng, awm pa yuh cao sidah ka ceu pa sioe bhawng khankix heue.

37:29 Lih 30:22-38.

**Yuh Khu Dee Tan Pa Gleeing**

(Lih 27:1-8)

**38** Nawh yuh khu dee tan krax tan pa gleeing ka khaox Akashax, plak lang koe phuan sawk, plak vieh koe phuan sawk, plak lhaong koe loe sawk mai daog sidu khawm pon daog.<sup>2</sup>Nawh yuh rung koe ka daog pon daog pa kleuk tix tau mai khu dee tan mai om khankix ka tawng.<sup>3</sup>Nawh yuh kraung pa shiao son khu dee tan, aw, sipeed, pan khoek, sigawng nex mai pan khoek khankix ka tawng heue.<sup>4</sup>Nawh yuh grheeng tawng tix mu son khu dee tan mai deuh ka rawb vungviang khu dee tan, jah ka plak caong, tom hoek sigreung.<sup>5</sup>Nawh raug daux jhup pon mu, son grheeng tawng an pon daog, sonsang chup khaox glawm kah.<sup>6</sup>Nawh yuh khaox glawm ka khaox Akashax mai om tawng ka piang an.<sup>7</sup>Nawh chup khaox glawm ka daux jhup pa koe praok khu dee tan sonsang mawh dee klawm kix kah, nawh yuh daux doh ka piang mai yuh plak greem ka phia heue.

**Grawng Pa Yuh Pan Khoek Tawng**

(Lih 30:18)

<sup>8</sup>Nawh yuh pan khoek tawng mai caong ka tawng mai deuh siliak tawng ka diang siviex nyiex gox buan man bang kum pui hun tan, son sibun pa khrawm paox tix hoek kum.

**Yuh Vie Guang Nyiex Buan**

(Lih 27:9-19)

<sup>9</sup>Nawh yuh guang nyiex buan plak jee mai vie guang an ka man taing ceu pa mhawm, plak lang tixyieh sawk.<sup>10</sup>Rong khaox son an tixnga gawng tau mai daux jhup jaong tawng tixnga mu mai grok pa ot ka rong khaox an mai latkhankix mawh pa yuh ka mau khawmuik.<sup>11</sup>Ka plak blaong man tie khankix koe tixyieh sawk tau mai rong khaox tixnga gawng mai daux jhup jaong tawng tixnga mu, grok ot ka rong an khankix mai khaox lat mawh pa yuh ka mau khawmuik.<sup>12</sup>Plak klip singaix man tie koe tixphuan sawk tau mai rong khaox kao gawng mai daux jhup jaong kao mu, grok ot ka rong khaox an kix mai lat mawh pa yuh ka mau khawmuik.<sup>13</sup>Son plak toh man tie koe tixphuan sawk.<sup>14</sup>Man tie khankix pa koe ka praok diang siviex tix plak, krax lang koe kao phuan sawk tau mai

rong loe rong khawm daux jhup jaong loe mu<sup>15</sup> mai krax plak sidu praok diang siviex plak an tix plak koe man tie lang kao phuan sawk tau mai rong khaox loe rong khawm daux jhup jaong loe mu.<sup>16</sup> Can man pa vie ka hawt rawb vungviang biang khankix mawh pa taing ka man ceu pa mhawm khawmuik.<sup>17</sup> Daux jhup jaong rong khaox khawmuik mawh pa yuh ka tawng mai grok pa koe ka rong mai ka khaox khankix mawh pa yuh ka mau mai ka toh rong mawh pa om ka mau, khawm can rong khaox pa koe hawt rawb vungviang biang mawh pa kleuk tau mai lat mau.<sup>18</sup> Man tie vungviang biang siviex khankix mawh pa taing ka man klai raoma, man lung plieux mai man raoh rawt pa taing ka keei ceu pa mhawm, krax lang koe tixnga sawk mai krax lhaong koe phuan sawk awm man tie pa koe vungviang biang an.<sup>19</sup> Rong khaox pon rong tau mai daux jhup jaong tawng pon mu, grok khankix pa koe ka rong mai lat mawh pa yuh ka mau mai ka piang toh rong mawh pa om ka mau.<sup>20</sup> Can lhak pa tawk ka nyiex gox buan man mai hawt rawb vungviang biang khawmuik mawh pa yuh ka tawng heue.

***Kraung Pa Hoik Shiao Son  
Nyiex Gox Buan Man***

<sup>21</sup> Inkix mawh carang yuh kix nyiex gox buan man, pa mawh nyiex gox buan man teug pa kham mhairug awm pa hoik simin kix khaing gumlox pa kraï Mose, son kraung pahoik shiao ceu pui Lewix khankix khaing daux tawm taix Itama kawn simex cao giex kaing li Arun.<sup>22</sup> Bezalelax kawn simex Urix, Urix pa mawh kawn simex Hurax doeh ru Yudax, yuh an kix khawmuik awm gumlox pa hoik tawm Siyiex ka Mose.<sup>23</sup> Pui pa yuh kaing tau mai nawh, mawh Ahawliba kawn simex Ahisamat doeh ru Dan, nawh mawh pui pa chix yuh kaing taix kuceu mai pa chix yuh rienggrang kuceu mai pa chix taing man klai raoma, man lung plieux, man raoh rawt mai pa chix taing ka keei ceu pa mhawm khawmuik.<sup>24</sup> Can khri pa shiao kix ka daux kaing jhaw son dee pa singax, mawh khri pa tan kix khawmuik koe tixnga dim talantan mai aliah yieh tixngoe Shekhe, awm pa sawn kix ka plak jiang dee pa singax.<sup>25</sup> Kraung mau pa hoik yuh kix carang, pa pon kix khaing cub pui haohhun khankix, koe tixyieh talantan mai tix  
38:25-26 Lih 30:11-16. 38:26 Mat 17:24.

rheng aliah yieh atixgliah phuan Shekhe, awm pa hoik sawn kix jiang dee pa singax.<sup>26</sup> Jah ka pui pa koe ju tixnga num tom haok ka piang, pa hoik simin carang koe pui liah sien mai loe rheng phuan yieh tixphuan kaux, kix mawh pui pa yax ti tawx mau tix plak shekhe awm pa hoik sawn kix jiang dee pa singax.<sup>27</sup> Khaing mau an tixyieh talantan, kix raug daux jhup jaong khankix ka dee pa singax singeh mai daux jhup jaong ka plak caong man tie, kix yuh daux jhup jaong tixyieh mu ka mau tixyieh talantan, son daux jhup jaong tix mu caw ti mawh mau tix talantan.<sup>28</sup> Khaing mau an tix rheng aliah yieh atixgliah phuan Shekhe, nawh yuh grok pa ot ka rong khankix mai son pa om nawh ka piang toh rong mai yuh lat ka mau an kix.<sup>29</sup> Tawng pa tan kix khawmuik koe atixgliah talantan mai ra rheng pon yieh Shekhe.<sup>30</sup> Khaing ankix, nawh yuh daux jhup jaong, son diang siviex nyiex gox buan man bang kum pui hun mai khu tawng dee tan, grheeng tawng mai can kraung pa shiao kix ka khu dee tan.<sup>31</sup> Daux jhup jaong khankix hawt rawb vungviang biang, son daux jhup jaong diang siviex biang, son lhak nyiex gox buanman mai son lhak pa shiao kix hawt rawb vungviang biang heue.

***Kraung Ceep Cao Giex Kaing Li***

(Lih 28:1-43)

**39** Kix caing kraung ceep pui pa yuh kaing krub ka Siyiex ka man klai raoma, man lung plieux mai man raoh rawt, sonsang yuh kix kaing ka dahdee pa singax mai caing kraung ceep pa singax son Arun, awm gumlox pa hoik tawm Siyiex ka Mose.<sup>2</sup> Nawh caing sibex dhah dawd taix ka keei khri tau mai man klai raoma, man lung plieux mai man raoh rawt, pa hoik taing ka keei ceu pa mhawm.<sup>3</sup> Kix tawk khri lih mawh khlawp rhi mai kip lih mawh keei khri sonsang caing ka man klai raoma, man lung plieux mai man raoh rawt pa hoik taing ka keei ceu pa mhawm ka kaing ceu pa min.<sup>4</sup> Kix caing maox rawd piang klip sibex dhah dawd taix ra nyaing, sonsang kleuk tau mai kieh toh maox an ra plak kleuk paox tix.<sup>5</sup> Maox pa taing son pa rawd piang klip sibex dhah dawd taix an, hoik awm krax grawng pa taing kix ka khri tau mai man klai raoma, man lung

plieux, man raoh rawt, pa taing ka keei ceu pa mhawm, awm lox pa hoik tawm Siyiex ka Mose. <sup>6</sup>Baox teei siang simaox bawd raoh ra mu mai saik ceukaux kawm simex ceu pui Isarela khankix ka dau, awm ngai lai cum mai sau ka dau jawk aw simaox khri. <sup>7</sup>Nawh sau siang simaox an ra mu ka piang klip sibex dhah dawd taix, sonsang mawh siang simaox ra mu pa dohkeud, son kawm simex ceu pui Isarela khankix awm lox pa hoik tawm Siyiex ka Mose heue.

### **Grawng Yuh Kix Man Tie Naok**

(Lih 28:15-30)

<sup>8</sup>Nawh yuh man tie naok ka man pa chix taing kix kuceu awm krax grawng pa caing kix sibex dhah dawd taix ka khri, ka man klai raoma, man lung plieux, man raoh rawt, pa hoik taing ka keei ceu pa mhawm. <sup>9</sup>Kix yuh man tie naok an sidu pon daog mai kix niiep kieh gawp piang paox tix, krax lang koe tix diex mai krax vieh koe tix diex. <sup>10</sup>Kix sau siang simaox ka dau rhoi khawm pon rhoi, kix tom sau siang simaox raoh, siang simaox raoh eem mai siang simaox raoh kiien ka rhoi tix, <sup>11</sup>ka rhoi ra, kix sau siang simaox klai, siang simaox klai riex mai siang simaox paing kiien. <sup>12</sup>Ka rhoi loe, kix sau siang simaox klai singi, siang simaox lung plieux mai siang simaox raoh klai, <sup>13</sup>Ka rhoi pon, kix sau siang simaox raoh toh, siang simaox paing pau mai siang simaox pa toh riieng, kix sau siang simaox ankix ka dau jawk aw khri pa hoik raug tix khankix. <sup>14</sup>Siang simaox koe kao ra mu, awm ceukaux kawm simex Isarela khankix, ceukaux kix hoik saik ti deuh awm cum ngai lai, son siang simaox tix mu, hoik tang koe ceukaux cao kix ka piang awm koe doeh ru kix kao ra ceu. <sup>15</sup>Kix yuh maox khri ka plak toh man tie naok, awm maox pa hoik duing tau ka khri. <sup>16</sup>Kix baox yuh jawk aw khri ra mu mai dau jhup khri ra mu mai sau ka piang toh man tie naok khawm ra plak. <sup>17</sup>Kix sau maox khri pa hoik duing tau ra nyaing, dau jhup khri ra mu, pa koe ka toh man tie naok an. <sup>18</sup>Kix deeh phiawk toh maox khri an ra nyaing ka dau jawk aw khri ra mu mai deuh ka piang maox rawd klip, pa koe plak sivoe ngai sibex dawd taix. <sup>19</sup>Kix yuh dau jhup khri ra mu mai sau ka greem toh praok man tie naok, pa koe ka dau sibex dhah dawd taix. <sup>20</sup>Kix baox yuh dau jhup khri ra mu mai sau ka piang maox rawd klip an

ra nyaing, ka plak greem sivoe ngai sibex dhah dawd taix, ka plak piang dee siteo ti tau mai maox rawd klip sibex dawd taix an. <sup>21</sup>Kix teei ka maox klai raoma tix nyaing pa hoik taing ti ka keei ceu pa mhawm mai phiawk ka man tie naok mai chup ka dau jhup khri pa koe ka sibex dhah dawd taix, son ang man tie naok pon tix tang tiah khaing sibex dhah dawd taix, awm lox pa hoik tawm Siyiex ka Mose heue.

### **Kraung Ceep Son Cao Giex Kaing Li**

(Lih 28:31-43)

<sup>22</sup>Nawh yuh sibex dhah jiet khaw peung mai sibex dhah dawd taix ka man klai raoma khawmuik. <sup>23</sup>Kieh dee paoh koe tix mu ka dau sibex dhah plak piang an son ang chix griah, kix caing praok vungviang dee paoh an, khawmuik ka keei pa kab ti tau. <sup>24</sup>Kix yuh plix sibex pa awm plix kla cang, hawt vungviang caong sibex dhah dawd taix plak piang an ka man klai raoma, man lung plieux mai manraoh rawt pa hoik taing tix ka keei ceu pa mhawm. <sup>25</sup>Kix yuh hing plix sibex ka khri naw mai sau hing plix sibex an sinax plix sibex pa awm plix kla cang pa koe ka hawt vungviang caong sibex dhah dawd taix plak piang an. <sup>26</sup>Kieh hing plix sibex tix mu khan ka sinax plix sibex pa awm plix kla cang, ka hawt rawb vungviang caong sibex dhah dawd taix plak piang yam yuh kaing Siyiex, awm lox pa hoik tawm Siyiex ka Mose. <sup>27</sup>Kix yuh sibex dhah dawd taix plak dau pa ceep Arun mai kawm simex nawh khankix ka man ceu pa mhawm pa min taing kix <sup>28</sup>mai yuh lawk kaing, mhok mai khilax ka man ceu pa mhawm, <sup>29</sup>kix yuh maox rawd nyoi tix nyaing ka man klai raoma, man lung plieux mai man raoh rawt pa taing tix ka keei ceu pa mhawm awm lox tawm Siyiex ka Mose. <sup>30</sup>Kix yuh khilawp mhok khri pa singax ka khri naw mai tiem ngai lai ka piang mhok khri an awm cum pa hoik saik tix dau tix mu pa ah nin "Kieh Mawh Pa Singax Singeh Ka Siyiex." <sup>31</sup>Kix phiawk khilawp khri ka maox klai raoma tix nyaing, ka piang man lawk kaing awm lox pa hoik tawm Siyiex ka Mose. <sup>32</sup>Mawh kheu nan, can kaing nyiex gox buan man bang kum pui hun hoik khawmuik mai ceu pui Isarela khankix yuh awm ankix, awm

lox pa hoik tawm Siyiex ka Mose.<sup>33</sup> Kix viex nyiex gox buan man hoek ka Mose khawm man tie mai can kraung pa shiao khankix, pa mawh grok, phia, jhong, rong mai khawm daux jhup jaong khankix,<sup>34</sup> hak yung pa hoik siang tix raoh mai hak phix pa sang lhop mai man tie plak daux khankix,<sup>35</sup> teug buan sijax mukheu pa kham mhairug tau mai khaox glawm mai dawb teug buan mai dang ngeung krax pa cauxrhawm,<sup>36</sup> pheen khawm kraung pa shiao khawmuik mai blah pa tan plak sivoe Nawh Cao,<sup>37</sup> pang jawk ten khri naw tau mai kaww ngu, kaww ngu pa deuh dee mawx dee an khawm kraung pa shiao khawmuik mai bee tok,<sup>38</sup> Khu khri dee tan, bee groi mai ceu pa sioe bhawng mai man tie ka diang siviex nyiex gox buan man,<sup>39</sup> Khu tawng dee tan, grheeng tawng, khaox glawm mai kraung nawh khawmuik, pan khoek khawm caong nawh,<sup>40</sup> man tie khankix son vungviang biang rong mai daux jhup jaong, man tie son diang siviex biang mai maox nawh mai lhak taww khankix, pa mawh kraung pa shiao son nyiex gox buan man bang kum pui hun,<sup>41</sup> kraung ceep yam yuh kaing jhaw khankix, sonsang yuh kix kaing krub ka dee pa singax, kraung ceep pa singax son Arun mai kraung ceep kaww simex nawh khankix, yam yuh kix kaing cao giex kaing li.<sup>42</sup> Awm lox pa hoik tawm Siyiex ka Mose, ceu pui Isarelax khankix yuh ceu ankix khawmuik.<sup>43</sup> Mose jhak ka kaing pa yuh kix khawmuik mai kix yuh awm lox pa hoik tawm Siyiex khawmuik mai Mose nawb buan ka piang kix heue.

**40** *Yuh Nyiex Gox Buan Man Ap Ka Siyiex*  
Siyiex ah nin ka Mose,<sup>2</sup> "Ka daux khix tix tix ngaix maix tak sum nyiex gox buan man bang kum pui hun.<sup>3</sup> Maix tak deuh teug buan sijax mukheu daux lawg mai tie ka man tie.<sup>4</sup> Maix tak viex pheen hoek tau mai can kraung pa shiao ka piang mai khre ti deuh kraung nawh khankix mhawm mhawm maix tak viex pang jawk ten khri hoek mai tok kaww ngu khankix.<sup>5</sup> Maix tak baow deuh khu khri dee tan, dee tok kix nyawng bhawng, ka plak sivoe teug buan pa kham mhairug mai sau man tie khankix ka diang siviex nyiex gox buan man.<sup>6</sup> Maix tak deuh khu dee tan krax tan pa gleeing ka plak sivoe siviex nyiex gox buan man bang kum pui hun.<sup>7</sup> Maix tak deuh pan khoek sinax nyiex gox

buan man bang kum pui hun mai khu dee tan mai sau ti deuh rawm ka daux.<sup>8</sup> Maix tak jung ti priex man tie hawt rawb vungviang biang mai fak ka dee laig kix daux siviex biang.<sup>9</sup> Maix tak teei bee groi mai kraix ka nyiex gox buan man mai ka can pa koe plak daux khawmuik maix tak kieh nawh singax khawmuik mai khankix tak mawh pa singax singeh.<sup>10</sup> Maix tak kraix ka khu dee tan krax tan pa gleeing mai can kraung pa shiao khawmuik mai kieh khu dee tan an singax, an tak mawh pa singax khaing paow tix.<sup>11</sup> Maix tak kraix ka pan khoek mai caong nawh khankix mai kieh nawh mawh pa singax.<sup>12</sup> Maix tak viex Arun mai kaww simex nawh khankix hoek ka diang siviex nyiex gox buan man bang kum pui hun tan mai heem kix.<sup>13</sup> Maix tak taww Arun ceep kraung pa singax singeh mai groi nawh ka bee, kieh nawh singax sonsang yuh nawh kaing cao giex kaing li Aux.<sup>14</sup> Maix tak viex kaww simex nawh khankix hoek mai taww kix ceep sibex dhah dawd taix plak daux.<sup>15</sup> Maix tak groi bee ka kix, awm hoik groi maix ka keeing kix, sonsang yuh kix kaing cao giex kaing li Aux, ka can pa hoik groi maix bee khankix tak mawh pa kieh kix yuh kaing cao giex kaing li tom sidah doeh ru kix tix ju hoik tix ju leeing ju."<sup>16</sup> Mose yuh an khankix awm lox pa hoik tawm Siyiex khawmuik.<sup>17</sup> Daux num ra, khix tix tix ngaix, kix yaog jung nyiex gox buan man mai sum kah.<sup>18</sup> Mose yaog ti sum nyiex gox buan man, sau daux jhup jaong mai tok ka phia, sau jhong mai jung rong nawh khankix.<sup>19</sup> Nawh nih man lhop ka piang nyiex gox buan man mai sau braux ka piang choek an, awm lox pa hoik tawm Siyiex ka nawh.<sup>20</sup> Nawh teei khlawp simaox pingnyap sau ka daux teug, chup khaox glawm ka daux jhup teug mai sau dawb dang ngeung krax pa cauxrhawm ka piang teug.<sup>21</sup> Nawh viex teug laig daux nyiex gox buan man mai fak man tie sonsang tie nawh lawg dee koe teug awm lox pa hoik tawm Siyiex ka nawh.<sup>22</sup> Nawh deuh pheen daux nyiex gox buan man, bang kum pui hun, ka praok plak blaong nyiex gox buan man,

ka plak praix man tie an khankix, <sup>23</sup> khan kheu blah ka piang pheem ka plak sivoie ngai Siyiex awm lox pa hoik tawm Siyiex ka Mose. <sup>24</sup> Nawh deuh pang jawk ten khri ka daux nyiex gox buan man bang kum pui hun, see dee koe pheem plak an, ka plak jee nyiex gox buan man, <sup>25</sup> Nawh tok kaww ngu an khankix sivoie Siyiex awm lox pa hoik tawm Siyiex ka Mose. <sup>26</sup> Nawh deuh khu khri dee tan ka daux nyiex gox buan man bang kum pui hun ka plak sivoie man tie <sup>27</sup> mai nawh gleeing nyawng bhawng pa sioe bhawng ka piang an awm lox pa hoik tawm Siyiex ka Mose. <sup>28</sup> Nawh fak man tie khankix ka diang siviex nyiex gox buan man. <sup>29</sup> Nawh deuh khu dee tan krax tan pa gleeing ka plak sivoie siviex nyiex gox buan man bang kum pui hun mai tan krax tan pa gleeing mai krax tan ceu pa ih ka piang an awm lox pa hoik tawm Siyiex ka Mose. <sup>30</sup> Nawh deuh pan khoe sinax nyiex gox buan man bang kum pui hun mai dee an nawh sau ti deuh rawm ka daux sonsang khoe tix ka. <sup>31</sup> Mose mai Arun khawm kawn simex nawh khankix khoe taix caong tix ka rawm an. <sup>32</sup> Yam laig kix ka daux nyiex gox buan man bang kum pui hun mai yam hoek kix dex khu dee tan, kix khoe taix caong tix

awm lox pa hoik tawm Siyiex ka Mose. <sup>33</sup> Nawh yaog ti jung man tie, hawt vungviang biang nyiex gox buan man mai khu dee tan khawmuik mai nawh fak man tie khankix ka diang siviex laig kix uik, mawh kheu nan, Mose hoik yuh kaing in khankix khawmuik heue.

***Paiawm Min Plakngai Siyiex*** (Si. 9:15-23)

<sup>34</sup> Yam an paiawm ceep ka piang nyiex gox buan man bang kum pui hun mai min plakngai Siyiex grumnaog ka daux nyiex gox buan man. <sup>35</sup> Mose ang pon laig ka daux nyiex gox buan man bang kum pui hun kheu hoik ceep paiawm ka piang mai min plakngai Siyiex hoik grumnaog ka daux nyiex gox buan man. <sup>36</sup> Yam hoik deeh haok paiawm khankix khaing piang nyiex gox buan man ku bawg, ceu pui Isarelax khankix lih hu krax hu tix. <sup>37</sup> Phan paiawm ang nyang haok khaing tan, ka kix ang nyang hu krax hu tix, krox tom hoek singaix deeh haok paiawm. <sup>38</sup> Mawh kheu ponngaix paiawm Siyiex koe ka piang nyiex gox buan man mai yam ponsawm ngu pa jhan riieng koe ka piang sivoie nyiex ma ceu pui Isarelax khanix, ka daux krax hu kix leeinglang krax heue.